

LE
SECOND DISCOVRS
DE IAQVES GREVIN, DO-
CTEUR EN MEDECINE A PA-
ris, sur les vertus & facultez de l'Antimoine,

AVQVEL

*Il est sommairement traité de la nature des Mineraux,
venins, pestes, & de plusieurs autres questiōs naturelles
& medicinales, pour la confirmation de l'advis des
Medecins de Paris, & pour servir d'Apologie contre
ce qu'a escrit M. Loïs de Launay, Empirique.*




30200

A PARIS,

Chez Jacques du Puy, Libraire Juré, demeurât en la Rue
S. Jean de Latran, à l'enseigne de la Samaritaine.

1567



Matieres traictees en ce liure.

Que l'Antimoine crud est poison	feuillet 12.
Des venins & poisons	feuillet 12.
De la nature de tous metaux	feuil. 26.
Cóment l'Antimoine se cōuertit en plomb.	feil. 34.
Des pierres metalliques & des Marchasites.	feu. 35
Que l'Antimoine calciné est poison	feuil. 42.
De la calcination	feuil. 43.
Que le Borrax ny le Nitre n'ont aucune propriété de corriger l'Antimoine	feuil. 55.
De la Chryfocolle	feuil. 56.
Que l'Antimoine preparé ne peult estre bon me- dicament purgeant	feuil. 66.
Que c'est qu'humour & de ses differences	feuil. 79
De la vertu purgeante qui est és medicamēts	f. 84.
Contre Paracellé	feuil. 90.
Que l'Antimoine ne peult guerir la Peste.	feu. 95.
Que c'est q Peste & des causes de la Peste	f. mesme.
Des formes specifiques & dont elles procedent: en- semble des proprietéz occultes	feuil. 103.
De la Rheubarbe, Scamonee & Turbith.	f. 110.
Dont vient la Reubarbe	feuil. 112.
Quelle couler est celle que les anciens ont nom- mee Glaucus	feuil. 116.
De l'Azur & de ses differences	feu. 119.

A MONSIEVR,
MONSIEVR DE CAR-
NAVALET, CHEVALIER DE L'OR-
dre du Roy, & gouverneur de
Monseigneur le Duc
d'Aniou.



MONSIEVR, ie viens derechef me
presenter à vous, à celle fin que
vous soyéz iuge equitable de ce-
ste miëne dispute, entreprise sous
vostre faueur, laquelle a desia esté commen-
cee en vostre presence, comme deuant celuy
qui peult, par une bonté & promptitude na-
turelle, ioincte à la cognoissance, que vous a-
uez aquisse en la lecture de plusieurs bons au-
theurs, asseoir iugement sur le different esmeu
touchant les vertus & faculté de l'Anti-
moine : dessein certainement louable, si Lau-
nay, qui est ma partie aduerse, poursuyui de
raisos, ne se fut desfronté à la maniere du cerf,
lequel se voyant pourchassé & pressé des

chiens bien amenttez sur ses routes, comence à se forpaïser, à celle fin de gagner en rufant cela que par vïteſſe il ne peut obtenir. Ce qui a eſté cauſe, Monsieur, de me faire encores mettre la main à la plume, non tant pour me ſauuer de ſes calomnies, que pour deffendre la verité, de laquelle ie me ſuis fait fort en mon Discours, & pour laquelle i'inuoque voſtre faueur, biẽ q̃ de ſoy-meſme elle ſoit ſuffiſante: car la malice eſt venue auïour d'huy iuſques à ce poinct, que les ambitieux font gloire de l'impugner, & eſt neceſſaire que les eſprits vertueux, du nombre deſquels chaſqu'vn vous recognoiſt, mettent la main à l'œuure, pour maintenir celle qui les fait honorer & paroïſtre entre le reſte des hommes, comme fait vne belle roſe du Printemps entre les poignantes eſpines. I'ay ſouuentefois diſputé de ceſte matiere avecque pluſieurs doctes, experimenter & premiers Medecins de ceſte ville, le iugemẽt deſquels eſt cy apres tranſcrit, & principalement avecques Mon-

sieur Millet, lequel, comme vous scauez, a si sagement conioinct l'experience à la dextérité de son bon esprit, que son seul tesmoignage me pouuoit exciter à mettre la main à la plume : comme, certes, il a fait & m'a donné la hardiesse de vous prier de rechef, de vouloir fouoriser ceste mienne entreprise.

Monsieur, ie prie le Createur de toutes choses, qu'il luy plaise vous maintenir en sa grace, & moy en la vostre: de Paris ce XXV. Aoust. 1567.

Vostre obeissant seruiteur,

laques Gréuin, Medecin.

CELEBRIVM ALIQVOT *medicorum Parisiensium de Antimo- nio sententiæ.*

*Ioannis Gorraei Doctoris medici de Antimonio sententiæ,
ex quadam ipsius epistola desumpta.*



Erùm quem tu in iis omnibus delectum
adhibuisti, eundem velim in Antimonio
seruasses. Qua in re nemo est, qui leuita-
tem animi tui non accuset: quòd, aliis in
rebus ad valetudinem tuam minimùm pertinen-
tibus circumspectissimus & timidissimus, in eo pas-
sus sis a muliercula tibi imponi. Scio equidem, quid
de eo medicamenti genere à vulgo circumferatur,
quantisque eius vires laudibus quidam prædicent:
nemo tamē mihi persuadebit, vt eo cuiquam vten-
dum putem. Si nāmque eius vires vel ratione, vel
experimeto, quibus tanquam duobus cruribus om-
nis medicina nititur, diiudicare libeat, non video
cuius suffragio viam sibi ad rectum purgationis
vsum munire possit. Ratione enim inuentum
fuisse; nemo est qui fidem faciat. Empiricorum
autem & circumforaneorum medicorū experien-
tiæ cur credamus, nulla satis digna causa affer-
ri potest. Hippocrates hominum saluti consu-
lens, nec temerè cuiquam fidendū docens πέρην σφα-
λερὴν dixit, idque eo sæculo, in quo bonarum artium
& medicinæ studia florebant, & homines doctrina
& iudicio præstantes ea colebant. Nos verò nostro

saeculo quàm turpiter delinquimus, qui *χρὲς καὶ πρὸς ὅλην
γεγονότα* tanta cum fiducia confectamur & prædica-
mus, nullóque discrimine experimenta per mortes
hominum capimus, nulla veterum & sapientum au-
thoritate ad ea excitati? Non habeo necesse addu-
ctis exemplis aut argumentis Antimonium tuum
refellere, quæ multa suppeterent, si priuatim ea de
re agere liberet & nisi certo scirem te plus meæ erga
te voluntati atque amicitiae, quàm aliorum dictis
scriptisue tribuere. Vale.

NICOLAI MAGNI DOCTORIS

Medici de Antimonio sententia, ex quadam
ipsius epistola desumpta.


IN morbo, quem artis præceptis accuratissi-
mè oppugnare & vincere contendisti, adhi-
bito frequenti Æsculapiorum cōsilio, quid
tibi superesset agendum cūm ferè attonitus me ro-
gares, ne præsentī ope carere videreris, sed semper
aliquid in promptu haberes, adhibuisti epistolam in
vana Antimonij prædicatione, postmodum persua-
surus vt bona venia dissimulāter tibi liceat nouum
medicamenti genus quodam prætextu (non sine no-
minis priorum medicorum eleuatione) apud vulgus
insinuare, & pro miraculo ponere. quod certè pro-
bare non possum, imò minus quàm fecerint, qui Hē-
magogum, eiúsque inuentorem obcæcatis oculis,
ne successorem nictu haberet, damnarunt. In eo su-
pererat aliquid vtilitatis moderata dosi vtentibus,
quoties sanguine plenū erat corpus. In Antimonio,
cūm nihil Galenus, nihil Dioscorides, nihil medici

omnes philosophicis rationibus cōiecissent & probassent inesse facultatis conuenientis cum interna viscerum substantia & calore nostro, tantum inter externa præsidia id numerarunt: velut habentes pro certo deleteriū esse, si intrò admitteretur. Quod adfers quendam in suspecta lue venerea perbellè habuisse, cum in rudimentis esset, humoribus ferè ad extremos spiritus è corpore exclusis, facit vt eo ipso deleterium esse putem. Neque profectò medici est, imò ne empirici in tanta supellectile remediorum sic periculosum cōminisci. Idem mihi videris velle moliri, quod nescio quis Paracelsus, euanesceus in suis cogitationibus, de Tartaro nobis effinxit, quo ad omnes morbos vtèdum prædicat, vix dum fidem habēs, quid in vno præstare possit. Memineris, quæso, in probatissimorum medicamentorum exhibitione tam circumspectos fuisse medicos omnes etiam classicios, vt apud illos pro communi actione & lege proclamatum sit, faciētibus medicinam perpetuò infrà subsistendum, ne arti & artifice calumnia inuratur, & pro medico periclitator euadat. In hoc tno medicamēti genere duo habes, quæ faciunt vt in portu facilè impingas: probatam omnibus malignitatem, quæ visceribus tantam vim infert, vt vix qui sumpserint restituantur ægri: alterum, dosim incognitam, quam nullus hætenus designauit, sic vt nescias, quomodò infrà sit tibi subsistendum. Si ad probationis vsum progredi velis, habes exemplum domesticum: cuius ego, nostrique ordinis plures testes erimus. Nicolaus Pharmacopolæ cuiusdam ad pontem Marianū affinis, cum in hac arte Chymica

fatis industrius, sese ad Antimonij præparationem exercuisset, graui morbo correptus, cum eo explicari non posset, præter Medicorum & Chirurgorum, qui tunc illi assidebant, opinionem, Antimonij tantillum proprio instinctu sumpsit: vnde in dysentericum profluvium prolapsus è viuis excelsit. Alter in via Dionysiaca mercator, tertiana duplici detentus, quæ in quartanâ aut hemitritæum inclinabat, cum dies viginti ad summum medicorum consilio paruisset, vt ad rem auidus erat, mœstus quòd domi inclusus iacturam quæstus faceret, medicos salutauit, consiliûmque vicini mercatoris recepit: qui iureiurando affirmans Antimonij beneficio pari se ægritudine liberatum fuisse, suavit vt eandem dosim experiretur: qua sumpta, euacuatione & superna & inferna, tandèmq; quod solet in vehementibus pharmacis & deleteriis contingere, hypercatharsi mortuus est. Infinita mihi occurrunt exempla etiam plebeis nota, quæ ab hoc medicamento genere te reuocare debent. Nihil prætereà audio & video frequentius, quàm lachrymas & verba quærentium, & ordinis nostri patrociniûm implorantium ad vindicandas suorum neces, qui leuitatis & admissi pro medicamêto delerij pœnas luerunt. Quasi verò eò redacti essemus, vt nostro sæculo noua quæreda essent medicamenta exoletis viribus priorum. Scrua, quæso, quam de te hætenus concepimus opinionem. Cancros omnes non percurauit Galenus: nec tamen sese idcirco recepit ad ignota & plena periculi. Hoc quum apud te expendaris, auram popularem, potiùs quam veri inqui-

sitionem refugies : vera quoque esse probabis, quæ ego amicè scribo : & diligentius probata excuties è libello doctissimi viri nostri ordinis Iacobi Greuini : cuius & ingenij acumen, & doctrina spectata est ab omnibus, qui apud nos feliciter medicinam faciunt.

S I M O N I S P E T R Æ I, D O C T O R I S
Medici de Antimonio sententia.

VÆ apud optimos quosque medicos ad benè & integrè de salutaribus pharmacis iudicandum plurimùm valent, nempe ratio, & experientiâ : ea me ad vsum Antimonij sola opinione, fraude, & impostura cômendabilis, in exercenda medicina repudiandû impulerunt. Nam cùm ex Galeno optimo medendi magistro & artifice didicissem, in morborum internorum depulsione ea pharmaca à perito medico esse deligenda, quæ nobis essent familiaria, fugièda autem ea, quæ à nostra natura essent aliena, cuiusmodi metallica esse censeset : cùmque sæpe obseruassem quamplurimos Antimonio ab Empiricis imperato, aut cum seuiissimis cruciatibus è vitâ decessisse, aut reliquû vitæ spatium miserum traduxisse : temerè ac sceleratè eos medicinam exercere iudicaui, qui neglectis salutaribus præsidiis vnicum Antimonium, tanquàm numen aliquod amplectuntur & illi auspicati medicamenti prærogatiuam tribuunt. Quid enim opis ab eo expectare debeas, cuius natura grauissimo omniû veterum medicorum testimonio est prorsus deleteria,

que nulla arte corrigi domariue possit? Id tam certis & necessariis rationibus ex mediis Medicorū adytis petitis Greuinus noster doctissimus medicus, duobus à se cōtra Antimonianum quendam Medicum confirmavit, vt nullis posthac in morbis profligādis Antimonij vsus futurus sit. Cuius ego in hac disputatione censuram & integrum iudiciū vehementer probo, speroque fore, vt, qui Antimonij dotes in morborum curatione tantoperé prædicarūt, harum rationum momentis adducti tandem resipiscant, ac eo repudiato, quo incredibilis carnificina ab impostoribus exercetur, optimè faciendæ medicinæ rationem sequantur.

G V I L I E L M I P L A N T I I D O.

Etoris Medici de Antimonio sententia.



V A M de Antimonio opinionē diuturna effectuum euetuūque in multis, qui eo vsi essent, obseruatione haberem, quum ex me quæsiuisses, studiosiss. Greuine, vt meam de eo sententiam scripto aliquo testatam relinquerem, inuitasti. Sed antequam ad id aggrediar tecum mirari lubet quī fiat, vt huius temporis celebri alioquin nomine & doctrina homines seduci se tam facillè patiantur ab eo, qui nouum & insolens quippiam vix nudius tertius *φαινασθεν* contra veterū authoritatē primus protulerit. In Germania Theophrastus quidam Paracelsus nomine, pestilenti doctrina vir, omnium primus Antimonium in vsum introduxit, eiusque vires nugacissimis laudibus extu-

lit. Hic totius Philosophiæ & Medicinæ fundamēta ab Hippocrate primū iacta, deinde ab Aristotele & Galeno stabilita subruere & conuellere conatus est, atque curandorum morborum rationem veterum medicorū authoritate & quotidiano mendendi vsu confirmatam ad, nescio quas, essentias quintas retulit: malèque agendo tantum breui profecit vt perniciosiss. dogmatibus bonam Germaniæ partem imbuerit. Ab hoc impostore postea quæ de Antimonij effectis acceperat, Andreas Matthiolus Senensis effusus suis in Dioscoridem commētariis commendauit. Sub his duobus authoribus mirum quantum in dies creuerit de Antimonio fama, & sit virtus falsò celebrata, adeò vt approbatores multos inuenerit. Ipse tamē quum metallorū malignitatem, maxime vbi vsta crematæque tādū sunt, vt calcem referāt, confidero, & quotidiana exempla eorū, qui propter assumptum Antimoniū excruciatī crudelissimè decedunt, aut miserè vitam degunt, obseruo, nūquam eò me adduci patiar, vt id vsurpandū esse putem, quum pro vno, qui naturæ robore seruatus sit alios innumeros dato Antimonio perire videam.

*COLLEGII MEDICORVM PARI-
sienſium de Antimonio ſententia.*

VNiuerſi Collegij Medicinæ facultatis conuentu
habito ſuper Stibij ſeu Antimonij iudicio & lè-
ge ferenda, ſancitum eſt omnium, qui in medicina
claruerunt, authoritate atque rationibus cùm alibi
ſæpe, tum nuper apud Patronum Regium deductis,
ipſum Stibium deleterium eſſe, & inter ea ſimplicia,
quæ venenata qualitate pollent, annumerandû, nec
poſſe quauis emendatione emendari, vt intrò citra
moleſtiſſimâ noxam poſſit aſſumi. Datum in Scho-
lis Medicinæ 3. Calend. Auguſti, anno ſexto ſuprà
ſeſquimilleſimum ſexageſimum.

EPISTRE DE FL. CHRE.
stien a laques Gréuin, medecin, son
amy singulier.

GREVIN, le plus grād bien que l'homme puisse attēdre,
N'est pas ce qu'auourd'huy on pense follement
D'estre louē de tous & prisē tellement
Que dessus son honneur on n'osast entreprendre.
C'a esté de tout temps que le vice se bande
Encontre la vertu, Dieu a tousiours permis
Que les hommes de bien eussent des ennemis,
Affin de nous monstrier que sa puissance est grande.
Tout ainsi que la Mer plus elle est tourmentee,
Plus elle leue en haut ses flots qui se font voir,
Et tout ainsi qu'un Feu augmente son pouuoir
Alors que l'huile y est abondamment iettee:
Ainsi la vertueuse & la modeste vie
Compagne du sçauoir, tousiours apparoiſtra,
S'esleuera tousiours, & sans cesse croistra,
Mesme au plus grand effort de l'impudente Enuie.
L'enuie, mon Gréuin, loge en l'homme barbare,
Ne cerchons donques point l'enuieuse amitie:
L'enuie, mon Gréuin, vaut mieux que la Pitié,
C'est vne des chansons de nostre amy Pindare.
L'enuie suit tousiours vn excellent ouurage:
Tousiours la mesdisance assaut les bons esprits:
Qui iamaïs ne se veit de calomnie épris,
Ne peut a mon aduis estre grand personnage.
N'a-on pas veu iadis que les langues profanes
Mordoient Orphee, Homere, Aristote & Platon,

E P I S T R E.

*Æschine & Demosthene? & encores voit-on
 Qu'aujourd'huy les sçauants sont blasmez par des asnes
 Voy ce grand nourrisson des Nymphes Angeuines,
 L'excellent du Bellay, homme presque diuin,
 Premier poëte en France, a-il pas, mon Gréuin,
 Hausé son los parmy la ronse & les espines?
 Ainsi toy maintenant qui suis son excellence,
 Et qui és à bon droit des gens de bien aymé,
 Ne t'esmerueille point si ton nom estimé.
 Est ores abbayé par la sotte Ignorance.
 Mais poursuy ton dessein, affin que ton los croisse,
 Nonobstant ce fardeau qui le pense accabler
 Malgré ces ignorans qui ne font que habler,
 Et en blasmant autrui veulent qu'on les cognoisse.
 Qu'ils soient donques cogneus par le monde a leur aise:
 Ainsi iadis ce fol par trop audacieux
 Brula (pour acquerir quelque nom glorieux)
 Le temple consacré a Diane en Ephèse.
 Qu'on cognoisse vn Bouchet qui d'une sotte plume
 Offensant celuy la qu'il ne cogneut iamais,
 Frappe avec vn Sonnet ceux qui n'en peuuent mais,
 Sonnet de tous sonnets le cancre & l'apostume.
 Qu'on cognoisse vn Vessard gangrene poëtique,
 Vlcere trefin fait de sa religion,
 Qui a veu, ce dit-il, l'estrange region
 Du pais d'Americq, sans y estre heretique:
 Qui veut faire des vers sans que Phæbus le pousse,
 (Vers tels que les enfans en feroient de meilleurs)
 Qui selon le mestier des bons escornifleurs
 Flatte son de Launay, ce medecin d'eau douce.
 Ainsi ie suis ioyeux que le reste du monde*

(Qui s'en fust bien passé) cognoisse bien leur nom,
 Ne portant point d'enuie à leur puant renom,
 Ny aux escrits bourbeux de leur veine infeconde.

Je m'esbais d'un point, de ce que la sangsue
 Du bon renom d'autrui, se ioint a Rinaudean :
 Certes, il me desplaist quant l'esprit qui est beau
 Approuue par ces vers un œuvre maltissue.

Rinaudean mon amy, encor que ie t'excuse
 Pour croire que Launay par importunité,
 A rompu le barreau de ton humanité,
 En forçant malgré toy les outils de ta Muse :
 Si deuois-tu deuant que faire aucune chose.

T'enquerir de GREVIN, tu te fusses tenu
 D'escrire pour Launay: tu l'eusses reconnu
 Peut estre compagnon en vne bonne cause.

Tu ne deuois mesler ta blanche poësie
 Avecques la noirceur de ces béans corbeaux,
 Toy qui es estimé entre les bons cerueaux.
 Tu les deuois laisser avec leur frenesie.

Oste donc ie te pry ton nom d'un si sot liure,
 Rechautant ton blason: Ainsi gaillard & sain
 N'ayes iamais affaire a un tel Medecin,
 Si en ce monde bas tu veux longuement viure.

Quand aux autres banars, que tousiours l'Antimoine,
 Avec leur de Launay, les puisse guarentir
 De leur sens reprouué iusques au repentir,
 Peste autant a chasser comme est un meschant moine.



PREFACE.



A derniere fueille du discours que i'ay fait touchât les vertus & facultez de l'Antimoine, n'estoit à peine hors de dessus la presse, quand quelques vns feirent courir vn bruit que M. Loys de L'aunay se preparoit d'y respondre, & qu'il deliberoit me faire repentir d'auoir mis la main à la plume, de ce que i'auoy esté si hardi d'en mettre mon opinion par escrit : car il y auoit desia long temps, & auant qu'il fust imprimé, que quelques personages luy auoyent mandé qu'il se faisoit, au moins ainsi qu'ils disoyent, & en semoyent le bruit. Ce qui me feit doubter qu'à peine le pouroy-ie amener à la raison, puis que deuant qu'il eust entendu mes conclusions, il commençoit à minuter son respōsif. Qui est vn des plus grands vices auquel vn homme d'entendement puisse tomber, & lequel toutesfois a tousiours esté, & est encores tellement vsité, que peu souuent on void deux hommes disputans de quelque science, s'accorder par escrits ou conferences : d'autant

que l'un & l'autre estime vne chose honteuse que d'estre vaincu, dont il aduient qu'ils s'opiniastrét en leurs phantasies, & auant que iamais disputer, le premier serment qu'ils font est, de ne rien ceder de leurs opinions, & iamais ne cōfesser auoir esté trompez. Toutefois ie n'eusse iamais voulu accuser L'aunay de ce vice, le pensant homme digne du tiltre qu'il porte, & de la charge qu'il tient en la ville de la Rochelle, n'eust esté le liure qu'il a fait, par lequel il a montré la grāde ieunesse de son esprit, encores que s'il n'est sage en l'aage auquel il est, à peine le sera-il iamais: Car ie pensoy que le bruit qui en couroit, estoit venu plustost de quelques vns, qui parauenture se sentoient offensez par ce mien discours, lesquels à la maniere du simple peuple ignorant, se persuadent que ce qu'ils pensent est desia aduenu, pourautant qu'ils le desirent ainsi, & que leur affection les y cōduit.

Or cepédant que j'attendois la responce de Launay, il aduint que la cause du proces esmeu entre les medecins de Paris & quelques empiriques fut prestee d'estre appelée: au plaidoyé de laquelle i'en esperoie entendre quelque chose. Car on auoit semé le bruit que Launay auoit desia respondu, & que nos parties ne faisoient part de son liure qu'à leurs amis. Ce nonobstant ie n'entendis autre chose touchant les louāges de l'Antimoine (dont il estoit aucunement question en ceste cause)

que ce qui en auoit esté autresfois escrit par Dioscoride , Galen & Plin , ce qui ne con-
cluoit autre chose . sinon que l'Antimoine
appliqué exterieurement est bon à quel-
ques vlceres, arrest de sang & à farder les fem-
mes. Monsieur du Mesnil toutesfois aduocat
du Roy en ce tant celebré & redoubté Par-
lemét de Paris, ainsi comme il est d'un esprit
gentil, d'un esmerueillable iugemér, & d'une
asseuree experiéce des choses, toucha le poit
si dextrement , qu'il fut facile à vn chacun de
iuger combien ceste drogue est pernicieuse.

Or n'auoy-ie entendu parler de ce liure
depuis ce téps, quand on m'aduertit que Lau-
nay cherchoit en cesteville quelqu'un à qui le
dedier, & mesmes qu'il s'estoit adressé à vn
celebre & docte medecin , lequel ne luy dō-
nant respōse, mōstra assez ce qu'il en pensoit:
tant y a qu'en la fin il me fut enuoyé de la Ro-
chelle, & le receu le cinquieme iour de Feurier.
L'ayant leu & releu, i'apperceu combien i'e-
stois loing de mon compte, quant pensant a-
uoir affaire à vn homme modeste & desia an-
cien, comme on m'a dit, i'ay trouué premiere-
ment que c'est le plus iniurieux qui ait enco-
res mis la main à la plume : secondemét qu'il
est bien le plus opiniastre & ignorant qui se
puisse rencōtrer en nostre temps. Mais quoy?
ce sont vices lesquels se suyuent volōtiers: bien
disputer avec opiniastre est chose impossi-
ble, principalement quand la cholere y est

conioincte : en quoy faisant, certes, il a mon-
 tré combien il est esloigné de la nature d'Ar-
 cesilas, lequel auoit entrepris le combat cõtre
 Zenon, non par opiniastreté ou par desir de
 vaincre: mais cõme il est decõt à Philosophes
 & gens doctes, tel que Launay veut estre esti-
 mé. Tant y a qu'il a mōstré en cela vne grãde
 impuissance d'esprit, laquelle ne pouuāt estre
 gouuernee par les renes de raison, s'est telle-
 ment destraquée, que celle qui deuoit estre
 la maistresse, a esté assuiettie à la chambriere:
 la temerité a surmonté le conseil, l'appetit
 a outrepassé les commandemens de celle
 qui luy deuoit presider: les tenebres ont ob-
 scurci la lumiere, & bref, celle qui le deuoit
 gouuerner tant en la conduitte de ses affaires,
 que contre ses aduersitez a esté aussi petite
 & imbecille en luy, cõme elle l'est aux bestes
 brutes. Car ne se resouuenāt des commande-
 mens de Dieu, il s'est laissé vaincre par ses af-
 fections bouillantes. Qu'il ne soit ainsi, ie
 prie au nom de Dieu, les Lecteurs non pas-
 sionnez de voir mon premier discours, & con-
 siderer la maniere de laquelle ie me suis gou-
 uerné en ceste dispute: ie m'asseure qu'ils iu-
 geront que ce que i'y ay escrit ne meritoit
 que ie feusse ainsi delchiré d'iniures, comme
 il m'a fait: Car il ne se trouuera que ie luy en
 aye dit vne seule, si ce n'est qu'il soit si cha-
 touilleux qu'au moindre son d'estrille qu'il
 entend autour de ses oreilles, il vueille ruer

& mordre comme si quelque pallefrenier impatient luy vouloit estriller sa gale. Ce que sa plume mesme luy a fait malgré luy confesser disant en sa premiere epiltre que ie l'auois assalli à charettes d'iniures, & aussi peu de raisons: tellement qu'il faut qu'il confesse ou que i'ay eu charettes d'iniures:ou s'il n'y a point de raisons en mon liure, cōme il s'efforce de prouuer, il s'ensuit par consequent qu'il n'y a point d'iniures:ou bien qu'il estoit yure quand il a escrit cela. Mais ie voy bien que c'est, il a voulu ressembler ceux lesquels crient & iniurient les premiers,encores qu'ils ayent mauuaise cause,à celle fin qu'ostàs par ce moyen toutes occasiōs à leurs aduersaires, ils soyent estimez habiles personnages. Or puis qu'il le veut ainsi & qu'il a commencé à iniurier, ie le veux biē:à la charge qu'il endurera ce coup de fouet aussi patiemment, cōme sans me fascher, ie l'ay laissé geindre & ruer. Et puis que ie suis tant amoureux, comme il dit,il ne doit trouuer estrange si parauenture ie passe les limites d'attrempance:car il scait bien que le vray amour ne les peut garder.

Vostre responce se peut diuiser en deux parties, la premiere cōcerne mon epiltre, laquelle i'ay adressee à Monsieur de Carnauallet,& par laquelle vo^r dites auoir esté fort interessé:La seconde,qui est separee en six sections, cōcerne le fil de mon discours:le tout toutesfois farcy d'iniures, trop sottes pour

vn homme d'aagé, qui deuroit estre modeste & me deuroit remonstrer amiablemēt & fraternellement, si i'auoy failli en quelque chose. Je vous respondray donques à l'une & l'autre partie, & vous poursuiuray de si pres, que la ou vous ferez vn faux pas, ie ne feray faute à vous releuer à coups de fouet, puis que ie suis vostre fouet, comme dit celuy qui vous a presté son honneur à si bon marché, & lequel par quelques vers apposez au commencement de vostre liure, a escrit assez temerairement au desauantage d'un qui onques ne pensa à luy.

I'ay monstré seulement & en general par le brief discours de mon epistre que l'auarice & l'ambition sont celles qui remuent tout, non seulement en l'administration des estats publics : mais aussi en la conduite des particuliers, comme l'art de medecine : & que par ce moyen les vns pour se faire grands maintenoient leurs opinions contre les autres : les vns pour acquerir richesses, & les autres pour se faire renommer : comme il estoit aduenu depuis peu de iours à cause d'une drogue nommee Antimoine : que les vns s'estoient bandez contre : mesmes que l'on l'auoit calomniee, & que les autres la defendoient trop opiniastrement : que ie ne condamnois en tout & par tout l'Antimoine, mais seulement celuy, lequel par plusieurs raisons, me sembloit mal preparé : bref, que ie recognoissoit

plusieurs beaux secrets en l'Alchemie necessaires pour la santé des corps. Cela estât ainsi dit en general sans vous nommer & sans penser à vous, deuoit-il vous faire chouir des aureilles & mettre tellemēt en quinte que vous en perdissiez vostre disner, comme vous dites, & qu'au lieu de repaistre vostre esto- mach affamé, pour auoir par auenture pris de l'Antimoine le matin (car vous dites qu'il aguise l'appetit) vous eussiez baillé des coups de fouet à vostre asniere ceruelle, qui n'auoit encores accoustumé de se repaistre de tels chardons ? Mais vous dites que vous le feites, pourautant qu'il venoit d'un docteur de Paris, & que ce mot de docteur vous auoit excité. Vrayement ainsi le deuez vous faire plustost que de prendre occasion de vous moquer de ce tiltre. Auoir le nom de docteur est quelque chose, principallemēt quād ceux desquels on l'a acquis, le donnent à iuste raison : si ceux qui me l'ont donné ne l'ont ainsi fait, ie suis d'aduis que vous les veniez cōbatre : de ma part c'est à eux à qui cela s'adresse, & celuy qui a refusé vostre liure, fera le premier qui se rencōtrera pour vous faire teste, puis q̄ tel il m'a approuué. MaistreLois, apprenez que c'est vn hōneur, lequel nō seulement nourrit les arts: mais aussi lequel asseurement discerne les hōmes, q̄ sont approuuez par les republiques d'auecque les imposteurs vos semblables: apprenez que c'est vne recō-

penſe de la vertu, laquelle eſt donnee à quel-
qu'un par le iugement & à la pourſuite des
citoyens: & que celuy en eſt digne qu'il l'a ac-
quis par ſentences & ſuffrages d'iceux. Ne pen-
ſez pas toutesfois que delà ie m'eſtime d'a-
uantage: mais tout ainſi comme il vous eſt
odieux, ainſi m'eſt-il honorable.

Si en parlât en general de l'auarice & am-
bition, & parauenture tranſcrivant ce que les
anciens en ont dit, vous auez pris cela pour
vous, & que delà vous ayez cômencé à vous
cholerer, que doiuent faire tous les medecins
de Paris, entre leſquels vous dites ces deux
peſtes auoir ſi grâde vogue? ſ'ils eſtoyēt auſſi
faciles à ſe mutiner que vous eſtes, ce ſeroyēt
autât de coups de baſtōs ſur voſtre eſchine,
leſquelles miſerablement vous vous eſtes ac-
quis, & à credit. Pauvre hōme, ou vo⁹ mettez
vous? C'eſt biē à ceſte heure que les fourmis
ſe brauent du Lion qui dort: toutesfois ne les
penſez pas ſi iuſtes en voſtre endroit, comme
vous auez eſté iniuſte enuers ceux de voſtre
ville & enuers moy, lors que ne pouuant plus
tenir en voſtre peau, il a fallu que vous ayez
dōné voſtre coup d'eſſay par vos deux liures.
Le premier deſquels, cōme vous cōſeſſez, fut
fait par cholere en huit ou dix iours: n'en le-
uez point la main, ie vo⁹ croy ſans iurer: il eſt
facile d'en faire pluſieurs de telle eſtophe, auſ-
ſi biē q̄ faiſoit ce mechat poète duquel parle
Horace & lequel rottoit vne infinixé de vers

sans deplacer de dess^{us} vn pied. Et l'autre, cōme il est vray semblable, fut cōposé apres boire. Certainement ie ne m'esbahis point si en l'escriuant vous n'avez esté plus sage qu'au premier: encores que vous l'ayez tenu pres d'un an sur la forge. C'est la façon des ignorans & malicieux de se tenir tousiours fermes en leurs sortes opinions, d'autant qu'ils n'ont rié en leur ceruelle qui leur face cognoistre la verité.

Estudiez donques, maistre Baudet, & vostre ignorance & malice quiteront par auantre la place qu'elles se sont acquises en vostre bestialle ceruelle. Toutesfois ie crains bien que ce ne soit trop tard, & qu'à peine suyurez vous Caton qui apprist la Grammaire Grecque à l'aage de soixante ans. Lisez les bons liures, & ne vous arrestez plus à suyure l'opinion du barbier & du passant, lesquels vous ont appris à bailler de l'Antimoine, cōme vous dites, & ausquels vous avez creu trop legerement: aussi ne ferez vous plus asfailli de ceux de Paris. De ma part, vous me pardonneriez, si estant en la compagnie des docteurs de Paris, ie ne l'ay peu croire: car ainsi me l'ont-ils appris & ainsi en ont-ils oppiné d'un commun consentemēt, apres y auoir regardé diligemment, comme ie vous feray paroistre cy apres. Ie ne m'esmeruelleray toutesfois si vous avez admiré ceste transformation d'Antimoine: car ie ne m'en esmerucille

point, & ne m'en suis esmerueillé, cōme vo^s pensez, d'autant que, ainsi qu'escriit Ciceron, l'ignorance fait admirer les choses: & celle la mesme vous à fait admirer vostre nouvelle drogue, & auez fait à la façon des cōteurs de fables, lesquels seulement font admirer les choses qu'ils racontent, sans en monst^rer la cause. De ceste premiere faute vous estes tōbé en vne plus grande: car admirant seulement & ne sachant la vertu de vostre Antimoine transformé en si peu de temps, vous le baillastes, comme vous dittes, à vn barbier, pour l'esprouer sur les malades de l'hospital. C'est autāt, cōme si vous disiez, que vous baillastes vne espee nouvellement affilee, entre les mains d'un quidam pour essayer sur la teste & contre la poitrine d'un qui n'y pensoit pas, si elle estoit bien trenchante & si elle auoit bon estocq. O gentil coup d'escrime! mais vous auez escriit que c'estoyent pauures de l'hospital, enuers lesquels vous pouuiez esprouer vostre drogue. Qui vous à donné pouuoir de les tuer? Est-ce que vous soyez aduoué le bourreau public de vostre ville? ou bien que vous soyez semblable à celui contre lequel Martial escriit, & lequel il accōpare aux bouchers, entant que tout ainsi cōme le boucher tue les bestes, ainsi tuoit-il les hommes? Il est bien vray que vous auiez le barbier pour garent: car l'inconuenient qui en fut, ou parauenture en est aduenu, fut tō-

bé sur la teste du barbier, & eussiez dit que cōtre vostre ordonnance il eust trop baillé de vostre drogue: ce pēdant toutesfois où auiez vous oublié le serment d'Hippocrate: ains plustost celui du medecin Chrestien? est-ce la charité que vous auez enuers les pauvres? Vous vous enquistastes, ce dites vo^s, de leur aage, de l'habitude de leurs corps & de leur contenance, & leur baillastes à chacū quatre grains d'Antimoine avecque demie once de conserue de roses. Il faut donques dire qu'ils estoyēt tous cinq (car autāt en nōmez-vous) de mesme aage, habitude & contenance, puis que vous les chaussastes sur vne mesme forme: ou bien que l'inquisition que vous en feistes, n'estoit que pro forma. L'en laisse le iugement au lecteur, lequel dōnera meilleure sentence ayant veu cecy, que vous ne feites pas au rapport du Barbier, lequel vous bailla si belle resolution touchant la contenance de ces pauvres patiens: pensez qu'il auoit contemplé deuant que partir s'ils faisoient bōne mine. Tout ce que vous gargonnez apres, est le meilleur du monde: car il est fondé sur voz experiences, contre lesquelles ie n'employeray autre chose, sinon ce que desia i'en ay escrit au 27. 28. & 29. fueillet de mon Discours. Les Lecteurs y auront recours, s'il leur plaist, & verront là si vous auez bien leu & obserué ce que Galen commande aux medecins: sinon ils effaceront ce que vous escri-

uez en vostre huiſtieme page, là où il ſemble que vous vous voulez accompagner à Galen, lequel vous alleguez avecque plufieurs autres auteurs d'auffi bonne grace que harangoit vn certain quidam en plain confeil du feu Roy Henry: car ayant entendu qu'il y auoit vn Aduocat habille homme, lequel deuoit plaider vne cauſe, & lequel ſ'aſſeuroit de la gaigner par babil, il ſ'habilla en aduocat & plaida ſi bien que l'autre fut confus: d'autant que tout ainſi comme ſ'il euſt eſté vn grand clerc il alleguoit tantost Moyſe en Hebreu, tantost Demosthene en Grec, tantost quelques mots de Ciceron en latin, & tantost Guichardin & Machiauel, en Italië, toutes leſquelles langues il contrefaiſoit ſi dextrement, que le pauvre aduocat penſoit qu'il les parlaſt naturellement, ſi bien qu'il ne ſceut que repliquer & perdit ſa cauſe.

Ainſi en penſez vous faire, Maiſtre Lois, car à chaſque propos q̃ vous dites, vous mettez en auant Hippocrate, Platon, Ariſtote, Galen, Pline, & tous ces autres beaux mots qui rempliſſent l'oreille: & penſez faire votre cauſe bonne par ce moyen. Mais l'aduocat à qui vous auez affaire ne ſ'eſtonne point d'ouir les nōs de ceux qui luy ſont familiers: il ne reſſemble point ceux qui diſent, il eſt bō garçon, donnez luy à boire: car il a bien allegué. Et encores moins ſ'eſtonne-il d'entēdre M. Loys de Launay, lequel ayant ouy, cōme

il dit, cinq ou six leçons de feu monsieur Syluius, meit incontinent la plume au vent, & s'en alla prescher ses miracles où la bonne femme vendit son coq, hors de cognoissance. Vous estes vn grand clerc puis que vous auez ouy Syluius. le pense que ce vous a esté assez que de le voir, & qu'onques depuis ne sceutes d'auantage en medecine que le premier iour que vous y commençastes à estudier. Je suis marry que vous, ou plustost la verité me contraint, d'ainsi parler: Et le suis encores d'auantage que n'aez mieux practiqué ce que vous alleguez en la dixieme page de vostre liure. Vous dites que Galen trouue mauuais de se mocquer d'vn autre, voire qui aura asseuré vne opinion faulse: & toutesfois vous m'appellez faiseur de Balades, de farces, plaifât, qui resent encores les traicts de Cupidō, qui fais l'amour, pourautât, ce dites-vo⁹, que ie vous ay appellé meschant, fardé, rusé, malicieux, ambitieux & auaricieulx. Premièrement quand ores ainsi seroit que ie l'aurois fait, Iesus Christ que vous alleguez si bien, vous a-il appris ceste leçon de rendre mal pour mal? Sa parole, de laquelle vous vous masquez, n'a-elle sceu tenir en bride voz affections? si vous estiez ieune, il y auroit excuse: si vous estiez payen, encores plus grande: car vous diriez qu'il est licite de rendre mal pour mal. Mais ie m'asseure que tout homme qui aura leu mon discours, vous accusera non

seulement d'aperte calõnie, mais aussi vous demõtira: car il ne se trouuera poit que i'aye vsé de la moindre de ces iniures en vostre endroit. Ce que i'y ay dit, a esté en general de quelques vns sans nōmer personne. Et quant à vostre particulier, afin que les Lecteurs en puissent iuger, ie transcriray icy vne ou deux clauses de mon Discours, lesquelles sont en la premiere page du septieme feuillet, ayant parlé de la raison & experience, ie dis, Ainsi donques, Launay, ie vous prie de penser que ie ne me veux defendre ny vous assaillir d'autres armes, & qu'aussi vous estimant homme de lettres, ie pense que vous ne vous detraquerez point du sentier de raison, laquelle nous doit conduire à la verité. Faisons donques tellement que les regardans puissent remarquer en nous vne partie de l'honesteté & gentillesse des anciens cheualiers que lon nōmoit errás, lesquels souuētes fois apres auoir combatu long temps, si d'aventure la nuit suruenoit ne laissoient de se caresser l'un l'autre, & coucher ensemble en attendant le iour auquel ils deuoient vider leur querelle.

Si les iniures que vous dites ont quelque accordance avecque cecy, ie quitte la partie, & suis content d'estre condamné. Car il n'est vray semblable que ieusse voulu ainsi parler & vser de telle courtoisie apres vous auoir iniurié? ce seroit à faire à gens trop oublians. I'ay encores la memoire assez bonne

pour ne me laisser ainsi tromper : & né suis encores si vieil que mon aage me la face diminuer. Et quant aux iniures dont vous me pensez offenser, ie les reputé telles, que les Lecteurs non pafsionéz, & vostre consciéce mesme, si aucune en auez, les iugéront. C'est la vieille querelle des ignorans, contre ceux qui se sont efforcez d'illustrer leur langues, comme escript Iodelle parlant à sa Muse en ceste façon.

*Tu sçais que tous les iours vn labeur poëtique
Apporte à son autheur ces beaux noms seullemēt
De farceur, de Rimeur, de fol, de fantastique.*

I'ay pris plaisir de tout temps à la poësie, laquelle m'a serui de ce que seruent ordinairement les cartes, les dez, & les estœufs à ceux qui s'y delectent & y passent le temps. Estât encores ieune escholier i'ay composé quelques epigrammes François, quelques sonets, quelques Tragœdies & Comedies, lesquelles ont serui d'exercice tant à ma ieunesse, qu'à celle de plusieurs miens compaignons : & lesquelles ont esté iouees en quelques colleges de Paris, ainsi que de coustume ancienne on faict en l'vniuersité. I'ay en composant mes epigrâmes & sonets choisi, à la maniere des poëtes anciens, vn subiect pour discourir, lequel i'ay nommé Olympe, d'un nom faict à plaisir. I'ay escrit de toutes ces choses selon que l'aage & le temps me le permettoient. Sortant de ceste premiere ieunesse, i'ay em-

brassé l'estude de la medecine, estant auditeur assidu. L'entens encores ordinairement les hommes doctes parler & discourir des choses: & ne suis destitué de liures que vous nommez docteurs muets. Si pour cela iedoibs estre nommé faiseur de balades & de farces, la memoire de feu Syluius, que vous dites auoir esté vostre maistre, s'esleuera contre vous, & vous arguera d'ingratitude & de meschanceté. Car en sa iennesse il en feit autât, & mesmes quelque fois tout vieil, il y prenoit plaisir, & faisoit des vers, non seulement Latins: mais aussi françois, & pour ceste raison il feit quelque fois imprimer vne grammaire françoise. Que deuiendront, à vostre iugement, les Epigrammes & œuvres poëtiques de ce grand philosophe Platon, lesquelles il composa en sa langue, voire sur l'amour, que deuiendra le iugement qu'il a fait du poëte Anacreon, lequel il nomme sage, encore que personne n'ignore a quelles choses il s'est adonné? que deuiendra la louange qu'il donne au poëte Tyrtee, lequel il nome diuin? Que deuiendra ce grand medecin & poëte Grec Nicandre? sera-ce vn faiseur de farce? Que deuiendront Heraclite Democrite & Empedocle? seront-ce badins? & toutesfois ils ont tous fait des vers en leurs langues, & n'ont pas laissé d'estre grands medecins & philosophes. Mesmes ie dis, & est vray, que tous les plus excellens medecins du temps passé ont tous esté poëtes en leur langue.

langue. Si vous auez leu en Galen, vous trouueres les principales compositions toutes escrites en vers Grecs, & prises des excellens medecins & poëtes Andromaque & Damocrate. Voyez le liure de la Theriaque à Pison, les liures des Antidots, & les liures de la composition des medicaments, tant en general qu'en particulier. Mais ie croy que vous en auez quelque fois ouy parler, & en auez peu voir la couuerture, si ce n'est depuis que vo⁹ auez esté contraint de fueilleter vn peu les tables de vostre Galé, pour tascher à esmoncher cest Antimoine qui vous sert d'un Tan, ou d'une mouche Bouvine. Pensez que maistre Loys & ses semblables crioyent bien au Rimeur, si ie m'estois mis à escrire telles compositions en vers François. Si vous me repliquez que ie ne suis à comparer à eux, ie le vous confesseray tresuolontiers, pour la reuerence que ie leur porte : mais de les imiter, il ne m'est que louable. Et aussi diray-je sans arrogance, que ceux qui ont la ceruelle mieux faite que vous n'avez, les ont trouuez tels qu'ils les ont estimez dignes d'auoir quelque lieu entre ceux de nostre temps. Mais en quel rang mettez-vous Aristote, lequel non seulement a fait des Tragœdies & Comœdies, mais aussi a escrit vn liure de l'art poëtique, la où il monstre la maniere comme il les faut faire? Ce sera le maistre farceur, puis qu'il monstre l'art de faire ce que vous appelez

farces. Ce sera vn faiseur de balades : car il a escrit en sa langue maternelle des vers à Philoxene & des Elegies aussi, lesquelles l'injure du temps n'a voulu permettre venir iusques à nous. Platon son maistre, comme i'ay dit, fut grand poëte en sa ieunesse, & composa des Elegies & deux Tragœdies : & toutesfois le maistre & le disciple n'ôt point esté nommez faiseurs de balades, ny faiseurs de farces. Que direz-vous de ce grand & excellent personnage Heliodore, qui pour son integrité de vie & saine doctrine fut esleu Euesque Chrestien? toutesfois il auoit escrit par vn discours poëtique non mesuré les amours de Theagenes & de Chariclee, & aimamieux perdre son Euesché que d'endurer que son histoire Æthiopique fust bruslee. Il resentoit, à vostre iugement, les traiets de Cupidon. Mais il me suffira de vous dire ce que quelquesfois Iaques Tahureau escriuit sur la traduction Françoisise de Paul Æmyle faite par Jean Renard:

*Celuy qui veult blasmer la Françoisise ieunesse,
D'eslire pour subiect quelque belle maistresse,
Asin de reueiller gayement ses esprits,
Pour entreprendre vn iour choses de plus grand
prix:*

*Quiconque soit celuy qui telle amour mesprise,
Il est bien fort touché du vice de sottise:
Car il est tout certain qu'onques mauuais esprit
D'une gentille amour noblement ne s'esprit,*

*Et si faut assurer qu'amour sur toute chose
A faire un œuvre grand volontiers nous di-
spose.*

Je laisse tous les anciens, lesquels ont esté poëtes, comme Moyse, David, Salomon, & vne partie des Prophetes, lesquels ont escrit leurs propheties en vers. Je laisse tous les Chrestiens de la primitiue Eglise, lesquels, comme escrit Philon le Iuif, auoyent accoustumé de composer des vers. Je laisse Hierothee precepteur de S. Denis Areopagite, lequel composa des Hymnes d'amour, que le mesme Denis auoit quelques fois extraictes, & en la louange duquel il composa vn liure particulier. Je laisse S. Hilaire Euesque de Poitiers, Paulin Euesque de Nole, Prudence: Dantes Algerie Florentin, lequel composa en langue Tuscane. Je laisse tous ces premiers poëtes, lesquels ont dit auoir retiré les hommes de la vie brutalle, pour les faire viure en societé, & lesquels par excellence ont esté nommez par les Grecs, Tresprudens. Je laisse les plus grands personnages de nostre temps tât en la Theologie qu'ez Loix & Medecine, ausquels ceste gentille science poëtique a serui & sert de soulagement, & lesquels non seulement ont escrit en Grec & Latin, mais aussi en leur vulgaire. Vous auez mesmes entre les anciens Theologiens renommez par vn chacun,, Nonnus, Gregoire Nanzianzene, & entre les modernes Melancthon, Calvin: en-

P R E F A C E.

tre les Legistes anciẽs Modestus , & entre les modernes Alciat, & ce tant sage Chancellier de France Monsieur de L'hospital : entre les medecins anciẽs Thaletã, Emile, Macer, Rufin Ephesien, Serapion, & vne infinité de modernes tant Frãçois, Allemans, qu'Italiens. La version de Nicandre, ensemble la version de quelques Epigrammes Grecs faits par Monsieur de Gorris , vous apprendra combien il a pris & prend de plaisir en la poësie : les œures poëtique de Iules Cæsar Scaliger, ensemble les cinq liures qu'il a composez de l'art poëtique vous en pourront mōstrer autāt, s'il est ainsi que vous soyez susceptible de quelque raison. Lisez les œures poëtiques de Fracastor excellent medecin, ensemble le traicté qu'il a fait de la poësie, ou il dit que nō seulement il est decent aux ieunes d'entendre & honorer les poëtes : mais aussi aux vieillards & hōmes bien approuvez. Il dit encores qu'Aristote n'a point acquis moins de louãge à cause des p̄ceptes qu'il a dōnez de la poësie, q̄ du reste de sa philosophie. Mais quoy? nous ne sçauriõs faire boire vn asne s'il n'a soif: Et ay biẽ grãd peur qu'à la p̄miere verue q̄ entrera en vostre asniere ceruelle, vo⁹ ne criez apres vos faiseurs de carmes, qui vous ont tant bien aidé à faire vostre liure plus gros : i'ay grand pent di-ie, q̄ quelque iour vous ne les appelliez faiseurs de balades & rimeurs, & croy certainement q̄ vous auriez quelque raison de

ce faire. Je deduirois ce poinct plus au long, si ce n'estoit q̃ la chose parle assez de soy-mesme, & si Iean de la haize, homme docte & de bon esprit n'en auoit assez parlé en son liure qu'il a fait sur l'oraison de Ciceron, pour le poëte Archias. Ce liure est entiltre, De l'vtilité des estudes poëtique. Vous pourrez si bon vous semble en communiquer avecque luy: car il est de la Rochelle, & y est demourant, comme ie pense. Vous le prierez toutetfois (si vous vous repentez d'une telle faute) qu'il ne vous mette au rang du Pape Paul second, lequel pour auoir hay mortellemēt les poëtes, a esté mis au nombre de ceux qui ont esté ennemis des gens doctes. Je me contenteray d'auoir ainsi briefuement respondu à la premiere partie de vostre liure qui est des iniures, lesquelles i'eusse porté impatiemment, si ie n'eusse cogneu que telles choses sont procedees, non d'un iugemēt, mais d'une maladie, impuissance & petulāce d'esprit, & ausquelles i'ay respondu en passant, à celle fin que si vous auez pris plaisir en escriuant, maintenāt vous le perdiez en lisant.

Je viendray donques à celle partie, laquelle est la plus necessaire, & en laquelle ie prendray plus de plaisir de vous esmoucher à coups de fouet: car en icelle vous vous estes monstré autant ignorant & opiniastre, que meschant & malicieux en la premiere: dont ie m'esmerueille fort comment vous auez osé

P R E F A C E.

escrire telles balades & farces, veu que vous pouuiez bien penser que ie ne demourerois pas muet : toutesfois ce vous a esté assez de gaster l'encre & le papier, pourueu que, à la maniere des petis enfans qui aprennent à escrire, vous mōstrassiez besongne faite sans apprehēder le fouet que vostre maistre tient en la main.



*Chapitre premier. auquel il est monstré
que l'Antimoine crud est poison.*

Vous auez proposé six poinçts à discourir en ceste partie de vostre liure, que ie nomme seconde: le premier desquels est en ce que vo^r voulez prouuer que l'Antimoine n'est point poison. Le second que la Chrysocolle des anciens n'est pas nostre Borrax. Le troisieme que tous medicamēts qui font vomir ne sont du nombre des violents. Le quatriesme que l'Antimoine est vn médicament purgeant, & quels humeurs il purge. Le cinquieme que Galen & tous autres medecins ont reconnu vne forme specifique en tous simples, oultre l'action des quatre premieres qualitez & leurs despendents. Le sixieme qu'en desirant la perfection de nos simples vo^r ne blasmes point leur vsage, mais vo^r desirez qu'ils soyēt tels, comme les anciens les ont laissez par escrit.

Ceste propositiō est methodique, & sem- *propositiō*
ble que vous ayez appris à estre logicien de- *de launay*
puis le temps que feites vostre premier liure: *viciense.*
mais la maladie ne vo^r tient gueres, cōme no^r
verrōs cy apres. Toutesfois vous n'auez sceu

fibien proposer, que n'ayez fait vne faute bien lourde : car vostre propositiō surpasse la question qui deuoit estre disputee, & à la seconde démarche vous avez fait vn faux pas. I'ay biē dit, & le dy encores, que l'Antimoine est vn poison, mais touchant vostre Borax ie n'ay point soustenn qu'il fut la Chrysocolle des anciens, sinon entant que quelques auteurs l'ont escrit. Mesmes i'ay pris vostre negatiue pour payement, & me suis arresté au Nitre, comme nous dirōs en temps & lieu. Le troisieme poinct est defectueux en vn membre: car il est question des medicaments qui font aller par haut & par bas en mesme temps, lesquels ie dy estre violens nou seulement, mais malins de toute leur substance. Et toutesfois vous ne proposez que de ceux qui font vomir. Le cinquieme est du tout hors de propos : car qui vous a nié qu'il n'y ait des vertus en chasques choses naturelles, lesquelles surpassent l'action des premieres & secondes qualitez ? n'ay-ie pas dit que ceste vertu leur a esté donnee dès le iour qu'elles furent faites au monde, & qu'elle procedoit de l'entendible parole de Dieu ? Mais voyōs comment vous vous en estes acquitté.

*Que c'est
que venin
ou poison.*

Nous sommes d'accord de la definition de poison ou venin, à sçauoir que venin ou poison est toute chose, laquelle estant entree dedans le corps, ou par la bouche, ou par application exterieure ne cesse de le corrom-

pre, ou le destruire : mais encores que nous soyons d'accord de ceste definition, si est ce qu'il la faut entendre. Car il ne faut pas penser que tout venin qui entre au corps le corrompe ou destruisse, ains seulement celuy qui aura autant de copulence, qu'il en suffit à la vertu corrompante & destruisante : d'autant que l'on en pourroit bailler en si petite quantité que la nature seroit assez forte pour le vaincre & le chasser hors : & d'autant encores que tout ainsi comme le venin cherche la destruction de la nature : ainsi la nature ou chaleur naturelle cherche la destruction du venin. C'est pourquoy Galen escrit au Commentaire sur le dixseptieme Aphorisme du second liure, que les medicamēts qui ont vne vertu venimeuse & mortelle, comme la Mandragore & le Pavot ne peuvent nuire sinon en quantité. Par ceste quantité il entend celle qui est raisonnablement proportionnee à la vertu ou chaleur naturelle, comme aussi il fait au vingtquatrieme chapitre du liure de la semence. Cela estant ainsi entendu nous mettra d'accord touchant ce point. Mais *Faute de* quand vous dites que ces poisons estans en- *Launay.* trez dedans le corps, commencent premiere-
ment aux esprits, lesquels ils infectent : puis aux humeurs & en la fin aux membres solides de tout le corps : cela est faux estant escrit en general, comme vous l'avez fait. Car tout ainsi comme il y a des maladies particulieres

Quelques venins s'attachent par particuliere-mét à quelques parties du corps. aux esprits, les autres aux humeurs, & les autres aux parties solides : ainsi y a il des venins particuliers à chacune de ces parties : tellement qu'il n'est pas nécessaire que l'infection de tous venins s'attache aux esprits, puis aux humeurs, avant que venir aux parties solides. Et avant que le monstrier par exemples & tesmoignages, ie m'aideray de vostre texte mesme escrit en la page suyuant. *Et s'il aduient, dites vous, que l'esprit vital soit corrompu par telle venenosité, incontinent destruit la faculté du cœur, dont la mort s'en ensuit incontinent.* Il s'ensuit donques par vostre tesmoignage mesme, que ceste proposition generalemēt entendue, est faulse: car si l'esprit vital estant corrompu destruit la faculté du cœur, & que la mort en ensuyue incontinent, il n'a pas loisir de passer aux humeurs, & puis aux parties solides : ou biē tout venin ne s'attache pas premieremēt aux esprits, Ie m'arrestera y vn peu à discourir ceste faulseté: car comme vne partie de nostre dispute en depend, ainsi vous a elle serui de fondemēt à bastir vostre edifice. Et pour vous monstrier que tant s'en faut qu'il faille que tel poison premierement s'attache aux esprits avant que venir aux humeurs & parties solides, que mesmes il y en a, lesquels commencent ou vous finissez: ie vous mettray en auant l'Ephemerō ou Iournalier, lequel s'attache aux parties solides, deuant que venir à l'esprit vital : comme fort bien a escrit Ni-

candre en ces vers, que j'ay faits François fidellement & presque mot pour mot:

*Si quelqu'un a receu les flammes ennemies
Beuvant l'Ephemeron moissonner de nos vies,
Dont Medee Colchique usa premierement,
Il aura dans la leure un grand demangement
Qu'il ne peut eviter, faisant en telle sorte
Que si du suc neigeux que le figuier apporte,
Ou bien d'un aspre ortie, ou d'un oignon de mer
(Qui en cent vestemens sceut sa teste enfermer,
Et qui va rougissant la chair encor tendrette)
On luy avoit frotté toute la peau douillette.
Autour de l'estomach un faix trop ennuyeux
S'attache en le rongant: & puis pernicieux
Le perce d'outre-en-outre. Alors le miserable
Va rottant de la gorge vne chose semblable
A l'eau d'un cuisinier qui a lauë sa chair,
Et par le ventre bas ne laisse de lacher
Vne ordure puante.*

*Nicandre
aux cõtre-
poisons.*

Cela n'est pas vne balade, Maistre Loys, & pense que ne voudriez faire ce tort à Nicandre que de le nommer faiseur de balades, encores qu'il fut poëte: toutesfois vo^z voyez comment selon son tesmoignage ce venin s'attache aux parties solides des organes naturels, lors qu'il perce l'estomach de part en part. I'en pourrois autant alleguer du Lieure-Marin, & de plusieurs autres: car tout ainsi comme il y a des medicaments, lesquels regardent particulièrement quelques parties du corps: ainsi y a-il des venins, lesquels s'at-

tachent particulièrement à aucunes d'icelles, deuant que venir au cueur, vers lequel toutesfois en la parfin ils tendent. Raclez doncques ceste proposition de vostre liure, & par cousequent tout ce qu'avez basti dessus: comme la diuision que vous faites des venins, laquelle suit incontinent apres, en la page 15. *il y a*, dites-vous, *trois manieres de venins: La premiere est de ceux qui sont spirituels, L'autre de ceux qui sont humides, & la troisieme de solides.* Vous estes vn gētil cuisinier de deschirer ainsi la chair q̄ vous deuriiez coupper par art. Je pensois au cōmencement que vous fussiez vn grand logicien: mais ie voy bien que vous n'estes qu'vn brouillō. Aristote dit qu'il faut diuiser par les choses lesquelles sont situees en la substance, & non par celles qui sont accidentaires. Est-ce vne chose prise de la substance du venin que d'estre vapoureux, fumeux ou spirituel, humide ou solide? Ne sont-ce pas accidēts qu'ils ont cōmuns avecq̄ plusieurs autres choses naturelles? combien ya-il de choses spirituelles, humides & solides, lesquelles ne sont pas venins? Je sçay biē que telle diuisiō que vous faites pourroit seruir pour demōstrer quelque chose à des ieunes escholliers: mais pour en faire fondemēt en ceste dispute contradictoire, elle ne vaut riē, & faut qu'vne autrefois, si vous vous meslez de faire des liures, que vous en appreniez la maniere, & que quand vous ferez les diui-

*Faulte di-
uision des
venins fai-
te par
Lannay.*

siôs de ce qu'aurez enuie de traiçter, q̃ vo^s les faciez par opposites, & par ce moyē il n'y au ra superfluité ny deffaut, qui sont les deux vices remarquez par Aristote, & p̃ lesquels vo^s auez choppé si lourdement, que vous auez donné du museau en terre. Car ie vous demanderay volôtiers qui sont les venins que vous opposez à ceux que vous nommez spirituels? & en quel rang mettez vous les artificiels? mettez les où bō il vous semblera, & me mōstrez leur opposite. Apprenez donques que le venin est ou naturel ou artificiel: le naturel est elementaire & simple corrompu par quelque exterieure qualité, procedante ou de l'influence des astres, ou des mutatiōs de temps, ou des vapeurs & fumees venimeuses qui mōtent de la terre & des corps terrestres, dont procedent toutes les maladies, lesquelles en vn mesme temps font soudainement mourir plusieurs personnes, & sont nōmees pestes ou bien il est composé des elements. Le venin composé des elements se prend ou des corps viuāts, ou des corps sans ame. Les corps viuants sont ou terrestres ou aquatiles: ceux qui sont sans ame se prennent hors la terre ou dans la terre. Les venins artificiels sont ceux, lesquels sont meslangez par les empoisonneurs tant des naturels venins, comme des autres corps non venimeux, que toutesfois ils rendent tels par leur artifice. C'est ainsi, Maistre Lois, qu'il faut proceder quand il

*Vraye di-
uision des
venins.*

*Effets des
venins.*

est question de bastir le fondement de quelq science, & non pas escrire à la volée tout ce qui vient en vostre ceruelle. Cela ainsi posé, il faut passer aux effets & dire que tous venins executent leur malineté, ou par qualitez excessives chauld, froid, sec, humide : ou par leur substâce & propriété cachée, ou simple, ou ioincte avecque vne ou deux qualitez immoderées, comme nous auons monsté en nostre Discours. Et d'autant que vous ne scauez le tour de ce baston, vous tombez ordinairement en redites ennuyeuses: comme ce que vous auez dit en vostre 14. page des effets des venins, vous le repetez encores en

*Ignorance
de Lannay*

la 18. Là ou de rechef vous auez fait deux lourdes demarches, proposant, touchant ces effets, vne proposition manque, quand vous dites: *Ceux qui blessent par leur intemperature ont telle action ou par leur trop excessiue chaleur, ou par leur excessiue froidure: & vne faulx, quand vous dites: Car autrement ne pourront tuer l'homme.* Je m'aideray, pour vous releuer, du tesmoignage de Matthioli, lequel escrit au Commentaire sur la Preface du sixiesme liure de Dioscoride ce qui s'esuit: *Dauantage, dit-il, les venins qui agissent par l'exces de leurs qualitez diuersifient leurs actions selon la diuersité d'icelles qualitez: d'autant que les vns sont chaulds, les autres froids, les autres secs, & les autres humides.* Vous voyez par là comment les venins peu-

uent bien tuer l'homme autrement que par l'excessiue chaleur, ou froidure : Et que ceux qui blessent par intemperature, peuuent non seulement estre chauld ou froids: mais aussi secs, ou humides. Le mesme Matthioli le prouue fort bien incontinent apres, ayant propos  le doubte que lon en pouuoit faire. Il le prouue, dis-ie, par authoritez d'Hippocrate & Galen, & par les experiences & raisons, lesquelles i'employe contre vous, & lesquelles ie ne veux repeter icy de crainte d'estre trop long. Mais ie s ay bien qui est la pierre qui vous a fait chopper : C'est qu'autrefois vous auez ouy dire, ou paraenture leu au premier chapitre du quatrieme des Meteores, qu'entre les quatre qualitez il y en a deux ag tes, a s auoir le chauld & le froid: de l  vous auez pens  que les deux autres n'estant ainsi puissantes, ne pourront agir tellement dedans vn corps, que de le faire mourir. Vous l'auez touch  en vostre quatorzieme page: mais ie vous veux monst er de c bien vous vous y abusez. Les qualitez sont nommees agentes & patientes non au regard des corps composez, contre lesquels elles doiuent agir, ou par lesquels elles doiuent partir : mais au regard d'elles mesmes & collati nees les vnes aux autres : tellement que qu ad nous disons q  le chauld & le froid sont deux qualitez agentes, cela se doit entendre estant c p rees   la seicheresse &   l'humidit , les acti s

*Passage de
Aristote
mal enti -
du par
Launay.*

& effects desquelles ne sont si subites ne si vigoureuses. Mais ce n'est pas à dire qu'elles n'ayent action en leur espece, & principalement lors qu'elles agissent contre les corps composez. Ce passage d'Aristote se doit ainsi entendre, & ainsi l'ont entendu ceux, lesquels y ont mieux estudié q̃ vous. Toutefois à celle fin qu'il ne vous semble que j'en vueille estre creu tout seul, je vous allegueray ce que Gaspar Contaren, excellent philosophe de son temps, a dit touchant ce lieu. Quelques vns pensent, dit-il, que si en quelque corps il y a de l'humidité ioincte avecque la chaleur ou froidure, & que ce corps face action, l'action ne procedera de l'humidité : ains de la vertu de la froidure ou chaleur, entât qu'elle a l'humidité adioincte. Il sèble qu'Aristote le veuille dire au cōmencement du proëme du quatrième des Meteores, si seulement on considere les paroles. Et autant en veulent ils cōclure de la seicheresse : toutesfois cōme ainsi soit que la raison & le sens nous forcent de cōfesser, que s'il y a deux corps égaux en chaleur & froidure, l'un desquels soit plus humide que l'autre & de plus grande corpulence: il n'y a point de doubte que celuy des deux qui sera le plus sec sera rendu humide par le plus humide: car tout contraire agist en son cōtraire, toutesfois & quantes qu'il est le plus fort. Voila ce que dit Cōtaren, lequel declare amplement en tout ce liure, comme il faut
entendre

la sentence d'Aristote, & quand ores Contaren ne l'auroit escrit ainsi manifestemēt, si est ce qu'il se peut retirer du premier liure de Galen, des facultez naturelles, la où il dist que le chauld & le froid agissent d'avantage, és animants & és Plantes que ne fait pas la seiche- resse & l'humidité, mesmes selon la doctrine d'Hippocrate: mais si lon pense que telle cho- se soit en tous autres, non seulement Hippo- crate y contredira, mais aussi Aristote. Ainsi voyez vous que selon la doctrine d'Hippo- crate, Aristote & Galen la seicheresse & l'hu- midité ne sont despouillees de leur actiō: car encores qu'elle soit plus propre au chauld & au froid, si est-ce que toutes les qualitez ont la force d'agir & de patir. Et mesmes si nous faisons cōparaison entre le chauld & le froid nous pourrons dire à bon droit que le chauld est agent & le froid patient: Car comme di- sent les Philosophes, le chaud est comme la forme: le froid, le sec & l'humide sont com- me la matiere. Ainsi se doibuent entendre les passages d'Aristote, & ainsi les ont entendus tous ceux qui ont eu le iugement capable de raison. Mais vous, qui de vostre nature faites les experiences à tort & à trauers, auant que sçauoir comment elles se doiuent faire: vous faites aussi des liures, auant que d'entendre comme il les faut faire: aussi ne faites vous aucun pas qu'il n'y ait vne faulse démarche. Vous dites en la page seizieme, *Qu'il y a des*

Faute de Launay. venins, lesquels font leur action de loing & soudainement: comme est le Basilic & Casoblepas, lesquels par leur seul regard tuent l'homme, sans le toucher: & puis vous dites vn peu plus bas, *Que les autres font leur action en touchant seulement.* Voila vne grande doctrine: ou auez-vous appris qu'une chose puisse agir en vne autre sans la toucher, ou pour le moins sans luy communiquer son action? Si, comme vous escriuez vous mesmes, l'haleine du Basilic corrompt & putrefie l'air, lequel estat ainsi corrompu, se communique à l'homme, tant par la respiration qui se fait par le nez & la bouche, que par la transpiration qui se fait par tout le corps: il s'ensuit bien que le Basilic ne tue pas l'homme par son seul regard, mais en le touchant, comme on dit, mediatement ou immediatement. Nicandre, bien qu'il fust poëte, en cela n'a ensuyui les contes des vieilles: & a bien monstré comment mesme le Basilic estant mort, ne laisse pas de faire mourir aussi bien comme s'il viuoit & regardoit. Mais comment? en cōmuniquant la mauuaise senteur qui sort de sa charõgne: Il escrit dõques,

Nicandre aux Thèriaques. Le corps qu'il aura mords bruslant s'escauffera,
Et la chair d'iceluy noiraestre coulera:
Nul des oiseaux assis sur son corps ne prend vie,
Ou bien fust le corbeau qui croace à la pluye,
Le Milan ou l'autour, ny animal qui soit
Nommé dessus les monts, si vn coup il reçoit
La mauuaise senteur qui sort de sa charõgne:

*Que si la faim mauuaise en la fin les empoigne,
Les faisant sans penser repaiſtre de ce corps,
Sur l'heure & à l'inſtant ils trebucheront morts.*

Et certainement ceſte action qui ſe fait par vn moyen, ſe doit ſeulement entendre au regard de la premiere cauſe, & non au regard du corps qui eſt empoisonné : car le corps eſt empoisonné par attouchement reel & actuel du venin, tout ainſi comme en temps de peſte les fumées des charongnes ou cloaques infectent l'air : puis l'air pourri & enuenimé par ce moyen, infecte les corps. Autrement il faudroit mettre non ſeulement en ce rang des venins qui tuent ſans toucher, comme vous dites, le Baſilic & le Catoblepas qui tuent, cōme vous eſcriuez, par leur ſeule preſence : mais auſſi les corps non enterrez, les charongnes, les cloaques & autres telles choſes qui engédrent les peſtes. Notez donques, M. Lois, que tout venin tue en touchant non ſeulement, comme vous dites, mais auſſi en entrant & penetrant iuſques aux parties nobles du corps. Je ſçay bien que quelques vns ont eſcrit ce que vous dites touchât le Baſilic : mais regardez bien quād vous tranſcrirez vne autre fois les opiniōs d'autrui en vos liures : regardez bien d'en iuger au parauant & voir ſi elles ſont vraies. Je ſçay bié auſſi que vous n'eſtes pas ſeul qui faites telles fautes, & que pluſieurs eſcriuains pensent auoir fait beaucoup de trāſcripre en leurs liures les opiniōs

des anciẽs, afin que lon pẽse qu'ils ont beaucoup leu: mais ce n'est pas assez. Il faut que la principale piece du harnois, qui est le iugement, face preuue, deuant que passer oultre: principalement qu'ad il est question de faire demonstration. Ceste diuision donques que vous faites est manque & faulse: la prenant ainsi que vous la prenez. Et suffit de dire que tous venins tuent en touchant: mais les vns plus tost & les autres plus tard, selon leur substance deliee & subtile, ou grosse & tardieue. L'escume du chien enragẽ, la salieue de la Vipere & de l'Aspic empoisonnẽt mais nõ pas seulement en touchant: il faut qu'elles entrent dedans, tellement que si à l'heure on les essuye, elles ne feront aucun mal. Les praticiens l'ont escrit & l'experience nous l'enseigne. L'Aconite à sa malineté fort subite & tue les souris & les rats: mais non pas seulement en y touchant, ou par l'odeur, comme vous dites, mais en entrât dedás leurs corps.

*Les actions
d'aucuns
venins s'ont
plus soudaines que
celles des
autres.*

*Nicandre
aux cõtrepoissons.*

Nicandre vous le monstre, quand il escrit.

Il est dit Mort-aux-rats: car il oste la vie

A tous les rats friãs, qui d'en prendre ont enuie.

Le mot Grec, dont il a vsé, signifie autant comme qui mange petit à petit avecque friandise, & a dit ὕρρακος λαχμήρεας. Voila comment vous vous abusez souuent, & pechez, comme on dit, en la foy de vos parens. Il n'est que d'aller à la fontaine, & là puiser l'eau, ainsi que naturellement elle sort de la

source : & non pas aux ruisseaux, lesquels sont souuentefois troublez par ceux qui passent par dessus. Ne pensez pas iamais rien entendre en la matiere des venins, si vous n'auez leu & entendu Nicandre : & si vous ne l'auez collationné avecques Dioscoride, qui delà a transcrit la plus part de ses liures pour les enrichir.

Or encores que ces venins & poisons soyent tels que nous auons dit, a sçauoir contraires, & ennemis mortels de la nature humaine, si est ce que quelquesfois la malineté, ne se peut pas descouurir aisement, & sommes souuentefois trompez en l'vsage des choses que nous estimons estre bonnes.

Que tous poisons ne sont mauvais au goust.

Car iacoit qu'une grande partie d'iceux se puisse descouurir par le goust : si est-ce que ils ne sont tous de ceste nature, & est faulse la proposition que vous escriuez en la dix-neufieme page, quand vous dîtes : *Mais les venins nous sont tousiours fascheux, tant par le iugement de la langue, par lequel elle sent ou vne saueur qui est tout contraire a son goust naturel, qui est d'appeter & se delecter des choses douces.*

Faute de Launay.

Ceste proposition est premierement manquée, en ce qu'elle ne comprend pas la plus part des poisons artificiels, lesquels sont tellement meslangez, &, par maniere de dire, assaisonnez par l'empoisonneur, que le goust naturel y est trompé. Secondement elle est faulse de foy-mesme : car il y a des

venins naturels, lesquels ne sont abhorrens au goust de la langue. Quelle mauuaise faueur a le laiët nouuellement empresuré, lequel, comme escrit Nicandre, estant entré dedans l'estomach fait estoupher vn homme? Quelle mauuaise faueur auoit le Dorycnion, que le mesme Nicandre dit estre semblable en couleur & en faueur au laiët? Que direz-vous de l'Ephemeron Colchique, lequel, comme escrit Dioscoride, par la delicateffe de sa faueur alleiche ceux qui ne pensent pas que ce soit vn poison? Quelle mauuaise faueur à la Iusquiame, que mesme les petits enfans mangent, comme dit Nicandre, & y sont trompez? Si elle auoit la faueur mauuaise, ils n'auroyent garde de la prendre: car volontiers ils mangent ce qu'il leur semble bon au goust, sans aucune discretiõ, & fuyët ce qui leur semble contraire. Je pourrois icy m'aider d'vn exemple escrit par Vvier en son liure des impostures des diables, là où il parle d'vn petit enfant de Louuain, lequel s'empoisonna de soy-mesme en mangeant des petits grains de Morelle. Je pourrois alleguer plusieurs autres poisons, lesquelles tant s'en faut qu'ils soyent mauuais au goust, que mesmes ils n'ont ny faueur ny odeur, & ne laissent pas d'empoisonner. Mais il me semble que vous deuez croire à Nicandre, si ce n'est que vous l'estimiez vn faiseur de balades, pour autant qu'il a escrit en vers. Voila les

beaux fondemens que vous avez faits pour monſtrer apres que l'Antimoine n'eſt pas poiſon. Nous verrons combien durable en eſt le baſtiment. Je ſçay bien qu'ils ſont tels que vous le demandez, & que demeurants en leur force, vous pourrez auoir vne partie de voſtre intention accomplie. Entrons maintenant au faiſt.

J'ay en mon Diſcours propoſé deux ſortes d'Antimoine, l'vne qui eſt l'Antimoine crud, l'autre l'Antimoine préparé. J'ay voulu monſtrer que l'un & l'autre eſt poiſon, & ay commencé par le crud, à celle fin que par la cognoiſſance de l'un nous euſſions plus facile accès à l'autre. Ayant donques ſuppoſé, comme cy deuant, que tout corps exceſſif en chaleur, froidure, humidité ou ſeicheſſe eſt poiſon, j'ay fait vn tel argument : Si la Mandragore eſt venin pourautant qu'elle eſt froide au troiſieme degre (j'ay dit troiſieme, & non quatrieme, comme calomnieuſement vous avez eſcrit) à plus forte raiſon l'Antimoine crud le fera, puis qu'il l'eſt au quatrieme. Et s'il eſt ainſi q̃ les ſimples ſont plus dangereux, d'autant qu'ils ont plus de cauſes de danger : certainement ceſtuy-cy ſera mis des premiers au rang, comme eſtant froid & ſec, qui ſont deux qualitez diametralement oppoſées à la chaleur & humidité naturelle. Voila ce que j'ay eſcrit de l'Anti-

*Sommaire
du I. diſ-
cours.*

*Calomnie
de Lau-
nay.*

Faulce re- moine crud. Et vous en vostre page vingtie-
prehension me apres que vous auez proposé de parler
faicte par premierement du crud, & me monstrier qu'il
Launay. n'est pas froid au quatrieme degré, & par
 consequent non poison : vous dites inconti-
 nent apres, comme ne vous souuenant plus
 de ce que vous venez de proposer, & ayant
 la memoire de conuil, ou pluystost d'un asne:
 vous dites, dy-ie, *Que quand ores ainsi seroit que*
l'Antimoine fust froid au quatrieme degré, il ne
seroit toutesfois deletere ou mortel, pour en bailler
trois ou quatre grains. Je parle en mon Dis-
 cours premierement de l'Antimoine crud:
 vous proposez en parler aussi, & toutesfois
 huit ou dix lignes plus bas, vous laissez ce
 droit chemin, & dites que vous n'en baillez
 que trois ou quatre grains. C'est donques vo⁹
 qui confondez le crud avecques le préparé,
 & non moy. C'est vous qui calomniez, & non
 moy. Ce que vous n'eussiez fait, si tournant
 le fueillet trezieme de mon Discours, vous
 eussiez leu & entendu ce qui s'ensuit : à sça-
 uoir, Je sçay bien que tels venins n'agissent
 point sinon en quantité: toutesfois cela n'em-
 peschera pas que l'Antimoine, ie dy celuy qui
 est crud, ne soit pour le moins du nombre de
 ceux cy. Vous voyez par là que ie ne parle
 seulement que du crud, lequel derechef ie de-
 note nommément, encores que tout le propos
 y doie estre rapporté. M. asne releuez vous.
 i'auoy osté expressément ceste pierre de vostre

voye, & toutesfois vous n'avez pas laissé de tōber en beau chemin. Tout ce q̄ vous iazez en la page suyuāte, qui est la 21. est autāt à propos comme Magnificat à matines: & toutesfois vous ne laissez pas d'y descouvrir vostre bestise. Vous dites premieremēt. *Que ie vous accuse de bailler de l'Antimoine non preparé: & ie dis, qu'il n'en est rien, & ne s'en trouuera rien en mon Discours: & que par consequent vous estes vous mesmes vn calōniateur. Je croy que vous pensez que ceux qui lisent voz liures n'auront point d'yeux pour regarder les miens: ou bien que vous deuez estre creu par vostre simple serment. Vostre bestise est quand vous dites, Que vous sçauēz bien que le sublimé est poison de soy, quelque part qu'il soit mis, soit par le dehors, soit par le dedans: & fera son action de brusler: mais nō pas de tuer: comme voyons ordinairement quand il est appliqué par le dehors, qu'il ne tue pas: mais il brusle biē la partie ou il est appliqué. Ce sont voz propres mots, par lesquels vous mōstrez biē qui vous estes: & cōment vous estes vn grād* *Calomnie de Launay*

Faute de Launay. *Que les venins appliquēz exterieure ment ex-bruslure qu'il fait tant interieuremēt qu'ex-cutēt leur terieuremēt ne procede-elle pas de sa vertu malice se caustique & venimeuse, par laquelle il tue? ils ne sont corrigez.*

Si son action exterieure n'est si subtile que celle de dedans, ce n'est pas à dire qu'avecque le temps il ne face mourir, encores qu'il ne soit appliqué qu'exterieurement: c'est asçauoir lors qu'il aura penetré iusques aux veines, arteres & nerfs. Je sçay bien que Galen escrit que plusieurs venins sont fort commodes és applications exterieures: mais cela s'entend principallemēt de ceux, lesquels agissent par qualitez, lors que lon les applique pour corriger les maladies cōtraires: & lors qu'ils sont preparez avecque les autres, comme il escrit de la liqueur du Pauot, au liure de la Theriaque. Toutesfois il n'y a point de doubte que s'ils estoient autrement appliquez, ils ne laisseroyent de mettre leur malice en execution: les froids en refroidissant tellement, qu'une mortificatiō en ensuyuroit, les chaulds en eschauffant tellement, que la chaleur naturelle seroit contrainte faire place à l'exterieure sa contraire. Autant en feroit l'Antimoine froid, exterieurement appliqué en quantité suffisante & sans estre meslangé avecque ses correctifs. Voila donques comment les venins que vous nōmez terrestres & minéraux, peuuent estre nommez poisons estans appliqués par le denors, voire pour faire mourir: tellement qu'encores que vous ne baillez pas l'Antimoine crud par la bouche, si est-ce que il ne laisse d'estre poison, comme le sublimé: & ne faut point que vous vous forgiez respō

se sur ce que vous dites qu'ils ne tuent pas par dehors, comme ils feroient par dedans : car & l'une & l'autre action est semblable, & different seulement en ce que l'une est plustost mise en execution q̄ n'est pas l'autre. Je vous donne ce mot d'aduertissement en passant, pourautant que par vostre liure vous me l'avez laissé à penser: Et ie vous en dis ce q̄ i'en pense. La soudaineté ou tardiueté de l'action ne change point l'essence & nature d'icelle: car c'est vn accident qui procede de la resistance ou moindre ou plus forte de celuy qui patist: & de la plus grande ou moindre distance du lieu auquel il doit paruenir.

Vous trouuez, dites vous en ceste mesme page, deux grâdes cōtrarietez en ce que i'ay dit, que l'Antimoine crud est froid au quatrieme degré, & sec au troisieme: & apres froid & humide ou aqueux pres du quatrieme degré comme le plomb. Si vous eussiez vŕé seulement des mots desquels i'ay vŕé, & que vous les eussiez bien entendus, telle contrarieté ne fust entree en vostre teste : car i'ay dit seulement froid & aqueux, & non humide : ie l'ay *Difference* entre a-
repeté par deux fois en deux lignes. Mais vous *queux &*
qui ne veistes oncques vostre philosophie *humide.*
naturelle qu'é l'air, & qui n'entendez les mots, & encores moins leur signification, vous en avez incontinent donné iugement à la volée. Apprenez le doncques. Ce mot, aqueux, ne signifie pas qualité, mais substâce, & le mot,

humide, signifie seulement qualité: tellement que quand i'ay dit que l'Antimoine estoit froid & aqueux, i'ay mōstré par là que la froidure procedoit de la partie aqueuse. cōtenue en l'Antimoine, ce q̄, i'auois dit trois ou quatre lignes plus haut, en ces mots: toutes lesquelles (a sçauoir actions de l'Antimoine) ne peuuent reussir que d'vne grande froidure & seicheresse qui procedent de la nature terrestre & aqueuse. Si vous voulez bien entēdre ce poinct, il faut que vous sachiez premiere-ment que chasque element a deux qualitez simples. Le feu a la chaleur & la seicheresse: l'air l'humidité & la chaleur: l'eau la froidure & l'humidité: la terre la seicheresse & la froidure. tellement que quād nous disons qu'vn corps composé de ces quatre elements, comme est l'Antimoine, est froid, ou chauld, ou sec, ou humide, & que nous auons enuie d'en sçauoir exactement la nature, il faut dire & donner à entēdre si ceste froidure est aqueuse ou terrestre. Car & l'eau & la terre sont froids, comme i'ay dit: si la chaleur est aërienne ou ignee: & ainsi des autres. Voyez doncques, gentil philosophe, que ce n'est pas chose contraire d'auoir dit froid & sec, & froid & aqueux: & apprenez si vous le pouuez, que aqueux & humide sont deux. Mais i'ay grād peur que ie ne perde la lexiue & ma peine à lauer la teste d'vn asne. Je dis doncques que l'Antimoine crud est froid & sec, & que sa

*Qualitez
des ele-
ments.*

*Dont pro-
ced la froi-
dure en
l'Anti-
moine
crud.*

froidure procede de la substance aqueuse, qui est en la composition de son corps: tout ainsi cōme la seicheresse procede des terrestres. Cela se fut ainsi entēdu si vous eussiez regardé de pres qu'en le nommant froid & aqueux au cōmencement de mon 10. fueillet, c'estoit pour dōner la raison pourquoy il n'auoit aucune qualité apparoiſſante au gouſt, comme j'auois dit en la fin de la page precedente: car l'humidité aqueuse differe d'auec l'aërienne, en ce que ceste cy est sauoureuse, & l'autre est insipide. Ces coups de foet sont vn peu rudes, & à peine vous les baillerois-le, si ce n'estoit que ie ſçay que lignorance vous a rendu la peau du iugement si espaisse & dure, qu'à peine les pourrez vous sentir, si ce n'est que vous retourniez au fondement de la medecine. Car il n'est pas que vous n'ayez autre fois entendu dire, que le medecin commence son bastiment là où le philosophe naturel acheue le sien. Regardons maintenant que pourront deuenir toutes les consequences que vous faites sur ce mot mal entendu. En la page suyuant qui est la 22. vous faites rage de donner ruades: & toutes fois vous ne blessez personne. *Nul authenr, dites vous, n'a nommé l'Antimoine humide, cōme moy, ou aqueux. vne pierre metalique & friable estre aqueuse! Mais vn corps dur & pesant qui a esté congelé par vne froidure en la terre d'vne exhalation seiche, peut-il estre humide au quatrieme degré? Regardez Ari-*

*Differēce
entre l'hu-
midité a-
queuse &
aërienne.*

stote au quatrieme des Meteores, qui dit que les corps qui sont desfeichez ou endurcis par le froid, ont en eux de l'eau & de la terre, mais beaucoup plus de terre que d'eau. Voila vostre texte. C'est bien maintenant, maistre Asne, q̃ vous serez frotté soubz le ventre & par tout.

Quel' Antimoine est aqueux.

Premierement cōtre vostre premiere proposition & admiration que vous en faites, ie employe ce que Galen a escrit au chapitre du plomb, au mesme liure des simples, là où vous lāt prouuer que le plōb est humide & froid, il escrit en ceste façon: Le plomb a la faculté & vertu de refroidir: car il n'a seulement beaucoup de substance humide, gelee & amassée par le froid, mais aussi il a de l'aëree, & est biē peu participant de la terrestre, &c. Allegez donques maintenāt contre Galen ce que vous avez allegué cōtre moy, & dites: *Mais un corps dur & pesant qui a esté congelé par une froidure en la terre, peut-il estre humide au quatrieme degré?* Galen, auez vous leu vostre Aristote, qui dit, *Que les corps qui sont endurcis, ou desfeichez par le froid, ont en eux de l'eau & de la terre, mais beaucoup plus de terre que d'eau?* C'est donques, à Galen à qui vous auez affaire: car il a dit qu'au plomb il y a beaucoup de substance humide, gelee & amassée par le froid: & bien peu de la terrestre, comme, aussi vous alleguez en la fin de ceste mesme page. Galen auoit leu Aristote mieux que vous, & toutesfois il n'a point fait de doute de dire que

le plôb (lequel s'endurcit par le froid) a beaucoup de parties aqueuses, & peu de terrestres. Dont vient cela? C'est que tout ainsi qu'il l'a mieux leu que vous: aussi la- il mieux entendu. Aristote aussi ne parle pas de la façon que vous escriuez: autrement il seroit contraire à soy-mesme, cômè ie diray tantost. Mais pour entendre les passages d'Aristote touchant les endurcissements des corps, il faut sçauoir que les corps s'endurcissent par la froidure en deux manieres. La premiere est par vne froidure non naturelle & exterieure: L'autre par vne froidure naturelle & interieure. La glace, la neige, & la gresle se gelent & endurcissent par vne froidure exterieure: mais les metaux se gelent & endurcissent par vne froidure interieure. Quand la glace, la neige, & les gresles sont fondues, elles ne se regelent point, si ce n'est que de rechef il face froid: mais les metaux estâs fondus par la vertu du feu n'ont que faire qu'il gele pour s'endurcir de rechef: car ils cachent en eux la froidure qui leur est naturelle, laquelle les fait endurcir. Il faut encore sçauoir que le froid gele & endurcit les choses ou de soy-mesme, ou par accidēt. De soy-mesme quand il deseiche estant ioinct avecque la seicheresse, ou en amassant en vn les parties aqueuses, & cômè les contraignant de se ferrer parmi les terrestres, par lesquelles elles sont d'auantage endurcies & retenues, & en deuiennent plus massiues. Mais il

le fait par accident, ou lors qu'il esprin& les parties chauldes & plus subtiles meslees dedans l'humidité, avec lesquelles aussi ceste humidité entrelassee s'esuanouit: ou lors qu'il empesche que la chaleur ne sorte d'un corps si bien que cependant l'humidité est consumée par icelle. Or est il maintenant facile à Galen de se defendre cōtre vous: car il vous dira premierement qu'encores qu'Aristote eust ainsi parlé (ce qu'il n'a fait) si est-ce qu'il entendoit seulement des corps qui sont gelés par la froidure extérieure, comme est la bouë, que luy-mesme a mis pour exemple au sixieme chapitre du 4. des Meteores, où il sēble vouloir dire ce que vous alleguez, & qui est le passage qui vous a trompé, comme vous monstrez apres en vostre page 40. & nō pas l'interieure, laquelle seule est aux metaux. Et qu'il ne soit ainsi, il oppose incontinent apres aux premiers corps, lesquels ont plus de terre que d'eau, ceux lesquels s'endurcissent par un refroidissement naturel & par un euanouissement de toute la chaleur: & lesquels ne se peuvent fondre derechef que par une superabondante chaleur, encores qu'ils s'amollissent cōme le fer & la corne. Voyez doncques comment Aristote fait une oppositiō de ces deux, & vous monstre à l'œil que le premier passage s'entend des corps, lesquels s'endurcissent par la froidure extérieure, & non pas encōres de tous: ains seulement de ceux qui ont plus

*Aristote
mal entē-
du par
Launay.*

plus de terre que d'eau, comme la bouë. Car c'est vne proposition faulſe, & auez par voſtre ignorance impoſé à Ariſtote, quand vous auez dit, qu'il a eſcrit que les corps qui ſont deſeichez ou endurcis par le froid ont en eux de l'eau & de la terre, mais beaucoup plus de terre que d'eau. Luy meſme a eſcrit en c'eſt endroit, que toutes choſes qui ſ'endurciſſent, ont ou la nature d'eau: ou bien la nature de la terre & d'eau enſemble: & ont accouſtumé de ſ'endurcir ou par le froid, ou par la chaleur ſeiche. Le texte d'Ariſtote eſt tel: Si les choſes endurcies & amasſees par le foid, leſquelles appartiennent en commun à la terre, & à l'eau, mais ont d'auantage de terre: ſont endurcies d'autant que la chaleur en eſt ſortie, elles ſe fondront par la chaleur, lors que de rechef elle y entrera: cōme la bouë ayant eſté endurcie par le froid. Mais les choſes qui ont eſté endurcies, par vn refroidiſſement & retirement vniuerſel de la chaleur, ne ſe fondent point ſinon par vne grande abondance de chaleur: bien eſt-il vray qu'elles ſ'amoliffent, comme le fer & la corne. Et pour l'explication de ce paſſage, en ce qui cōcerne les metaux, ie vous oppoſe ce qu'a eſcrit Lacinius au chapitre des principes des metaux: Il faut, dit. il, prendre garde diligemment que toutes choſes qui ſont gelees & endurcies par le froid, ont vne grande abondance d'humidité aqueuſe pour leur premiere matiere,

comme il est escrit au quatrieme des Meteo-
res, & tels sont les metaux & leurs semblables.

Ces passages-cy n'estoyét-ils pas suffisans
pour vous faire penser le contraire de ceste
proposition, faulſe en ſoy-mefme, & calom-
nieuſe contre Ariſtote? Voyez-vos pas dere-
chef qu'il fait difference entre ces deux, à ſça-
voir eſtre de la nature d'eau, & eſtre de la na-
ture d'eau & terre enſemble? La glace: la nei-
ge, & la greſſe ſ'endurciſſent par le froid: &
toutesfois ie croy qu'il n'y a celuy tant hebe-
té & lourd de iugement qui vouluſt dire qu'il
y euſt en icelles plus de terre que d'eau. Elles
ſont de nature d'eau, & la bouë eſt de la natu-
re d'eau & de terre, laquelle ſ'endurcit par
le froid, agiſſant par accident: à ſçavoir en
eſpraignant la chaleur & les parties plus ſub-
tiles. Ce ne ſera donques pas ſan raiſon ſi ie
vous dy que vous-mefmes ne ſçauiez diſcer-
ner entre vne pomme & vn oignon, & que
tel inconuenient vous eſt aduenü, faulte d'a-
uoir entendu les principes naturels & les na-
turelles ſignifications des mots: en quoy cer-
tes vous monſtrez cōbien vous eſtez ignorāt,

*Launay
ignorant
es princi-
pes de la
nature.*

*Queſt An
timoine
crud eſt
froid pres
du 4. de-
gré & ſec
au 3.*

encores q̄ vous vous facies appeller maiſtre.
Paſſons donques outre, & parlons de la
complexion naturelle de l'Antimoine crud.
I'ay dit en mon diſcours qu'il eſt froid pres
du quatrieme degré, & ſec au troiſieme. I'ay
dict q̄ ceste froidure procedoit de ſa nature
aqueuſe: & que la ſeicheſſe procedoit de la

terrestre. La preuue que i'en fay est tiree tant de ses facultez (car il restraint, il estoupe & empesche la croissiance de la chair, estant appliqué dessus les vlceres & playes) comme aussi de la nature generale de tous les metaux. Et pouratant que ceste nature est vn chemin pour paruenir aux facultez, ie la prouueray premierement, puis ie viendray aux facultez. I'ay escrit au dixieme fueillet de mon Discours que la nature des metaux procedoit de l'eau, & de la terre principalement, non que les autres elements n'y ayent leur part: terre, dy-ie, & eau tellement meslees, que la partie aqueuse maistrise la terrestre, laquelle y est proportionnee en telle maniere, qu'elle obscurcist en partie la clarté d'icelle, sans toutesfois luy oster sa lueur. Ceste proposition est vraye : & est celle que ie dy auoir esté arrestee par ceux qui sont venus depuis Auienne & Albert : voire depuis Platon & Aristote, lesquels ne l'ont ainsi apertement expliquée, encores qu'ils fussent de ceste opiniõ. Et d'autant que vous dites qu'elle est faulse, en la fin de vostre trenteneufieme page : & allegnez au contraire Aristote par le passage mal entendu, comme i'ay monsté: i'allegueray l'autheur, dont ie l'ay prise, lequel en ceste matiere est vn peu plus croyable que vous n'estes. C'est George Agricola : George Agricola, dy-ie, qui toute sa vie s'est addonné à l'intelligence des metaux, & lequel com-

De la nature de tous les metaux

me bien il a monsté, entendoit mieux Aristote que vous ne feistes onques. Il escrit donques au cinquieme liure de la naissance & des causes des mineraux, Maintenant, dit-il, que nous auons refuté les opinions des autres, il nous faut expliquer à la parfin que c'est ce, dont les metaux sont engendrez. Or est-ce vn grand argument qu'en leur matiere il y a de l'eau, puis que par la chaleur du feu ils coulent, & que par la froidure de l'air ou de l'eau ils s'endurcissent de rechef. Mais il faut entendre cecy en ceste façon : à sçauoir qu'en iceux il y a d'auantage d'eau & moins de terre. Car l'eau simple n'est pas leur matiere, mais meslee avecques la terre : & encores il y a telle proportion de terre en ceste meslange, que la terre obscurcist la clarté de l'eau, sans toutesfois luy oster sa lueur. Voila dont i'ay pris ceste proposicion, transcripée par Matthioli en son cinquieme commentaire sur Dioscoride : & repetée par Pontus de Thiard en son liure entitré l'Vinuers, laquelle toutesfois vous dites n'auoir iamais veüe ne leuë, (ce que ie croy). Et laquelle certainement est beaucoup plus entendible que n'est pas celle de ceux qui ont dit qu'ils estoient faits de vis-argent & de soulfre : que le soulfre estoit le pere, & l'argent-vif la mere : & que tout ainsi que le pere donne la semence, dont est fait l'enfant, & la mere la matiere dont il est nourri : ainsi le soulfre

phre donne comme la semence, & le vis-argent la nourriture, Vous dites en vostre page trente-huitieme, que ie m'en suis moqué : & comme si Auicenne vous auoit baillé charge de le defendre, vous faites vn argument contre moy, lequel monstre bien à sa contenance estre venu de vostre forge. I'ay dit en mon Discours fueillet dixieme, que les Alchemistes & Auicene s'estoyent phantastiquez vn pere & vne mere pour les metaux. Autre chose n'en ay- ie dit, & si ie ne suis seul qui l'ay dit: Pontus de Thiard en parle comme il s'en ensuit : Les Alchemistes voilent en enigme ie ne sçay quelles opinions, feignans à leur mode vn soulfhre pere, & vn vis-argent mere conioincts en la generation des metaux parfaicts, ou imparfaicts, selon la quantité & qualité de ces deux imaginaires parens assemblez. Vous dites que ie m'en suis moqué, & ie vous respons derechef que ie ne suis le premier. Lisez le cinquieme li-
*Que les me-
taux ne
sont point
faicts de
vis-argēt
& de soulf-
phre.*
 ure de l'Origine & cause des choses conteneues en la terre, & vous verrez ce qu'Agri-
 cola en dit : au non duquel ie veux respon-
 dre aux arguments que vous faites pour la
 defense des Alchemistes. Premièrement, &
 oultre toutes les raisons alleguees par Agri-
 cola, lesquelles ie ne veux repeter, la cōpa-
 raison que vous faites apres eux, touchant
 la semence du pere, laquelle donne la forme,
 & le sang menstrual des femmes, lequel don-

ne la nourriture : ceste comparaison, dy-ie, est du tout impertinente & inegalle : car la generation des metaux, est generation d'un corps sans vie : & celle de l'homme est generation d'un corps viuant : ceste-cy se fait par accroissance des trois dimëfions en longueur, largeur, & profondeur, par la vertu de l'esprit viuant. Mais l'autre se fait seulement par adioinctiõ de parties, lesquelles s'amassent les vnes sur les autres : comme l'on void aux carrieres entre les pierres, les vnes grosses, & les autres encores petites, les vnes assez dures, & les autres encores molasses, & lesquelles on peut aisement discerner les bancs attachez les vns sur les autres. Secondement l'argument que vous faites ne vaut rien, & conclud contre vous. Vous dites : *Tous corps naturels se resoluent en la fin en la matiere de laquelle ils ont esté faicts : tous metaux se resoluent en argent vis, & en soulfhre. Ergo tous metaux sont premierement faits d'argent-vis & de soulfhre par transmutation des premieres qualitez elementaires.* Il est facile de voir par là que vous estes mauuais Logicien : car vostre mineur proposition ou assumption comprend moins que ne fait vostre maieur, laquelle en soy est vraye. Et tout ainsi comme vous auez dit

que tous corps naturels se resoluent en la fin en la matiere de laquelle ils ont esté faicts: Ainsi deuiendrez vous reprendre en vostre mineur, Que tous metaux se resoluent en la fin en argent vis, &

Launay
ignorant
en Logique

soulphre : Ce qui est faux. Car tous corps naturels se resoluent en la fin (notez ces mots, en la fin) en terre, en eau, en air & en feu, qui sont la matiere de laquelle ils ont esté premierement faits. Je dy donques contre vous. Tous corps naturels ont esté premierement faits de la matiere en laquelle ils se resoluent en la fin: Tous corps naturels se resoluent en la fin aux quatre elements: Tous corps naturels donques ont esté premierement faits des quatre elements. Puis ie retire ceste consequence qui suit: Or est-il ainsi, que tous les metaux sont corps naturels: il s'ensuit donques que tous les metaux ont esté faits premierement des quatre premiers elements. Mais les quatre premiers elements ne sont ny *soulphre*, ny *argent-vif*: Il est donques vray que tous les metaux ne sont pas faits premierement de *soulphre* & d'*argent-vif*, & consecutiuellement ne retournent pas en la fin en *argēt-vif* & en *soulphre*. Voyez donques maintenant comment vous m'avez baillé le fouet en la main duquel vous estes fouetté. Vous dites encores en la mesme page 38. que ce *soulphre* & *argent-vif* ne sont point semblables à ceux qui se vendent chez les apoticairez, & en la fin de la page vous dites auoir veu l'or reduit en son *argent vif*. Je vous demande si cest *argent-vif* n'est semblable à nostre vulgaire, comment avez vous recognu celuy qui estoit tiré de

l'or? Je ne ſçay pas comment il eſt poſſible de accorder cecy: de ma part ie ne le trouue pas facile. Toutesfois il ya biẽ vn poinct duquel ie vous veux aduertir: c'eſt qu'encores que vous euſſiez veu du viſ-argent tiré de l'or: ſi ne ſ'enſuit-il pas pourtāt que l'or en euſt eſté fait premieremēt: Car le viſ-argent n'eſt pas la fin de la reſolution de l'or. Et eſt vray ſemblable que ſi lon mettoit ce viſ-argent encores ſur le feu, il ſe reſouldroit en quelque autre choſe plus ſimple. Ainſi ie ne vous puis accorder voſtre argumēt, ſi vo⁹ ne le raccouſtrez cōme il appartient: & quāt vo⁹ l'aurez aĩſi fait, ce ſera à vo⁹ à prouuer q̄ tous les metaux ſe reſoluent en la fin en argent viſ. Car il ne ſuffira q̄ vous diſiez ſeulement q̄lle eſt vraye. Toutesfois ie ſuis d'aduis que deuant que venir là, que vous appreniez voſtre logique, tant pour apprēdre à ne repeter ſouuentesfois vne meſme choſe: cōme pour ſçauoir le moyen de bien argumenter & raiſonner des choſes que vous entreprendrez eſcrire. Ne penſés pas toutesfois que ie vueille dire que les metaux ne puiſſent eſtre diſſoluds en vne ſubſtāce coulāte pareille à celle de l'argēt viſ: car ie ne trouue point d'incōuenient qu'il ne ſe face, & ſçay bien qu'il ſe fait: mais ie vous nie que ceſte ſubſtance ſoit celle en laquelle ils ſe reſoluēt en la fin. Meſmes de ceſte ſubſtance coulante & ſemblable à argent-viſ il ſ'en fait vne eau. Ce qui vous deuoit plus toſt

esmouuoir à penser que les metaux sont faits d'eau plustost que d'argent vif. Ceste vostre opinion est reprouuee, non seulement par Agricola: mais aussi par Matthioli. Et Falopius s'en moque & refute toutes les raisons des alchemistes, & dit: Si dōques les metaux estoient faits d'argent-vif & de soulfhre, il s'ensuyuroit qu'ils pourroyent estre resoulds en soulfhre & argent vif: mais il ne se trouua onques personne, lequel feit du soulfhre & de l'argēt vif de cuiure, ou d'autre metal. Et quant à moy, i'ay esté quelque fois present qu'un alchemiste s'effayoit de ce faire à mes despens, & toutesfois ie ne vis iamais autre chose que des fumees, vapeurs & quelques liqueurs: tellement que mes escus s'en allerent en fumee, & en vne sepmaine i'ay despēdu septāte escus d'or: dōt ie m'en repēs encores. Parquoy cōcluons par vn principe veritable & comme par l'euangile des alchemistes, que l'argēt-vif & le soulfhre ne peuuent estre la matiere des metaux: car comme ainsi soit qu'ils tiennent pour certain q̄ tous composez peuuent estre dissoulds en ce qui les compose: il s'ensuyuroit quant-&-quant que de tous metaux (excepté l'or, car il ne se dissout point) l'argent-vif & le soulfhre pourroyēt estre faits, toutesfois nous voyōs que cela est tresfaux. L'opinion donques des alchemistes est friuole: & les arguments mesmes qui prouuent que l'argēt vif n'est la ma-

tière des métaux, donnent mesme conclusiõ du soulfhre. Mais notez que les alchemistes voulans persister en tout & par tout en leur opinion, ont recours à quelques myſteres, tout ainſi comme certainement leur opiniõ m'a ſemblé myſtique, quand ils diſent que l'argent-vif & le ſoulfhre ſont bien la matiere des metaux: mais qu'ils n'entendent pas ce ſoulfhre commun ou vulgaire, ny ceſt argët-vif commun: ains d'vn argent-vif & ſoulfhre philoſophique, lequel eſt diſſemblable au commun. Voila leur dernier refuge. Voyez maintenant par ce texte de Falopius ſi ie ſuis tout ſeul qui me ſuis moqué de ceſte opiniõ phantaſtique, & ſi c'eſt à bonne ou mauuaife raiſon q' i'ay enſuiuy ces auteurs beaucoup plus croyables q' vo^r n'eſtes pas. Meſme Falopius a paſſé plus oultre & a eſcrit que l'alchemie commença du temps de la ſecte Mahumetique, & que tout ainſi que la ſecte eſt trèſ mauuaife & contient pluſieurs folies, il ne ſe faut auſſi eſmerueiller ſi les alchemiſtes ont eſté fols en pluſieurs choſes. La nature de to^r

Que tous metaux ſont froids metaux eſtant telle, il n'y a point de doute qu'ils ne ſoyent froids, cõme eſtans aqueux, toutesſois les vns plus que les autres: la cauſe de leur endurciſſement le monſtre encores d'auantage: car ceſte conſequence eſt vraye & ne la pouuez nier: Les metaux s'endurciſſent & ſe gelent par le froid: les metaux doncques ſont froids. Si ceſt endurciſſemēt ſe fai-

soit par vn froid exterieur, vous eussiez eu quelque raison de la nier & vous en moquer: mais se faisant par l'interieur, comme nous auons dit, & comme Contaren l'explique, il ny a point de doubte que la consequence ne soit plus que necessaire. Or les metaux ayans en eux vn froid naturel suffisant pour les faire geler & endurcir, ne sont seulement froids: mais tresfroids, comme i'ay dit. Aussi Contaren les nomme tresfroids. Et tout ainsi comme ils sont desassemblez & fondus par le feu, qui est chauld extremement: aussi faut-il qu'il y ait vne froidure grâde qui les rassemble. Mais peuuent-ils estre autres veu qu'ils sont principalement faits d'eau & de terre? Vous dites au cōtraire qu'ils s'estendēt sous le marteau, & que pour ceste cause ils ne participent de l'humidité aqueuse: vous amenez Aristote pour tesmoing en vostre page 39. & 40. & luy faictes accroire qu'il a escript que ce qui s'amolit sous le marteau n'est participant d'humidité aqueuse. Je vous dis derechef, que vous l'avez mal leu, & qu'Aristote ne l'a point dit, & moins l'a voulu entendre. Au contraire Contaren qui l'a fort bien expliqué, selon le iugement des plus doctes de nostre temps: escript ainsi parlât des corps qui se peuuent amolir & estendre sous le marteau: Pour ceste mesme raison & cause il ya des corps qui s'estendent sous le marteau, cōme le plomb, le fer, & plusieurs autres me-

*Lannay
impose a
Aristote.*

taux: il y en a aussi qui ne s'estendent point. Cela procede de l'humidité aqueuse, enduree toutesfois par la froidure interieure, dedans laquelle il ya vne chose gluante: mais ceux qui sont terrestres, ou aqueux seulement & n'ont point ceste chose gluante, ne se peuvent estendre. Vous voyez doncques par là que l'humidité aqueuse n'empesche pas que les metaux ne s'estendent sous le marteau, pourueu qu'ilz ayent celle chose gluante, & q par consequent vous auez tiré le nez à Aristote, & luy voulez faire accroire qu'il a escrit vne chose à laquelle il ne pensa iamais. George Agricola voulant donner la raison pour laquelle les metaux s'estendent sous le marteau, dit que l'humeur en est cause. puis apres donnant encôres la raison pour laquelle quelques uns ne s'estendent si facilement, il dit, Ou q c'est a raison de leur humeur trop espais & impur: ou bien à cause d'une non assez ferme & asseuree meslange de l'eau avec la terre, côme sont les especes de plomb & l'estain. A bon droit doncques ie vous renuoyeray la faulx monnoye de laquelle vous m'auiez voulu payer en ceste page 40. & diray: Vous meritez d'estre appellé du tout ignorant de tel sçauoir, qui est de cognoistre la nature des metaux & de ne entendre vostre Aristote, qui est le fondement de nostre medecine. Mais poursuivons: puis que ceste froidure vient principalement de la substance aqueuse, il s'ensuyura que les

metaux qui auront plus de ceste substance, seront les plus froids: comme sont les especes de plomb, les vnes plus & les autres moins. Ainsi tout ce que vous dites, & auez appuyé sur ces fondemens de peu de duree, est du tout impertinent, & ne pouuez si bien conduire voz pas, que vous ne vous entretaillez: comme quand vous dites en la 28. page, *Que le plantain broyé en vn mortier de plomb, & par vn pillon de plomb, ne pourroit estre bon medicament pour les vlcères rebelles, s'il estoit ainsi q le plomb fut froid pres du quatrieme degré.* Car, ce dites vous, le ius de plantain froid au second degré, combien recuera-il de frigidité s'il est meslé avecque le plomb? Mais ou auez vous leu que broyer du plantain en du plomb, soit mesler du ius de plantain avec du plomb? Je sçay bien qu'il s'y fait quelque cōmunication, mais ie vous nie qu'il y ait meslange telle que doit estre la meslange des medicaments, laquelle se fait par toutes les substances des choses meslees & non seulement des vertus. Aussi Galen dit au lieu que vous alleguez, que toute chose pillee dedans le mortier de plomb en deuiet plus froide qu'elle n'estoit: dont ie fais ma consequence en ceste façon: Ce qui a puissance de rendre vne chose plus froide qu'elle n'estoit au parauant, est plus froid q la chose qui par luy est plus refroidie: Le mortier de plomb a la puissance de rendre plus froide la lōbarbe que les Latins nomment *Semperuiuum*, cōme

vous dites en vostre page 27. Il s'ensuit donques que le mortier de plomb est plus froid que la lombarbe. La maieur de cest argumēt est appuyee dessus le fondemēt de phisique, que toute action se fait par le plus fort, & que ce qui patist est inferieur : car les choses de vertus egalles n'ont point de puissance les vnes contre les autres. Or est-il ainsi que la lombarbe est froide au troisieme degre, comme escrit Galen aux liures des simples: Et Oribase au chapitre qu'il a fait des choses qui refroidissent au troisieme degre, liure 14. Il s'ensuit donques que le plomb dōt est fait le mortier, surpasse le troisieme degre en froidure. Voyez maintenant que vous pourrez faire pour soustenir ces quatre ou cinq pages de vostre liure, lesquelles vous avez appuyees sur ce fondement. Aussi est impertinente la demande que vous faites: asçauoir si ie le fay froid au regard de l'homme, ou bien au regard des autres metaux: Car quand nous determinons de la qualite des medicaments, nous auons tousiours esgard à l'homme, qui est le subiect sur lequel nous les appliquons, ainsi comme i'ay mōstré en mon Discours: tellement que quand i'ay dit qu'il est froid presdu quatrieme degre, c'est autant à dire comme si ie disois qu'il surpasse l'homme en froidure pres de quatre degrez. Ceste froidure de plōb est apparente & actuelle, & tousiours refroidit quelque part qu'il soit appliqué: si ce n'est

qu'il soit empesché par la chaleur de la partie sur laquelle on l'a posé, ou par quelque autre moyen. Car tout ainsi qu'il tépere ceste chaleur agissant contre elle: ainsi est-il temperé par ceste chaleur qui n'est otieuse & cōpatie en agissant. Ainsi les Athlettes ou luicteurs auoyent accoustumé d'en mettre vne platine sur leurs reins contre les pollutions nocturnes: car aussi, comme dit notamment le mesme Galen, il les refroidit fort, pour ceste cause il est fort retrainctif, & son humidité ne l'en empesche point & ne le sçauroit (cōme vous pensez en vostre page 29.) Car encores qu'actuellement il fust humide, ce qu'il n'est pas, nō plus que les autres metaux: si ne laisseroit-il pas d'estre repercussif, comme la Iōbarbe, en la composition de laquelle, comme dit Galen, les parties aqueuses surpassent toutes les autres. Aussi auez vous fait en ce passage vne des lourdes desmarches que vous *Ignorance* eussiez peu faire pour vn homme qui veut *de Lannay* porter le nom de medecin, d'autant que confondant les medicaments repercussifs ou retrainctifs avecque les astringents, vous dites que le plomb ne pourroit pas seruir au commencement des defluxiōs, s'il estoit ainsi qu'il fust aqueux. Car, dites vous, ez medicaments froids & aqueux il ny a nulle ou bien peu de astringtion Vous parlez comme s'il estoit necessaire que tous medicaments repercussifs ou repoussans fussent adstringēts ou restrain-

rifs: ce qui est toutesfois faux. Car tout ainsi
 comme naturellement tout ce qui est chaud
 attire, ainsi tout ce qui est froid repousse. Tou-
 tes choses froides sont naturellement reper-
 cussives & repoussantes: & toutesfois ne sont
 pas toutes astringentes & retraignantes. non
 plus que toutes les astringentes ne sont pas
 froides, comme escrit Galé au premier liure
 des simples, & comme vous-mesmes sans y
 penser l'avez trāsrit en vostre page 35. L'eau
 est repoussante & non reſtraintive: le Chalci-
 ris, la Couperose & le Misy sont reſtraintifs,
 & toutesfois tāt s'en faut qu'ils ſoyēt froids,
 qu'au contraire ils sont treschauds. Toutes
 choses froides estans repercussives & repouſ-
 santes de leur nature, le sont encores d'avan-
 tage lors qu'elles ont vne vertu reſtraintive
 ioincte à leur froidure. Car l'aſtriction proce-
 de de la ſechereſſe des parties terreſtres: ſi biē
 que les medicaments estans tels sont non ſeu-
 lement nōmez repercuſſifs, mais auſſi aſtrin-
 gents proprement, à la difference des aſtrin-
 gents, deſquels Galen a parlé au premier liure
 des ſimples, & leſquels le ſont par accident
 ſeulement. Cecy ſeruira de reſponſe à ce que
 vous mettez au cōmencement de vostre 47.
 page, là où vous dites, *Que ſans determination
 & iugement i'ay affermé en mō liure que tous me-*
dicaments adſtringents eſtoient froids & aqueux.
 qui est vne pure calomnie & menſonge. Car
 ie ne l'ay point dit ſans diſtinction ou deter-
 mination,

Calōnie de
 Launay.

mination, comme vous parlez : mais i'ay dit en mon dixieme fueillet que non seulement l'Antimoine estoit terrestre & sec, mais aussi froid & aqueux:terrestre, dy-ie, & sec au troisieme degre comme tous restraingnans de pareille nature. Voyez donques qu'en disant restraingnans, & adioustant ces mots, de pareille nature, ç'a esté pour distinguer les froids d'auecques ceux qui sont chaulds, & qui ne sont de pareille nature que l'Antimoine. Lisez le 16. chapitre du cinquieme liure des simples : mais lisez quant & quant le premier chapitre du premier liure de la matiere chirurgique escrit par Iaques Houllier, autrement vous uous pourriez abuser: cōme vous avez fait en plusieurs endroits, faulte d'entendre les mots tant de la philosophie naturelle, comme de la medecine. Ainsi donques le plomb pourroit seruir au commencement des defluxions, encores qu'actuellement il fust humide, ce qu'il n'est pas, comme i'ay dit, non plus que tous les autres metaux, l'humidité desquels n'aparoist sinon lors qu'ils sont fondus, attendu qu'elle est gelee & endurcie par leur froid interieur & naturel: ce que vo^r n'avez entendu & n'entendez, comme vous le monstrez en la fin de vostre parge 46. là où vous dites, *Que si les metaliques estoient d'une substance plus aqueuse q seiche, ils seroyent mols & non pas durs.* Le plomb, selon Galen, a plus de substance aqueuse que terrestre, & toutes-

*Faute de
Lannay.*

fois il n'est pas mol, ains plustost dur. Voyez comment vous vous escrimez en argumentant. Tous metaliques sont actuellement secs, à sçauoir pédant qu'ils demeurent en leur froidure naturelle, laquelle endurecist les parties aqueuses, & par consequent elle empesche qu'ils ne soyent mols, mais lors que la froidure naturelle est surmontee à force de feu, les vns se fondent en tout & par tout, cōme les metaux, les autres se fondent en partie & en partie s'empoudrent, comme ceux que Agricola nomme mixtes ou meflagez: Ceste humidité dōques, laquelle n'apparoist point és metaux, pendant qu'ils sont durs & amassez par leur froid, se manifeste alors qu'ils sōt fondus. Parquoy cōtre la resolutiō que vous faites en vostre page 31. ie dy que le plomb est froid pres du quatrieme degre, & naturellement humide d'une abōdance d'humidité aqueuse, gelee & endurecie par le froid ioincte avec vn peu de substāce aëree & moins de terrestre. Santes Ardoin qui a fait des liures des venins & en a ramassé tout ce que les anciens tant Grecs qu'Arabes en auoyent dit, escrit que le plomb est froid au troisieme degre, & qu'il tire fort à l'humidité. Oribase l'a pour ceste raison enrollé au nombre de ceux desquels l'humidité est aqueuse, chap. 31. liure 3.

*Qualitez
du plomb.*

De là i'ay tiré mes cōsequēces pour prouuer que l'Antimoine crud estoit froid aqueux pres du quatrieme degre, comme le plomb.

& non humide comme vous me voulez faire
 accroire. Ceste consequence est tiree non
 pas de gingois & à la vollee, cōme vous la ti-
 rez envostre page 23. mais en la façon qui en-
 suit. L'Antimoine cōtient en soy le plomb : il
 a donques la nature de plomb : la nature du
 plomb est froide pres du quatrieme degré &
 venimeuse, il s'ensuit donques que l'Antimoine
 est froid pres du quatrieme degré & veni-
 meux. Voila la consequence que i'entens en
 tirer. Mais vous qui faites les consequences
 selon que vous auez la ceruelle bastie, c'est à
 dire a rebours de bien, vous vous fondez sur
 ce mot de conuertir (c'est grand cas que les
 mots vous abusent ainsi souuent) & dites, que
 encores que l'Antimoine se conuertisse en *Comment*
 plomb, ce n'est pas à dire qu'il tienne la natu- *il faut en-*
 re de plomb, non plus que la cendre que l'on *tendre que*
 fait de bois vert, ou que la chaux faite d'un *l'Anti-*
 cailloux. Vostre comparaison est du tout in- *moine se*
 egalle, & partant tout ce que vous auez fondé *conuertit*
 dessus ne vaut rien : car ce mot de conuertir *en plomb.*
 se prend en deux sortes : la premiere pour vne
 conuersion essentielle, l'autre pour vne sim-
 ple separation. Cecy s'entendra par les exem-
 ples. Le laiët se conuertist en beurre, en fro-
 mage, & en laiët, que l'on nomme cler : ce
 m'est pas par mutation de sa propre substan-
 ne : ou comme disent les Theologiens scho-
 lastiques par transsubstantiation : mais seu-
 lement par separation des parties de beurre,

de fromage & de cler, lesquelles éstoient au parauant cōfuses ensemble. Ainsi quād l'Antimoine se conuertist en plomb, ce n'est pas par mutation de sa substance, mais seulement par separation des parties qui sont pures d'avec les impures. La plus part des impurés sont terrestres. Ce qui se void aisement en la separation qui s'en fait par art, lors que l'on luy baille le feu proportionné, & que l'on y mesle les choses qui ont pouuoir de faire ceste separation pour en tirer ce que les Alchimistes nomment le Regule. Dont l'on void aisement que l'Antimoine crud contenant en soy le plomb, à vne grande temperature d'iceluy : ie dy temperature froide aqueuse, & humide : non seulement aqueuse, mais aussi en partie aëree : toutesfois l'une & l'autre humidité n'est maistresse en l'Antimoine : car la grande quantité de la seiche- resse appuyee és partis terrestres l'en empesche. Les parties terrestres sont celles qui se separēt d'avecques le plomb, par le moyē du feu : tellement que de là nous retirons qu'il est froid aqueux & terrestre. Ainsi faut-il distinguer les choses : & ainsi la comparaison que vous faites du bois vert conuerti en cendre, ne vaut rien : car en telle mutatiō il se fait vne veritable corruption de la substance du bois, & par necessité vne nouuelle generation de la cendre, laquelle est faite par la violence du feu, qui a consumé tout ce qu'il a

*L'Anti-
moine re-
tient de la
nature du
plomb.*

peu. Bien est-il vray que si l'ouurier passoit
 oultre, & qu'il continuast à bailler feu à son
 Antimoine desia party en deux, il n'y a point
 de doute qu'il n'en fait vne nouuelle substâce
 par la corruptiõ tât de l'vne q̃ de l'autre. Mais
 à celle fin qu'il ne vous semble que ce que ie
 dy soit vne chose controuuee, voyez la cause
 & l'origine des metaux mixtes ou meſlangez
 escrite par George Agricola: comment ils se
 font par meſlange d'un, de deux, ou de plu-
 sieurs sucz, desquels les metaux sont faits, &
 lesquels ainsi meſlez s'endurciſſent par vn
 meſme froid. Ils se font auſſi lors qu'une
 partie de terre se meſle parmy vn suc metali-
 que: & ainsi de plusieurs il ne se fait q'un
 corps. Or ces pierres metaliques aſtans ainsi
 faites & miſes deſſus vn feu artificiel, se fon-
 dent, & ne retournent iamais à leur premiere
 figure, d'autant que les corps parfaits dont
 elles sont faites, commencent à se ſeparer, &
 en la parſin ſe ſeparent. Cela ſe peut enten-
 dre par l'exemple de l'argent rude, roux &
 tràſlucide, lequel eſt fait d'un suc d'argent, &
 d'un autre suc q̃ eſt la matiere de la pierre tràſ-
 lucide: Car lors que l'on le cuit, il ſe fait ar-
 gent pur. Et pour autant que le suc cler & lu-
 cide en eſt ſeparé par le feu, il n'eſt plus tranſ-
 lucide. Ainsi eſt-il de toutes les eſpeces de
 Marchaſites, les vnes deſquelles ſont faites
 de cuiure & de pierre, les autres de cuiure,
 d'argent & de pierre: les autres de cuiure,

*Comment
 ſe font les
 pierres me-
 taliques.*

*Comment
 ſe font les
 Marchaſi-
 tes.*

d'argent, d'or & de pierre : les autres d'argent, de plomb noir, d'estain, de cuiure & de pierre, & les autres sont du tout steriles. Ainsi l'Antimoine est fait quelque fois de plomb & de terre: & quelque fois de plomb, d'argent & de terre. George Agricola montre la maniere de le cuire pour en tirer l'argent, en son huitieme liure de la chose metalique. Et Cardan pour donner exemple comment parmi les metaliques il y a de l'argent, il allegue l'Antimoine dedans lequel il y a de l'argent. Ceste raison m'a fait mettre l'Antimoine au nōbre des Marchasites : sur-
 quoy vous avez fait vn grand brouhaha en
 vostre page quaranteneufieme disant, que
 ce mot Marchasite s'entend seulement des
 Pyrites, qui est de couleur de cuiure, ou de
 couleur d'argent. Regardez comme de re-
 chef ce mot vous a abusé. Premièrement le
 mot de Marchasite est pl^r general q̃ n'est pas
 le mot Pyrites : vray est que le Pyrites est
 nommé Marchasite par excellence : & tou-
 tesfois ce n'est pas à dire qu'il ny aye d'au-
 tres Marchasites que le Pyrites : comme il y
 d'autres poëtes qu'Homere, lequel simple-
 ment est nommé poëte. Matthioli mesmes
 au Commentaire sur le cinquieme liure de
 Dioscoride s'est resouenu d'une marchasi-
 té, nommee vulgairement Marchesita
 stagno. Et pouuez tirer de là que le mot de
 Marchasite n'est seulement attribué au Py-

*Quel An-
 timoine
 peut estre
 mis au nō-
 bre des Mar-
 chasites.*

*Ignorance
 de Lannay*

rites, mais à ces métaux mixtes, lesquels tiennent en eux vne partie des parfaits. Ceux qui sont faits d'or, ou d'argent, ou de plomb, se peuuent à bonne raison nommer Marchasites d'or, ou d'argent, ou de plomb. Secondement vous vous estes abusé lors que vous auez pensé que le mot Pyrites s'attribuoit à vne seule chose : car avecque ce q̃ Matthiolivous en dementira au commentaire qu'il a fait sur le Pyrites de Dioscoride : George Agricola vous monstre le contraire, par les diuerses especes qu'il en a baillees, tant au passage cy dessus allegué, cōme au dialogue qu'il aentiltré Berman. Il vous le monstrera encores d'auātage, si vous daignez lire son douzieme liure de la chose metalique, là ou il dit qu'il y a des Pyrites atramenteux, les autres alumineux, & les autres soulfrez. Notez dōcques en vos tablettes que toute Marchasite n'est pas Pyrites, ny que tout Pyrites n'est pas ce dont Dioscoride & Galen ont parlé : non plus ne moins que tout animāt n'est pas homme : ny tout hōme n'est pas asne, comme vous estes. Cecy est encores plus manifeste par l'vne des preuues que les alchemistes mettent en auant pour prouuer que les métaux sont faits de soulfre : car ils disent, comme escrit Falopius, qu'ē toutes veines de métaux on trouue l'excremēt des métaux, lequel sent le soulfre : & tel excrement, dit-il, est nommé Pyrites ou Marchasite, qui est vne pier-

re que l'on trouue au dessus des mines, ou dessus les veines desdicts metaux, laquelle estant bruslee, ou fondue, ou empouldree, rend vne odeur de soulfhre. Cela doncques vous deuait faire cognoistre manifestement que ces mots ne sont pas speciaux, mais generaux à tous excremens de metaux.

Or l'Antimoine doncques, lequel par la separation des deux substances se conuertist en la quatrieme espece de plomb, selon George Agricola, & par consequent peut à iuste raison estre nommé Marchasite de plomb, contient en soy la nature de plomb, & est froid au commencement du quatrieme degré. Il est aussi sec au troisieme degré à cause de la quantité des parties terrestres meslangees parmy les plombeuses. Vous dictes qu'Oribase l'a mis au nombre des choses qui seichent simplement sans additiō de degré: ce qui est faux. Car vous auez choppé lourdement & auez imposé à Oribase; faulte de l'entendre. Oribase en son quatorzieme liure poursuit la faculté des medicaments selon leurs degrez: Et auant que parler des qualitez diceux, il en propose vn cathalogue sans y adiouter aucun degré de qualité: non qu'il vueille dire qu'ils soyent sans degré, comme vous l'auiez pris. Car luy-mesme le mōstre en la premiere ligne du chapitre q̄ vous alleguez: Les fucilles & la graine du Vitex, dit-il, deseichēt: celle de la Rue moins, & la racine du dent de

*Launay
impose à
Oribase.*

chien bien peu. Brief par tout ce chapitre il adiousté souuent ces mots: plus, moins, beaucoup, avecque vehemence, & autres de pareille signification: ce qui monstre facilémēt qu'il ne veut pas dire que tous ceux qui sont là enrollez soyent secs simplémēt & sans degré. Mesmes ce qui descouure encores d'auantage vostre bestise, c'est qu'il a enrollé en ce mesme catalogue l'Aphronitre, le plaistre, le plaistre brusle, les coquilles d'oistres & de pourpre bruslees, les vieux cuirs bruslez, la corne de cerf bruslee: & plusieurs autres que les femmes mesmes sçauent bien estre desseichantes. Vous auez doncques ignorámēt, faulxement & calomnieusement allegué en vostre page 22. disant: *Oribase le nombre entre ceux qui desseichent simplement, sans aucune addition de degré: & refrigere aussi de pareille maniere.*

La seicheresse de l'Antimoine se manifeste lors que lon tire le Regule & que l'on fait ceste separation de plomb: car il y demeure vne grande quantité de parties terrestres: lesquelles sont meslees, cōme i'ay dit, parmy les plombeuses, lesquelles principalement empeschent qu'il ne se fond si aisément, & ne peut endurer le marteau: car elles ne sont assez fermement mesleengees parmy les parties aqueuses: qui est l'vne des causes pour lesquelles les corps sont rendus inhabiles à s'estendre sous le marteau, comme nous auōs dit cy deuant. Ces parties terrestres augmen-

*En quoy
gist la sei-
cheresse de
l'Anti-
moine.*

tent la froidure de tout le corps de l'Antimoine, d'autant qu'elles sont froides & tiennent non seulement de la secheresse de la terre, mais aussi de sa froidure, laquelle ioincte avecque la froidure aqueuse, la rend encores plus froide: si bien qu'il n'y a point de doute que l'Antimoine ne soit encores beaucoup plus froid que ne scauroit pas estre le plomb. Vous vous aidez encores de l'autorité d'Auicenne, qui a dit que l'Antimoine est froid au premier degré & sec au second: à laquelle opinion d'Auicenne ie résponderay ce que Falopius docte medecin y a desia respondu, asçauoir qu'il ne faut point croire qu'un médicament ainsi terrestre, refroidisse si peu. Et quant est de la secheresse, le mesme Auicenne escrit que l'Antimoine est plus sec que n'est pas la couperose, qu'il n'ome rouge, laquelle toutesfois il fait seiche au troisieme: ce qu'il a transcrit de Galen au quatrieme liure de la composition des médicaments en general.

Qu'il appert par les actions de l'Antimoine qu'il est froid & sec.

L'autre partie de nostre preuve estoit tirée des facultez & actions de l'Antimoine par lesquelles il appert qu'il est froid & sec. Car tous médicaments qui restraignent, estouppent & empeschent la croissance de chair sont froids & secs. L'Antimoine, selon Dioscoride, Galen & Plin, restraint, estouppe & empesche la croissance de chair: dont il ensuit qu'il est froid & sec. Il faut prendre ceste

maxime toute entiere & nō particulieremēt, d'autant qu'il ya quelques medicaments qui restraignent, lesquels toutesfois ne sont pas froids: comme desia nous auons monstřé par exemple : aussi y en a-il qui estouppent, qui ne sont pas secs, cōme vne grande partie des choses froides & humides. Il y en a encores qui empeschent la croissāce de chair, lesquels ne sont pas froids, comme sont les choses qui rongent. Mais il ne s'en trouue point qui aye ces trois facultez ioinctes ensemble, lesquels ne soyent froids & secs. Dioscoride escript qu'il fait la cicatrice és vlceres. Tels medicaments sont nommez par les Grecs epulotiques. Les epulotiques, dit Galen au chapitre 8. du secong liure de la composition des medicaments en general, seichent d'autant plus que les glutinants (c'est à dire ceux qui font reprendre les playes) surpassent en seicheresse les sarcotiques, c'est à dire ceux qui engēdrent la chair. Or est-il ainsi que les sarcotiques sont secs au premier degřé & les glutinants au secong, comme escript Ia. Houlier en son secong liure de la matiere chirurgique : il fault donques necessairement que les epulotiques soyent secs au troisieme degřé. Ceste seicheresse ioincte avecq la froidure a esté cause que Galen à dit que l'Antimoine non lauē estoit du nombre de ceux qui restraignent biē fort, au quatrieme liure chapitre 4. de la cōposition des medicaments

selõ les lieux. Aussi le confessez-vous en vostre page 44. là où sur la fin d'icelle vous dites: *Et quãd il faut cicatriſer, nous vſons du crud, comme ayant grande faculté d'aſtrindre : comme ceux qui doiuent cicatriſer les vlceres, lesquels doiuent eſtre fort aſtringents & fort deſſicatifs.* Nous auons dit ſelon la ſentence de Galen, que ceſte grãde aſtriçtiõ procede de la grande froidure iointe aux parties terreſtres. Et vous dites au contraire en vostre 42. page que s'il eſtoit tel il ne ſeroit commode aux medicamẽts que lon fait pour les maladies des yeux, comme aux defluxions : puis en la 44. vous dites encores que s'il eſtoit froid, comme ie le fais, il ne pourroit ſeruir aux yeux qui ſont d'vne ſubſtãce nerueuſe. Que n'en dites-vo⁹ autant à Dioſcoride, Galen, Meſue, Raſis, & tous les practiciens, lesquels ont dit que la Ceruſe, le ius de Pauot, la luſquiamme, & autres qui ſont ſecs & froids ſeruent aux defluxions ſur les yeux, lesquels toutesfois en partie pour ceſte grande froidure ſont poiſons? Que deuiendront tous les medicaments que Galen a eſcrit & ordonné pour les yeulx, au quatrieme liure de la compoſition des medicaments ſelon les parties, la pluſpart deſquels ſont cõpoſez de choſes fort ſeiches, cõme de la pierre phrygiẽne bruſlee, de cuiure bruſlé, de poiure blanc & d'autres, parmy leſquelles il meſle l'Antimoine? Encores que Dioſcoride & les autres autheurs ayent ordonné l'Antimoi-

*Faute de
Launay.*

ne és collyres pour les yeux, & pour empêcher le flux de sang de la membrane du cerueu, si est. ce qu'ils n'ont pas entédu que l'on l'appliquast tout seul par dedans ou en telle quantité que tels inconueniens en peussent aduenir, non plus que quand ils ont ordonné l'Opiū & la Iusquame & beaucoup d'autres medicaments tant froids que secs. A quelle fin a esté inuentee la composition des medicaments si ce n'a esté ou pour corriger, ou pour augmenter, ou pour diminuer la vertu d'iceux, selon la nature des parties, ausquelles ils doinent estre appliquez? Vous voyez doncques comment tout ce que vous auez iazé en vostre 44. 45. 46. & 47. page n'est aucunement à propos, pour prouuer que l'Antimoine n'est pas froid & sec: Car l'argument que vous faites en ceste façon: On vse d'Antimoine pour arrester le sang de la membraue du cerueu & pour les maladies des yeux, Il s'en suit donques que l'Antimoine n'est pas froid pres du quatrieme, ny sec au troisieme degré: Cest argument, dis-ie, ne cōclud pas bien, autrement il concluroit contre l'Opium, la Iusquame & la mandragore, qui sont froids pres du quatrieme: aussi feroit-il contre le cuiure brulé, & contre le poiure blanc q̄ Galen dit estre plus poignant q̄ le noir & quasi tout brulé & tout deseiché. Or ne vous suffit-il pas d'auoir ainsi à tort & trauers parlé des qualitez de l'Antimoine, & essayé de

prouuer qu'il n'est pas froid ny sec aux degrez, lesquels i'ay posez en mon Discours: mais vous auez encores voulu passer oultre, & auez voulu mōstrer qu'il est temperé, par vn argument escrit en vostre page 43. lequel a la plus belle apparence du monde: toutes fois ce n'est qu'une Happelourde. *Toutes pierres metaliques, dites vous, qui au goust ne representent aucune qualité: soit qu'elles soyent en pouldre mise sur la langue, soit qu'elles soyent meslees avecque quelque liqueur ne sont ne trop chaudes ne trop froides, mais sont moyennes entre deux, toutes fois vn peu declinantes à frigidité. L'Antimoine est vne pierre metalique seiche, par vous mesme qui la mettez au plus haut de la desiccation, excepté celles qui bruslent, laquelle mise sur la langue soit qu'elle soit mise en pouldre, soit quelle soit dissoulte avecque quelque liqueur de pareille faculté, c'est à dire insipide, ou bien peu ne represente au goust aucune qualité excessiue, mais est du tout insipide, comme vous mesme assurez en vostre liure: Ergo il n'est ne trop chaud ne trop froid: iacoit quil decline à quelque frigidité, mais est moyen entre deux.* Voila vostre argument de mot à mot. Voyons cōment vous entendez bien ce que vous dites, & par consequent si vous estes digne d'estre medecin ordinaire de la Rochelle.

Premierement vous confondez les premieres qualitez avec les secondes: c'est asçauoir le froid le chaud, le sec & l'humide avec ce qui est insipide: les premieres sont du nom

bre de celles qui s'ont cogneuës par le toucher: l'autre se cognoist par le goust, si bien que vous faictes vne faute ne distinguant ce mot de qualité, lequel toutesfois mal entendu vo^s à fait errer, tirant delà ceste cōsequence faulfe: l'Antimoine est insipide, Ego il n'est ny chaud ny froid. Car les escolliers phyficiens scauent bien, & l'auiez escrit en vostre page 36. que les medicaments qui ont vn goust aqueux, c'est à dire insipide, sont froids de leur nature. Si vous eussiez esté bon menteur, c'est à dire, si vous vous fussiez bien resouenu de ce qu'auiez escrit, vous n'eussiez dit que l'Antimoine qui est insipide, n'est ny chaud ny froid. Ceste confusion de premieres & secondes qualitez se void encores d'auantage en la fin de vostre page 34. *Tout ce qui est appliqué sur la langue, dites vous, ou il luy plaist & luy est agreable, ou il luy desplaist, ou il n'est ne l'un ny l'autre. Celuy qui n'est ne l'un ne l'autre, & qui ne luy fait aucune alteration est appelé insipide, comme est l'eau pure, naturelle, n'ayant aucune qualité estrange ne trop chaude ne trop froide, & tous les autres elements.* Voyez, ie vous prie, comment vous vous en acquitez: l'eau pure & naturelle n'est-elle ny trop chaude ny trop froide? s'il est ainsi, Galen a fort mal escrit au premier liure des Simples, chapitre 4. que l'eau appliquée sur le corps refroidit du tout, voire & y fust elle appliquée estant ny trop froide ny

trop chaulde, c'est à dire est ar tiede. Itē l'eau pure & naturelle que vostre chat mesme cōfesseroit estre froide, s'il pouuoit parler, est du tout insipide, aussi bien que celle qui est tie-de, laquelle n'est pas pure & naturelle, mais alteree aucunement par la chaleur. Ainsi la maieur de vostre argumēt est faulse. Car encores q̄ l'eau & les pierres metaliques soyent insipides au goust, si est-ce qu'elles representent vne qualité froide à la langue & au palais : non pas comme instruments du goust, mais comme ayās la faculté de sentir au toucher, ainsi que les autres parties du corps, auxquelles les nerfs sont enuoyez. Vo^o auez tiré ceste consequence du passage de Galē, lequel est au 4. chapitre du quatrieme liure des Simples, & lequel vous auez fort mal entendu. Ce passage est tel: D'avantage, dit-il, si vous trouuez en vne chose seiche, vn pareil sentiment comme l'on trouue en l'eau, laquelle n'a aucune qualité, ceste chose sera du tout hors d'une remarquable chaleur ou froidure, & aura, autant que faire se pourra, vne moyenne attrépance, ou bien seulement elle l'aura telle, qu'elle tirera vn peu à la froidure. Il est facile à iuger que Galen parle en ce texte du sentiment qui se fait non seulement par le goust, mais aussi par le toucher. Car quand il parle de l'eau qui n'a aucune qualité, il entend de celle qui n'est ny froide ny chaulde, c'est à dire de celle qui est tie-de : &

non pas de la naturelle ou non alteree, laquelle actuellement est tousiours froide, comme dit Galen. Ceste explication ne se tire d'ailleurs que du texte de Galen mesme au quatrieme chapitre du premier liure des simples, Là où il cõpare l'action de celle qui est beaucoup froide avecques celle qui est tie-de: & au chapitre cinquieme, là où il dit que l'eau estant pure selon le iugement du goust, de la veuë, & du fler, c'est à dire n'ayant aucune qualitez surpassante, ie dy qualitez ou premiere ou seconde: est toutesfois froide & refroidit. Il est donques aisé à voir que Galen ne veut pas dire que l'eau laquelle est insipide, n'est ny froide ny chaulde, autrement il seroit contraire à soy-mesme: aussi voit-on manifestement qu'il n'entend point seulement des qualitez lesquelles se iugent au goust, mais aussi de celles qui sont tactiles, c'est à dire qui se manifestent au toucher. Le chapitre troisieme du quatrieme liure des simples, lequel precede celuy qui vous a trompé, vous eust gardé de faire ceste faulte, si vous l'eussiez leu: car il explique en cest endroit parlant de l'eau, que c'est q̃ n'auoir qualitez, disant: l'entens principalement de celle, laquelle ne se resent d'aucune des qualitez susdites, à sçauoir ny de douceur, ny d'amertume, ny d'acrimonie, ny d'aigreur, & en oultre celle qui n'est ny trop chaulde ny trop froide. Ainsi n'eussiez vous esté trompé si vous eussiez leu

sept ou huiſt lignes plus haut, ou bien ſi vous n'eufſiez reſemblé ceux qui iouent à Boulleneuë, leſquels iugent le plus ſouuent de ce qui leur apparoiſt premierement & qui leur ſemble auoir la ſemblance de la boulle : & n'ont eſgard à faire comparaïſon des diuerſes choſes circonuoïſines, leſquelles non aſſez bien conſiderées les peuuent tromper & leur faire perdre la partie. Parquoy vous auez à prouuer que les pierres metaliques, ou bien l'Antimoine n'eſt nō ſeulement inſipide, mais auſſi n'a aucune autre qualité premiere ſurpaſſante, laquelle ſe manifeſte au toucher, non plus que de l'eau tiede. Si vous monſtrez que l'Antimoine ſoit tel, ie confeſſe que voſtre argument eſt bon : ſinon ie ſouſtiens la ſentence de ce bon vieillart le ſeigneur de la Bataille dont vous parlez en voſtre premiere epiſtre, lequel diſoit que bien ſouuent les plus vieux ne ſont pas les plus ſçauans : & adiouſteray encores, que bien ſouuent, ils ne ſont pas les plus ſages.

Sommaire Ces choſes ainſi deduites, vos faulſes pro-
concluſion poſitions eſpluchées, & voſtre calōnie deſ-
touchant couuerte, il appert que l'Antimoine crud eſt
la nature vn corps metalique mixte & meſſangé tant
de l'An- d'vn, ou de deux vrais metaux, comme d'vne
timoine pierre : & que pour ceſte raiſon il peut eſtre
crud. compris ſous le nom general de Marchaſite,
 comme ſont toutes les eſpeces de Pyrites : &
 comme eſtant le prochain voiſin de celle qui

par excellence à esté nommee Pyrites par les Grecs, & Marchasite par les Arabes. Il appert aussi que ce corps metalique est froid pres du quatrieme & sec au troisieme degre, & par cōsequēt poison, nōobstāt tous les incōueniēs q̄ vous auez alleguez au contraire, lesquels de leur nature, cōme les Logiciens disent cōmūnement, ne peuuent souldre les arguments.

*Chapitre second, auquel il est monstré que
l'Antimoine calciné est poison.*

LE nous faut maintenant monstrier que l'Antimoine preparé en la maniere que Matthioli là preparé, est poison de toute sa substance, & par consequent qu'il n'est pas bon médicament cathartique ou purgeant. Les moyēs que j'ay suyui en mon Discours, pour prouuer ce que dessus, sont tels : l'Antimoine estant poison tant à cause de la nature qu'il a avecques les metaux, par laquelle il contrarie à la vie des hommes, qu'à raison de ses manifestes & euidentes qualitez, ne peut estre rendu cōmode & bon médicament purgeant que par deux moyēs, lesquels ont esté ordonnez par Mesué, & sont approuuez par toutes les escholles de Medecine : à sçauoir par la meslange d'autre médicament qui ait la vertu de luy rabbatre sa malice, tāt occulte que manifeste : & par l'artifice de l'ouurier.

Or est-il ainsi que tant par la meſlange que vous en faites, que par l'artifice dont vous vſez, ſa malice n'eſt point diminuee, mais pluſtoſt augmentee. Il ſ'enſuit doncques que l'Antimoine n'eſt point rendu bon médicament purgeant par les deux moyens que vous y tenez. Pour prouuer la mineur propoſition de ce ſyllogiſme, i'ay deduit les deux moyens de la vraye correction au 18, & 19. fueillet de mon Diſcours : puis i'ay collatiōné la meſlange que vous faites, avecques la vraye, dont les Anciens ſe ſont aidez : montrant que par icelle l'Antimoine ne pouuoit eſtre corrigé. Ce que i'ay fait au 20. 21, & 22. fueillet de mon Diſcours. En la fin ie ſuis venu à l'autre membre, touchant l'artifice, & ay montré au 23. 24, & 25. fueillet que tant ſ'en falloit qu'il fuſt corrigé par ce moyen, que meſme il en eſtoit rendu plus malin. C'eſtoit par ce meſme chemin qu'il me falloit ſuyre, Maistre Bauder, ſi vous euſſiez eu ſeulement auſſi peu de ceruelle qu'un moyneau, & non pas commencer à eſcorcher l'anguille par la queuë, aĩſi qu'avez fait. Vous vous prenez doncques premierement à la calcinatiō qui eſt la correction ou preparation artificielle, ſuyuant laquelle ie vous

De la calcinatiō de l'Antimoine. reſpondray & taſcheray d'eſclarcir ce que i'en ay dit en mon Diſcours. l'ay eſcrit que l'Antimoine calciné eſtoit rendu plus ſec qu'il eſtoit endurcy, & acqueroit vne vertu

de feu. Or estre rendu plus sec, estre endurci, & acquerir vne vertu de feu sont trois choses qui tant s'en faut qu'elles rendent vn médicament meilleur, qu'au contraire elles le rendent mauuais: il s'ensuit donques que la calcination ne rend point l'Antimoine meilleur, mais au contraire pire. Vous m'avez nié la maieur en vostre page quarâte-huictieme. C'est donques à moy à la prouuer. Geber escrit au cinquâte & vnieme chapitre de son premier liure du Sommaire de la perfection: Calcination, dit-il, est vn enpouldrement de la chose calcinee, lequel est fait par le feu, par la priuation ou absence de l'humidité qui amassoit les parties. Autant en dit Albert le grand en son liure de l'Alchemie. Il escrit encores apres: Il y a deux intentions de calcination: l'vne generale & l'autre speciale. Et apres auoir parlé de la generale il dit: la speciale calcination appartient aux corps mols: tellement qu'en toutes les deux l'on a intétion de les endurcir & ignifier. Ma maxime est ainsi appuyee dessus ces deux passages de Geber excellent escriuain entre les Alchemistes. A bonne raison donques i'ay dit que l'Antimoine caliné estoit rendu plus sec qu'il estoit endurci & acqueriroit vne vertu de feu. Je vous prouueray encores d'auantage ceste seichereffe, par ce q le mesme Geber escrit au mesme chapitre. La raison, dit-il, pour laquelle on calcine les metaliques,

*Que c'est
que calci-
nation.*

est à celle fin que le soulfhre bruslant, corrompant, & gastant soit chassé par le feu : car par ce moyen est bruslee toute la substance de soulfhre qui se peut brusler, laquelle sans la calcination ne se pourroit oster : d'autant que le corps est solide & massif, & à cause de ceste massiueté la substance soulfhreufe est cachee dedans la continuité de l'argent-vif, par lequel elle est defendue de la bruslure. Et pour ceste cause il a esté necessaire de separer ceste continuité, à celle fin que le feu parueuant à l'aise à vne chascque moindre partie de tout le corps, peut brusler ceste substâce de soulfhre, & que la continuité de l'argent-vif ne l'en peut empescher. Voyez maintenant, puis que le feu paruiet & agist en chascque moindre partie de vostre Antimoine que vous calcinez, comment il est necessaire que l'humidité de chascque moindre partie face place au feu, & que la seule substance terrestre demeure depuree, comme dit le mesme Geber. Ainsi me confesserez-vous, vucillez ou nō, que toute chose calcinee perd de son humidité, & est faite plus seiche par ceste calcination. Je vous laisse à penser en quel degré viendra l'Antimoine calciné, lequel estant crud, est sec au troisieme degré, comme nous auons monstré. L'autre raison par laquelle i'ay prouué ceste maxime proposition, est prise de Galen en ceste façon. Toute chose qui n'est point acre & poignante,

acquiert beaucoup de chaleur par la calcination : l'Antimoine crud n'est ny acré ny poignant: il acquiert donques beaucoup de chaleur par la calcination. Au lieu de répondre à cest argument, vous n'ysez qu' d'une calomnie, & dites en vostre page quaranteneufieme, que i'ay escrit que tous medicaments en general calcinez, sont caustiques. Je ne l'ay point dit, & auez faullement imposé : ie m'en rapporte au texte. I'ay seulement parlé des metaux froids & secs, escriuant en ceste façon au vingt-troisieme fucillet de mon Discours page premiere. Aussi voyés-nous que tous les metaux froids & secs de leur nature deuiennent caustiques, c'est à dire bruslés par la calcination. Et à celle fin que vous ne pensiez que ie sois le premier qui aye ainsi parlé de l'Antimoine, ie vous transcriray icy le texte de laques Houlier, excellent medecin & docteur de la compagnie de laquelle i'ay cest honneur d'estre. Il dit donques, au troisieme liure de la matiere chirurgique chapitr 5. auquel il parle des medicaments qui bruslent: On fait, dit-il, vne cendre avecques de l'Antimoine bruslé, laquelle est catharetique & laquelle mesme cōsume les chancres. Et vn peu deuant il dit, Les medicaments catharetiques sont ceux qu'Hippocrate a nommez Nemo-menes, lesquels mangent la chair surcroissante, pourrie & calleuse. Tels sont le cuiure bruslé, le vert de gris, l'escaille de cuyure, l'al-

*Calomnie
de Lannay*

lun brulé, la pouldre de Mercure, & autres. Les medicaments catharetiques, cōme escrit Galen au cinquieme des simples, sont de mesme espeece & faculté que les septiques, c'est à dire ceux qui sont pourrissans & corrōpās : & les septiques sont compris sous les caustiques, & ainsi quelque fois nommez : mais non proprement. Il s'ensuit donques que l'Antimoine preparé peut estre ainsi nommé, & l'a esté de fait par Iaques Houlier. Vo^o ne respōdez aucunement à ces raisons, lesquelles confirment ma maxime : ains selon vostre accoustumee maniere, vous vous amusez seulement à crier, qu'il n'est point caustique, au lieu que vous deuriez prouuer que par la calcination il n'est point rendu plus sec, qu'il n'est point enducy, & qu'il n'acquiert point vne vertu de feu : qui sont les choses qui amoindrissent la bonté des medicamēts purgeās & les rendent malins, comme nous dirons cy apres : & qui est le principal point, lequel i'ay disputé cōtre la preparatiō de Matthioli. Vous alleguez qu'il n'est point caustique d'autant qu'il n'est mis sur la langue, il n'est point acré & poignant & ne l'ulcere point. Et ie vous respons qu'écors qu'il ne soit tel au goust, si ne laisse il pas de ronger l'estomach & de le percer, quand il se rencōtre le plus fort : Car ceste consequence est faulse : il n'est point poignant & n'ulcere point la langue : il n'est donques point septique ou pourrissant & corrōpant. Ce

*Faute de
Launay.*

qui est aisé de iuger par l'Ephemeron ou Journalier Colchique, duquel Dioscoride parle en ceste maniere, en son quatrieme liure: Nous auons, dit-il, fait peindre ceste planche, de peur que quelqu'un ne la mégeast imprudemment au lieu du Bulbe: Car elle alleche merueilleusement ceux qui en sont ignorants par la delicateſſe de ſa ſauueur. Et toutes fois Nicandre dit, es vers que nous auons cy deuant alleguez, qu'estant entré dedans l'eſtomach, il le ronge & puis le perce d'outre en outre. Il n'est doncques pas neceſſaire que tous les medicamēts cauſtiques ſoyent poignants à la langue: Car les ſeptiques, qui en ſont vne eſpece, ſont fondre tout & principalement la chair douillette, ſans faire douleur, comme dit Galē au chapitre 14. du cinquieme des ſimples. Or tout ce que vous alleguez en voſtre page 50. & 51. s'entend des medicaments cauſtiques, lesquelz en bruſſant ſont vne eſchare, ou cruſte, & nō de ceux qui ſont nommez particulièrement ſeptiques, lesquelz n'en ſont point, comme eſcrit Galen au meſme chapitre. Eſtre cauſtique & n'eſtre point poignant ne ſont point choſes contraires: car l'un & l'autre peut eſtre en vn meſme ſubiect: le texte de Galen au meſme chapitre le monſtre quand il dit: Si d'auantage il eſt cauſtique ſans vehemēce & qu'en outre il ſoit d'une ſubſtāce deliée, il ſera du tout ſans aucune pointure & morſure: ou

il fondera les parties charnues avecque vne bié petite douleur & pointure. Pour prouuer encores d'auantage vostre intention & mon-
 strer que l'Antimoine n'est point tel, vous di-
 tes *qu'estant auallé en l'estomach avecque la con-
 serue de rose, il ne laisse aucune alteration de cha-
 leur, ou seicheresse, ne le debilité point, tesmoins en
 sont ceux qui en ont pris.* Tous ceux qui en ont
 pris n'en pourroyét porter tesmoignage: car
 ceux qui en sont morts n'en parlerôt iamais.
 Quant est des autres qui par vne bonté de
 nature en sont eschappez, ils en pourront tes-
 moigner, mais non pas tous esgallement.
 Ceux qui en ont pris en quantité & souuent
 scauent bien à quoy s'en tenir, bien qu'ils
 eussent la nature forte: les autres qui en ont
 pris moins, & n'y sont retournez n'en scau-
 roient parler que bien peu, si ce n'est que par
 les accidens d'une petite quantité prise vne
 seule fois, ils ayent fait iugement du demou-
 rant. Mais passons oultre, & venons à cest ar-
 gument que vous tirez des Discours de vo-
 stre 52. & 53. page, lequel est au commence-
 ment de la 54. en ceste maniere: *Et pour cōclure
 ceste opinion, dites vous, ie feray cest argument
 suyuant vostre liure. Tout corps terrestre estant
 chaud & de nature veneneuse pour quelque petite
 portion qu'on puisse prendre necessairement meine à
 la mort: L'Antimoine est corps terrestre chaud &
 venimeux, comme vous dites. Ergo il meine ceux
 qui en ont pris à la mort. Vous voulez conclure*

par cest argument vn tel inconuenient, que s'il estoit ainsi que l'Antimoine fust poison, tous ceux qui en ont pris seroyent morts : & que n'estans point morts, il s'ensuit qu'il n'est point poison . Aussi le pensez vous dire par l'argument qui suit apres, en tels mots : *Tout corps metalique calciné est poison, qui pour quelque petite portion qu'on puisse prendre, meine à la mort & tue celuy qui l'a pris. L'Antimoine est corps metalique calciné, qui pour petite qualité que l'on prend, ne meine point à la mort comme l'experience le mōstre par infinité des personnes & par vous mesmes, Ergo L'Antimoine n'est point poison selon vostre premiere definition.* Le lecteur pourra aisement iuger par cest eschantillon de vostre liure, quel peut estre le demeurât de la piece. Premièrement la maieur du premier argument est faulse estât prise comme vous la prenez: car il n'est pas necessaire que pour vne petite portiō de venin terrestre & chauld entré dedans le corps, la mort en ensuyue: autrement celuy qui prédroit vn grain de Sublimé mourroit necessairement. Ce qui est faux, voire & en prist-il quatre. Car la nature est assez suffisante pour en estre maistresse & pour le chasser dehors. Aussi quād Galen dit que la moindre portion des venins que nous nommons mortels, estant entree dedans le corps, le change incontinent: ne pēsez pas qu'il vueille entendre vne si petite quantité qu'il ne vueille quant & quāt que la vertu d'iceluy soit pro-

portionnée à la chaleur naturelle cōme nous auons desia dict au premier chapitre. Seroit-ce biē dit: Vn grain d'Arsenich ou de Sublimé q̄ Socrate a pris, ne l'a poit fait mourir: Ergo l'Arsenic & le Sublimé ne sont point poisons? Recorrigez, donques vostre maieur & dites: Tout corps terrestre estant chauld & de nature venimeuse, & estant pris en petite portion, necessairement meine à la mort, si ce n'est qu'il soit dompté par la nature, ou par contrepoisons. Cela ainsi racoustré, il m'est facile de tirer ma mineur & conclusion laquelle fera vrāye, ainsi: l'Antimoine calciné est vn corps terrestre, chauld & de nature venimeuse: l'Antimoine donques estāt pris en petite portioñ necessairemēt meine à la mort, si ce n'est qu'il soit dompté par la nature, ou par contrepoisons. Quant est de vostre second argument, i'ay pris peine autant qu'il m'a esté possible de le faire aduouer par les Dialecticiens premieremēt que d'y respondre: mais onques il ne m'a esté possible d'en venir à bout, & disent qu'il ne vaut rien: ains qu'il est suffisant pour vous faire desgrader de vostre maistrise es arts, (s'il est ainsi que vous soyez maistre) & vous faire nōmer seulement messire Lois, & non maistre Lois: car il peche, comme ils disent, *in modo & figura*, & auez meritē demie douzaine de coups de fouet sur vostre eschine. Et afin que ie vous en die libremēt ce qui en est, vous vous estes

Launay
ignorāt en
Logique.

monstré, sauf vostre maistrise, vn grád asne, & fort mal disposé à disputer des choses, puis que ce baston vous defaut. Or encores qu'il semble mal seant de mesler icy les reigles des Dialecticiés, si est-ce q̄ie ne laisseray à vous remonstrer vostre faute, à celle fin qu'une autrefois vous ne soyez si impudent à escrire. Les Dialecticiens ont trois figures ausquelles ils rapportent la façon de tous leurs arguments. Ils disent qu'en la premiere figure on ne peut rien faire si la Mineur Propositiō ou Assumptiō n'est affirmatiue: dōt il ensuit que vostre argument n'y peut entrer: car la mineur proposition est negatiue. Ils disent d'auantage que l'argument est tousiours vicieux en la troisieme figure, si ceste proposition mineur est negatiue: parquoy ie pense que vous n'y voudriez pas rapporter le vostre, si ce n'est que de ceste heure vous le voulussiez confesser vicieux. Voyons donques si la seconde figure le voudra aduouer & receuoir. Premièrement ils disent que la dispositiō de vostre argument y contreuient: car ce q̄ vous prenez pour moyen ne se peult dire de l'une & l'autre partie de la question. D'auantage, il n'y a que deux manieres en la seconde figure où les propositions soyēt affirmatiues & vniuerselles, comme est la vostre, asçauoir la seconde nommee Camestres: & la quatrieme nommee Baroco. Or ne trouuez-vous point en Camestres & Baroco que la mineur ou af-

sumption, la premiere desquelles doit nier vniuersellement, & l'autre en partie, desroge à la maieur comme fait la vostre, laquelle demeurant vraye, rend la maieur faulse. Bref, vous ne trouuez point que iamais on ait tiré vne conclusion vallable de deux contraires, comme sont vostre maieur & vostre mineur: l'vne desquelles afferme que tout corps metalique calciné est poison, & l'autre dit que l'Antimoine est vn corps metalique calciné, & toutesfois n'est poison. Aussi auez-vous vne reigle en Dialectique que tout ce qui veritablement se dit du general, se dira aussi de tous les particuliers, compris sous telle generalité: tellement que quand nous disons que tout corps metalique calciné est poison: il s'ensuit quant & quand que l'Antimoine preparé est vn poison: puis que c'est vn corps metalique calciné. Aduisez donques, gentil maistre és arts, à trouuer vne estable à part pour vostre argumēt, puis qu'il ne peut compatir avecque les autres: ou bié recorrigez-le en la seconde impression de vostre liure, & en ce faisant confessez que vous estes vn ignorant. Mais reuenons à nostre propos & examinons la suffisance de ce que vous alleguez contre ceste mienne proposition: Tous metaux, ay-ie dit, froids & secs de leur nature deuient caustiques, c'est à dire brulans, par la calcination. Et vous dites au contraire en vostre page 55. *S'il est ainsi que tout metal*

calciné soit caustique par leur calcination, le plomb
 brulé sera caustique. Ce qui n'est pas, comme on peut
 iuger par les effets qui en sortent. Vous faites deux
 fautes en ceste responce. La premiere viét de
 calomnie, & l'autre d'ignorance. La calomnie *Faulte de*
 est en ce que vous me voulez faire accroire q̄ *calomnie*
 j'ay dit que tous metaux calcinez deuiennent *de Lannay*
 caustiques, & toutesfois j'ay seulement parlé
 de ceux qui sont froids & secs, ce que le plôb
 n'est pas: car il a vne grande quantité d'humidi-
 té aqueuse, comme nous auons dit. Et quád
 ores ainsi feroit, que i'aurois voulu compren-
 dre le plomb, si est-ce que vostre ignorance
 est grande en ce que vous niez que le plomb
 brulé n'est pas rendu caustique, ie dis à la cõ-
 paraison de celuy qui n'est pas brulé. Car
 Dioscoride dict au chapitre du plomb brulé,
 qu'il a les mesmes facultez que le plôb laué,
 excepté qu'il est beaucoup plus poignant.
 Qu'est-ce le plomb brulé estre fait plus poi-
 gnant, sinon auoir desia acquis par le feu le cõ-
 mencement d'une faculté caustique? Ie sçay
 bien que le plomb brulé seiche & refroidist,
 mais quand est-ce? apres qu'il a esté laué: tout
 ainsi que le cuyre brulé auant qu'estre laué
 retiét vne vertu catheretique, comme a escrit
 Galen. Ce n'est donques pas vne faulse pro-
 position de dire que tous metaux calcinez
 deuiennent caustiques, c'est à dire acquie-
 rent vne vertu de feu, tant par la generale
 que par la particuliere calcination: toutesfois

Comment tous métaux sont froids en leur dehors. plus ou moins selon les degrez d'icelle. Pour ceste cause j'ay escrit en mon Discours que tous métaux estoient froids en leurs dehors, c'est à dire qu'ils apparoiſſent froids quand on les touche, à raison des parties aqueuses dont ils sont faits & composez. Mais quand elles sont absentes par le moyen de la calcination, il y demeure vne grande chaleur: car par la calcination l'humidité est ostee, & par consequent vne grande partie de la froidure: d'autant que l'humidité & la froidure ont principalement vn mesme subiect en la composition des métaux, aſcauoir l'eau, laquelle s'elapoure lors que le feu penetre par toutes les parties de ce qui est calcine. Ceux qui ont la ceruelle mieux faite que vous n'auiez, entendent facilement ceste proposition, & ne demadent point vn Oedipe pour la leur expliquer: car elle est fondee en raison naturelle & apparente. Aussi ne diront-ils pas, comme vous, que le chaud & le froid ne peuuent estre ensemble, & par cōſequent que les métaux qui sont froids de leur nature, n'ot point de chaleur. Car s'il estoit ainſi comme vous dites, il s'enſuyuroit qu'en la composition des corps naturels il n'y auroit point de chaud & de froid ensemble: ce que toutesſois perſonne de ſain iugement ne voudroit nier. Voila doncques comment (ce que vous demandez en la fin de voſtre page marquee 56) la chaleur des métaux apparoiſt, & comment leur

froidure

froidure s'en va avecques l'humidité. Si vous ne le pouuez entendre, comme vous dites, ie n'y sçauois q̄ faire : car ie n'ay pas entrepris de faire d'un buyart un espreuier : & me suffit de rendre raison de mon dire, à ceux qui sont capables & entendent les choses naturelles.

Nous auons assez parlé de ceste vertu caustique donnée à l'Antimoine par le moyen de vostre calcination, il nous faut venir maintenant à l'endurcissement que vous en faites. Et pourautant qu'en vostre page marquée 57. vous soustenez a toute-reste qu'il n'est point endurcy : ie confirmeray mon dire par raison, puis ie respondray à vostre obiection. Or est il manifeste que toutes choses qui se desseichent s'endurcissent : car la seicheresse est cause de leur dureté, tout ainsi comme l'humidité l'est de la mollesse. Nous nommons les choses dures, lesquelles n'obeissent point au toucher, & les molles celles, lesquelles y obeissent. On entend obeir lors que les parties pressées s'enfoncēt en elles-mesmes, sans changer de place, non pas en la maniere que l'eau qui est imbecille, obeit à la pierre, ou à la nauire : à sçauoir lors qu'elle se fend & s'ouure : mais ainsi que la paste obeit au poing du boulenger : Car ainsi l'explique Aristote au quatrieme liure des Meteores. La dureté procede és corps à raison du sec terrestre : comme la mollesse reussit de l'humide aërien, si bien que les corps, lesquels participent le

Quel' Antimoine est endurcy par la calcination.

moins de ceste substance humide, sont les plus durs & les moins obeissans. Or est-il ainsi que toute chose calcinee à moins de ceste humidité aërienne que lors qu'elle n'auoit encores passé par le feu, dont il s'ensuit que toute chose calcinee est endurcie. Voicy ce que vous escriuez au contraire : *Quand à la calcination, par laquelle vous dites que l'endurcy l'Antimoine, & luy donne vertu de feu : le cry que, vostre reuerence sauue, ne veistes iamais calciner. Car tant s'en faut qu'on endurecisse le metal que lon calcine, que de dur : on le rend en cendre. Car calcination n'est autre chose qu'une reduction d'une chose seiche en pouldre, luy ostant son humidité par feu, qui entrenoit & lioit ses parties terrestres.* Voila vos paroles, par lesquelles les le-

cteurs pourront aisement iuger que vous estes aussi bon Philosophe naturel comme bon Dialecticien. Je laisse à penser si les choses dures mises en pouldre deuiennent molles. Et si ceste consequence est bonne : l'Antimoine par la calcination est mis en cendre : il est donques amolli. Qui vous a appris, maître Asne, que la cendre ou la pouldre destituee de toute humidité est molle? auez-vous veu onques vne mollesse sans humidité? pensez-vous que le Diamant mis en pouldre soit amolli, sous ombre que vous pouuez mettre le doigt dedans la pouldre, & non dedans le Diamant entier? qu'à la pouldre de Diamant ou d'Antimoine obeit, c'est par change-

*Ignorance
de Launay*

ment de lieu & non en soy. Si vous auez tant soit peu de iugement naturel, vous trouuerez que la pouldre de Diamant, ou d'Antimoine ou d'autre chose dure, n'est aucunement differente d'auec la chose dont elle est poudre, sinon qu'elle comprend en plusieurs pieces ce qui estoit amassé en vne seule: mais si pour cela vous dites que la substance en ait esté rendue plus molle, il n'est celuy qui ne vous en demeute: car estre mis en poudre, & estre amolli, n'ont rien de commun. I'ay certainement honte qu'un homme qui fait profession de medecine, tombe en cest inconuenient qu'il soit contraint de confesser ne scauoir que c'est d'estre dur & mol: & toutefois qu'il soit si effronté de mettre la main à la plume pour escrire d'une chose, en laquelle les petis enfans mesmes le peuuent descouurir & arguer de bestise. Vous descouurerez vostre faculté encores plus manifestement, quand vous dites au commencement de la page marquee 58. que ce qui demeure de vostre Antimoine apres vostre calcination, est vne terre plus pure & nette. Vous l'expliquez plus au long en la fin de la page suivante: *Seulement par la calcination, dites-vous, les parties immundes & sulphurees de l'Antimoine saillent hors, & ne laissent que la pure terre nette & seiche, sans qu'humidité aucune la lie* Estant ainsi que vous dites, ie concludray quant & quant qu'il est endurcy: car la con-

sequence est bonne: il n'y a que la simple terre qui demeure sans qu'aucune humidité la lie: il est doncques endurcy. Et, comme j'ay dit en mon Discours, il est réduit contraire à la bonté des medicaments. Voyez maintenant comment faulte d'entendre que c'est que d'estre dur, vous vous contrariez, & sans y penser vostre plume confesse en escriuant ce que la lourdesse de vostre teste ne peut, ou ne veult cōprédre. Cecy se manifeste encores d'avantage en ce que vous confessez vous-mesme que tout corps calciné est plus fixe que celuy qui ne l'est point, dont de rechef ie tire ceste consequence: l'Antimoine calciné est plus fixe q̃ l'Antimoine nō calciné: il est doncques endurcy: c'est à dire il est rendu plus dur qu'il n'estoit au parauant. Ceste proposition s'entend nō seulement de la calcination speciale, mais aussi de la generale, laquelle est vn degré pour paruenir à la speciale. Or non seulement ceste durescé, mais aussi la façon par laquelle vous preparez vostre Antimoine & l'apparence du corps qui reussit de telle preparation m'a fait dire en mon Discours qu'il estoit quelque maniere de voirre, pour le moins au premier degré. Et que d'autant que tout voirre qui est de nature seiche, est contraire à nostre humidité naturelle, il falloit aussi que par telle preparatiō vostre Antimoine fust rendu plus contraire. Et qu'il ne soit ainsi qu'il ne tiēne de la nature de voirre,

*Comment
l'Anti-
moine pre-
paré est v-
ne manie-
re de voir-
re.*

la maniere par laquelle vous le preparez le descouure. Et la premiere inuention de faire du voirre, escrite par Pline, nous en peut donner quelque assurance. De Nitre & de sable fondus ensemble sur le riuage de la mer il se fait vn corps diaphane ou trāsparent, qui fut cause que depuis on apprit à faire du voirre. Et vostre Borax, cōme vous dites, meslé parmy la chaux de l'Antimoine, assemble ceste chaux avecques l'Antimoine crud, que vous y remeslez : tellement que de ces trois corps il s'en fait vn tiers diaphane & bien net. Ainsi par vos parolles mesmes vostre Antimoine preparé est fait semblable au voirre: non seulement en apparence exterieure & à la veüe: mais aussi en vertu & faculté interieure. Car que peut estre ceste chaux d'Antimoine sinon vn corps plus sec qu'il n'estoit auant q̄ d'estre fait chaux? Vous ne pouuez nier que ainsi ne soit, & par cōsequent que vostre preparation ne soit mauuaise, par laquelle vostre medicament, lequel doit purger, est rendu plus sec & plus contraire à la nature humaine qu'il n'estoit au parauant. Vous me voulez faire accroire en ce passage que i'ay fait vne telle consequence : Le voirre tue les chiens : il tue donques l'homme. Ce qui est vne aperte calomnie, laquelle procede de malice euidente: car i'ay seulement dit que vostre Antimoine approchoit de la nature du voirre, & que par consequent il estoit rendu

*Calomnie
de Lannay*

plus sec par vostre preparatiō; que la ou vous voudriez bailler du voirre broyé à vn chien, vous verriez comment ses operations approchent de celles de vostre Antimoine. Regardez si de ce passage vostre cōsequēce est bien tirée: & si ce ne sera pas à bon droit que les lecteurs vous iugeront estre vn calomniateur. Et quāt ores ainsi seroit, si auriez vo^r a prouuer que le voirre n'est point contraire à l'hōme & qu'il ne l'offence point. Je sçay bien que quelques vns en auallent: mais vous ne dictes pas qu'elles offences ilz se font. Or n'est il pas question de sçauoir si le voirre tue le chien, mais de monstrier que vous vitrifiez vostre Antimoine, & que par consequent vostre preparatiō est illegitime. Aussi monstrez vous bien que tout ce que vous faites en icelle, n'est à autre fin sinon de faire de vn corps opaque & vmbreux, vn autre corps diaphane ou trās lucide & trās parant, n'ayant esgard si en ce faisant vous corrigez la malice de vostre Antimoine, ou si vous l'augmētez. Car quād vo^r baillez la raison de vostre preparatiō es pages marquees 60. & 61. vous dites: *Que pour corriger la grande sicheresse de la chaux d'Antimoine, ainsi calciné: laquelle ne demande q'humidité naturelle, & qui ne se pourroit assembler autrement. Nous ne pouuons mieux assembler, dites vous, nostre chaux d'Antimoine que par vne humidité à luy familiere, qui est celle du crud: & d'autant qu'on n'en met gueres, & que son humidité ne suffiroit à conioindre tant de parties ter-*

restres & si seiches, nous y adionstons le Borax, lequel les lie ensemble, & fait qu'en les fondant ensemble, il sort vn corps diaphane: à cause que l'humidité tant de l'Antimoine crud que du Borax se ioinnent avecque ceste cendre calcinee, bien purgee. Et le crud aussi qui auparauant qu'il se ioinnist, estant dedans le feu d'effusion, iette son soulfhre excrementeux & sordide en se purifiant: & ainsi se fait vn corps diaphane & bien net de ces trois corps. Voila la cause & raison que vous rendez de vostre preparation, l'intention de laquelle ne tend ailleurs, sinon de faire vn corps diaphane ou trāsparant & non de corriger la malice de vostre Antimoine, qui doibt toutesfois estre l'intentiō du medecin. Car si vous auiez enuie de corriger ceste grande seicheresse de vostre chaux par la meslange d'Antimoine crud, pourquoy l'auiez vous tant seichee que vous soyez apres cōtraint d'y remettre ce que vous en auez osté? Si c'est pour conioindre ces parties terrestres, & en faire vn corps diaphane, comme vous dites, qu'elle necesité vous contraint de ce faire? cest amas & transparence le rendra elle meilleur? Item, si vous auez calciné l'Antimoine pour en otter les parties impures & sulphurees, comme vous dites, lesquelles le rendent mauuais, pourquoy y remettez vous le crud qui est impur & plein de soulfhre? Vous pensez aucunement respondre à cecy, quand vous dites qu'estant dedans le feu d'effusion, il iette son

soulphre excremēteux & sordide : mais vous ne pouuez nier qu'il n'y en demeure : car s'il n'y en demouroit point, & qu'il fust bien purifié, il faudroit qu'il fut paruenü à ceste seicheſſe de voſtre chaux, & qu'il ne ietaſt plus de fumee . Or s'il paruenoit à telle ſeicheſſe eſtant dedans ce feu d'effuſion , en vain luy mettriez-vous pour, par ſon humidité, corriger la ſeicheſſe de la chaux premiere. Mais il eſt ainſi, cōme vous confeſſez, que ſon humidité lie ceste chaux : & l'experience nous monſtre qu'il rend encores de la fumee: il enſuit donques qu'en ce corps diaphane il ya de l'impurité & du ſoulphre excrementeux. Et par conſequent que ce que j'ay dit en mon Diſcours eſt vray , aſſauoir qu'en adiouſtāt de l'Antimoine crud en voſtre preparation, derechef vous gaſtez ce qui vous à fait tant de peine à nettoyer. Ceste raiſon a eſté parauanture cauſe que Matthiola recorreſſe ſa preparation en la derniere impreſſion de ſes commentaires : car il n'y adiouſte aucunement d'Antimoine crud.

Quant eſt de la meſlange que vous faites du Borax, nous en parlerons cy apres. Le ſçay biē toutesfois que vous auez recours à voſtre negatiue , & dites en voſtre page marquee 58. qu'encores qu'il rende ce ſoulphre de mauuiſe odeur, ce n'eſt pas à dire qu'il ſoit veneneux & dāgereux: Vous confeſſez bien, dites vous, par maniere de parler qu'il eſt ainſi:

De la fumee que ieſte l'Antimoine lors qu'on le prepare

mais vous ne l'aduouez pas, d'autât que vous vous assurez l'auoir préparé, & attiré de sa fumee par le nez & par la bouche sans encourir aucun mal, Dieu mercy, & que pour cela vous ne laissastes à soupper aussi bien & de aussi bon appetit que vous feistes iamais. C'est vn grand cas que cest Antimoine vous soit ainsi familier qu'il vous puisse augmenter l'appetit. Et toutes fois nous voyons les autres qui l'ont préparé en parler tout autrement. Mesmes Matthioli vous en aduertist. Et feu monsieur Syluius, que vous nous voulez faire penser auoir esté vostre maistre, en escrit, cōme il ensuit, en l'annotation qu'il a faite sur l'huile des philosophes: L'huile des philosophes, dit-il, c'est à dire des Chymistes ou Alchemistes, lesquels par leurs escrits & par leurs paroles ordinaires se nomment par tout philosophes: Et encores (ce qui est digne de merueille) ils assurent qu'ils sont seuls philosophes: d'autant qu'ils recherchent la nature des choses fort cachees & retirees dedans les entrailles de la terre: qu'ils entendent les moyes par lesquels les metaux s'engendrent & s'augmentent en la terre: qu'ils cherchent soigneusement & subtilement les facultez & vert^{es} des corps terrestres: Et d'autant qu'ils font resouldre ces corps en leurs elements, qui est certainement vne chose facheuse & de grand labeur, & digne d'estre admiree, si elle estoit par tout vraye. Car si l'in-

uention est d'autant plus excellente qu'elle
 est des choses plus belles & plus precieuses
 & grandes, qui est celuy qui ne void ceux-la
 estre dignes de grande louange, lesquels non
 seulement a grands frais, mais aussi avecque
 le danger de leur propre santé, retirét cōme
 hors du regne de Pluton ou des enfers, les
 choses qui sont incogneuës à noz sens? Ven
 que toutes ces choses, comme tirees de la ca
 uerne de Pluton, iettent vne fumee espaisse,
 pestilentielle ou venimeuse à tout animal
 viuât (excepte aux Pyraustes) & mesmes en
 cores aux plantes. Ce que nous voyons adue
 nir ordinairement par les exemples que nous
 en baillét les chymistes, les orfebures & les
 fondeurs de lettres. Car par la meschante &
 espaisse vapeur du vif-argent & des autres, il
 font soudainemēt suffoquez: ou peu à peu ils
 endurent vne grande imbecillité des nerfs, à
 cause de leur cerueau qui est interessé, si ce
 n'est qu'ils facent sortir dehors par vne che
 minee large & ample, ceste fumee, laquelle a
 fait mourir & seicher les arbres prochains, nō
 plus ne moins que s'ils auoyent esté touchés
 de la fouldre. Mais il se couue la plus grande
 imposture du mode parmy ceste maniere de
 gens, principalement lors qu'ils s'efforcēt de
 faire croistre ou trāsformer les metaux en ti
 rant de tous costez des escus, ou des chefues
 d'or. Voila ce qu'en escrit Sylui⁹, le quel pour
 le moins auoit mieux experimenté que vous

la malineté des metaux, & voyoit ordinairement en ceste ville les fondeurs de lettres, lesquels ne se plaignoyent entre autres choses que de la mauuaise & venimeuse fumee de l'Antimoine, dont ils vsent en quâtité. Si vo^s sçauiez le moyen d'euitier ceste malice & de entrer en appetit par la fumee d'Antimoine, ie m'asseure qu'il ya en ceste ville vne douzaine de fondeurs, lesquels vous feront eriger vne statue toute faicte d'Antimoine, & lesquels vous donneront vn si bõ pot de vin, (si de grace vo^s leurs faites ceste faueur que de leur apprendre) qu'il ne sera iamais que vous ne vous souueniez d'auoir fait vn si bel œuure. Vous voyez comment l'autorité de celuy que vo^s dites auoir esté vostre maistre, & l'experience ordinaire vous desment de ce qu'auiez escrit. Le reconferme donques maintenant ce que i'ay dit en mon Discours, asçauoir que telles vapeurs venimeuses ne peuvent proceder que d'vn corps venimeux, & qu'à bõne cause i'ay soustenu que l'Antimoine est venimeux. Et pourautant q̃ vous pouuiez respondre que tel venin s'absente en la preparatiõ avecque les fumees qui en sortët, i'ay dit que l'esprit fixe, c'est à dire celuy qui ayde à parfaire la substâce de chasque corps, & qui iamais ne l'abādõne iusques à ce qu'il soit du tout corrompu, demeueroit tousiours en vostre chaud: & qu'il ny auoit que le volât lequel quittoit la place. Cest esprit volant est

celuy, lequel est principalement appuyé en l'humidité, lequel accompagne ordinairement les vapeurs, & lequel se communique facilement au flet, asçauoir és corps qui sont odorans.

*Sommaire
conclusion
de l'Antimoine
calciné.*

Ces choses ainsi deduites, la proposition de mon argument demeurera confirmée & vraie, tant par authoritez que raisons : asçauoir que l'Antimoine calciné est rendu plus sec, qu'il est plus endurcy, & acquiert vne vertu de feu. La mineur où seconde proposition suit incontinent apres, sçauoir est : Or estre rendu plus sec, estre endurcy, & acquérir vne vertu de feu, sont trois choses qui tant s'en faut qu'elles rendent vn médicament meilleur, qu'au contraire elles le rēdent mauuais : Parquoy la calcination ne rend point l'Antimoine meilleur, mais au cōtraire elle le rend pire. Ceste mineur est appuyée nō seulement en l'authorité de tous les anciens, comme de Hippocrate, Galen, Mesué & autres : mais aussi en la raison naturelle. Car comme ainsi soit que tous les médicaments purgeants ont vne contrariété à nostre nature : non en ce qu'ils attirēt & purgēt les humeurs, enquoy faisant ils nous deschargēt : mais en ce qu'ils ont vne accordance & familiarité qui nous contrarie, par laquelle ils attirēt les humeurs lesquels nous offensent : Comme ainsi soit, dis-ie, il ny a point de doubte, que ceux lesquels avecque ceste cōtrariété naturelle ont

d'abondant acquis vne malice en leurs premieres ou secondes qualitez, ne foyent plus mauuais que ceux qui n'en ont point acquis. Or est-il necessaire de cōfesser que ce qui est endurcy, rendu plus sec, & qui a acquis vne vertu de feu par la calcination, est plus mauuais que ce qui n'en a point acquis: d'autant que nostre nature, ou plus-tost nostre vie gist en chaleur, molesse & humidité naturelle moderee, nō en chaleur de feu, durescé & seicheresse: Parquoy l'Antimoine endurci, rendu plus sec & ignifié par la calcinatiō est fait plus mauuais, qu'il n'estoit auant qu'il fust calciné. Car il ne se peut délayer estant entré en l'estomach, ce que les bons medicaments font pour enuoyer leurs vapeurs par dedans les veines, comme il a esté annoté par Christofle a Vega en son second liure de l'art de medeciner, là où mesmes il allegue le problème d'Aristote, duquel il retire que l'argēt, le cuyure, & les autres de pareille espee, ne peuuent estre medicamēts, pourautant qu'ils ne peuuent estre délayez en l'estomach. le problème est le 43. du premier liure. Et ainsi demeurera ceste mienne consequence en son entier & suffisamment prouuee: (nonobstant vostre babil) par laquelle j'ay dit que la calcinatiō ne rend point l'Antimoine meilleur: mais qu'au contraire elle le rend pire. Aussi pensé-ie que vous ne vouldriez pas donner plus grande prerogatiue à vostre Antimoine

reduit en chaux, qu'à l'or mesme: lequel, comme escrit Auerrois, estât réduit en chaux, est vn venin de toute sa substance, lequel change le corps de tout en tout, & ne peut estre aucunement medicament. Ce sont les mesmes paroles d'Auerrois au chapitre des venins, liure cinquieme de son Colliget. Si ces arguments & preuues sont si mal à propos, comme vous les faites, ie vous prie de faire les vostres premierement selon que l'art le commande: puis monstrier en quoy les miens sont defectueux.

Chapitre troisieme, auquel il est monsté, Que le Borax n'a aucune propriété de corriger la malice de l'Antimoine.

DVIS QUE nous auons mis fin à la correction artificielle que l'on fait de l'Antimoine, il faut entrer à celle qui est faite par meslâge d'autre medicament. Car c'est l'autre poinct par lequel nous auons monsté en nostre Discours que la preparation que vous faites ne peut estre legitime: toutesfois auant que d'entrer en matiere, ie suis cōtraint de vous appaiser vn peu, & empescher ces ruades que vous baillez à tort & à trauers, au cōmencement de vostre section. Au 20. fucillet de mon Discours, là où ie traite ceste questiō, i'ay escrit que le Borax, que les anciens appellēt Chrysocolle est poison,

& qu'estât poison, il ne pouuoit auoir la vertu de corriger vn autre poison, tel qu'est l'Antimoine: toutesfois que vo^r auiez eu recours à vne negatiue, disant, que nostre Borax n'est pas la Chrysocolle des anciens: mais vn médicament composé fait de Nitre. I'ay pris ceste responce en payement, & ne m'y suis arresté: ains ay passé plus oultre: i'ay disputé de la nature du Nitre, & ay monstté qu'il ne pouuoit corriger l'Antimoine.

Auant que d'y entrer, ie vous ay seulement en passant dit qu'Agricola auoit escrit le contraire, & quil disoit que le Borax que l'on fait maintenant à Venise est nommé Chrysocolle, pourautant que veritablement c'est la Chrysocolle. La questiō donques n'est pas asçauoir si le Borax est la Chrysocolle ou nō: si bien qu'il est facile à voir que vous la detorquez calomnieusement, pour faire vostre cause bonne: & ressemblez les importuns aduocats, lesquels on ne peut iamais faire venir au poinct. toutesfois à celle fin qu'il ne semble que i'aye inuenté à mon appetit ce q^{ue} i'en ay dit: ie confirmeray ce qui en est escrit en mon Discours.

Il ya deux manieres de Chrysocolle, l'vne naturelle & l'autre artificielle. Dioscoride *De la Chrysocolle* parle de la naturelle en son cinquieme liure, *le & de ses differences.* & dit qu'elle est de couleur de poreau. L'artificielle est double, l'vne faite avecque la naturelle, qui est dure & est coloree avecque

l'herbe que Plin nomme Lutea: La seconde est faite de cuyure de Cypre, de l'yrine d'un enfant & de Nitre, cōme escrit Agricola au 3. liure de la nature des choses que l'on tire de terre, La maniere de faire ceste Chrysocolle est escrite par le mesme Agricola en son liure 11. de la chose metalique en ces mots: Mais le Nitre tant naturel qu'artificiel est cuit dedās les mesmes chaudieres, apres qu'il a esté tēperé dedans les cuues avecque de l'yrine d'un ieune garçon. Apres qu'il est cuit on le verse dedans les cuues, dedans lesquelles il ya des filets de cuyure, contre lesquels il s'attache & s'endurcit, & est fait Chrysocolle, laquelle nous nommons Borax d'un mot barbare. Il nomme encores le Nitre artificiel au neuvieme liure, du nom de Chrysocolle. Et au troisieme de la nature des choses que l'on tire de terre: On fait encores, dit-il, un autre Nitre artificiel avecque celui que l'on tire de terre, lesquelles Arabes nomment Tincar. De moy j'ay accoustumé de le nommer (comme j'ay dit) du mot Grec Chrysocolle, cōme veritablement ce l'est: & Borax d'un mot Arabe. Et pour ceste cause Christofle Encel dit que ceste Chrysocolle est presque une espece de Nitre. Agricola & Encel remarquent les lieux ausquels on trouue de chascque espece de Chrysocolle en plusieurs endroits de l'Allemagne. Ainsi doncques ayant leu ces passages & voulant parler du Borax ie vous

ay aduertty en mon discours qu'il sembloit qu'en niant nostre Borax n'estre l'une des especes de Chrysocolle des anciens : estoit aucunement contredire a ces autheurs. Et toutesfois tout ce que vous alleguez au contraire en vos pages marquees 63. & 64. n'est aucunement à propos. Car vous prouuez seulement que le Borax, duquel vsent nos orfeures, n'est pas la Chrysocolle naturelle des anciens. Et quand ce vient à l'artificielle, de laquelle vous parlez en la page suyuant, vous ne prouuez aucunement que nostre Borax ne soit la seconde espece de Chrysocolle artificielle : ce que toutesfois vous deuez prouuer, si vous auiez si grande enuie de me cōtredire. Car tout ce que vous dites des Verdets, lesquels sont acres & de mauuaise saueur, n'est pas à propos, d'autāt que ie n'ay pas dit que le Verdet fust le Borax. Et la cōsequēce ne vaut riē de dire, tous les Verdets desquels les orfeures vsent, sont verds acres & de mauuaise saueur: toutes les Chrysocolles donques sont vertes, acres & de mauuaise saueur. Aussi ie vous auois dit en mon Discours, qu'Agricola adioustē qu'il ne se faut arrester à la couleur : car puisque lon la luy baille par le moyē d'une herbe, il n'y a point de doute que ceste couleur n'en puisse estre hors, lors que ceste herbe n'y est adioustee: & toutesfois ne laissera pas d'estre Chrysocolle, & auoir les mesmes facultez & vertus.

Mesmes Philandre, lequel a commenté Vitruue, & lequel vous alleguez, escrit qu'il a veu à Venise de la Chrysocolle de quatre couleurs, l'une blanche, l'autre iaulne, l'autre verte, & l'autre noirastre. Si vous eussiez bien leu Matthioli sur le chapitre de la Chrysocolle de Dioscoride, vous eussiez trouué comme il n'est pas necessaire que toute Chrysocolle soit verte: & que mesme il aduient quelque fois q̃ la naturelle diuersifie en couleur, selon la diuersité des metaux, entre lesquels elle est prise. A plus forte raison donques en pourrons-nous dire autant de l'artificielle, laquelle peut diuersifier en couleur, selon la volonté de l'ouurier. Autant vous en diray-ie de la saueur: car ie vous nie qu'il soit necessaire que toute Chrysocolle ait la saueur mauuaise & poignante. Qu'il ne soit ainsi Agricola escrit que le Nitre duquel on fait la Chrysocolle, a si peu d'amertume qu'à peine la peut on apperceuoir à la langue. Or en la fin de la page marquée 66. vous ne vous pouuez tenir de me bailer de vos ruades accoustumées, à sçauoir de me calomnier, & de mentir effrontément, quand vous dites, que peut estre ie n'ay iamais leu Agricola d'autant que il tient constamment que le Borax est fait de Nitre. Et ie vous demande, maistre Baudet, n'est-ce pas le poinct sur lequel ie me suis arresté? n'ay-ie pas escrit au fueillet 20. de mon Discours, ces mots? George Agricola escrit

que le Borax que lon fait à Venise est artificiellement fait de Nitre dur, espais & semblable à vne pierre. Monstrez-moy, ie vous prie, en quel lieu i'ay escrit qu'Agricola a dit que le Borax n'est point fait de Nitre. I'ay bien dit que si vous eussiez esté bon Alchemiste, vous eussiez plus tost soubçonné nostre Borax estre fait de salpetres, sels & aluns, que de Nitre trempé en laiët de cheure, & mis au Soleil, par l'espace de quinze iours, avecques de l'huile d'amende douce, comme vous dites en vostre premier liure : & qu'en disant simplement qu'il est fait de Nitre, c'estoit proposé fausement : car nous voyons qu'il y a autre chose. De vouloir asseurer dequoy il est fait & comment, ce seroit nous vouloir faire accroire que vous avez esté du conseil des Venitiens, lesquels en gardent le moyen, comme vn riche tresor. Si ie suis en doute de ceste proposition, Matthioli a esté le premier qui m'y a fait regarder de pres: Car certainement si le Nitre, duquel les Venitiens font leur Borax, est semblable à celuy que nous auons en nos boutiques, il me semble que ie ne fay point de tort à personne de dire que le Borax n'est point fait de Nitre, c'est à dire, de celuy duquel les anciens vsoyent, & lequél a esté décrit par Dioscoride. Matthioli en escrit comme il s'ensuit. Il y a certainement long temps, dit-il, que lon a desisté de nous apporter du Nitre & de l'Alphronitre,

del'vſage deſquels les anciens ſe ſont fort aidez en leurs medicaments. Et Chriſtoſle Encel eſcrit au chapitre qu'il en fait: Au reſte, dit il, nous ne ſçauons quels eſtoient anciennement les Nitres, & les noſtres leurs ſont diſſemblables & differents. Il le monſtre incontinent apres par la collation qu'il en fait, laquelle nous pouuons aiſémét experimenter. Toutesfois ie ne me ſuis aucunemét aheurté à ces queſtiōs, ains ſeulement i'ay voulu monſtrer que le Borax ne peut corriger la malice de l'Antimoine. Et pour autāt que vous dites qu'il eſt fait de Nitre, ie m'arreſteray à prouuer ce que i'ay dit du Nitre en mon Diſcours. Mais il n'y aura point de danger de vous donner vn coup de fouet, de ce que voulant faire de l'habille homme, & de l'Ariſtarque nouveau, vous dites que vous penſez qu'il y a vne faute en Pline, au cinquieme chapitre du 33. liure, quand il dit que la Chryſocolle eſt teincte d'vne herbe dite Lutea, en couleur iaulne: Et que ce qui vous fait dire qu'il y a faute, c'eſt que la bonne Chryſocolle doit eſtre verte. Vrayement vous eſtes vn ſçauant preſtre, à ce que ie voy. Vous forgez premierement les fautes en voſtre eſprit, & puis vous dites qu'elles y ſont. Mais à celle fin qu'il ne vous ſemble que ie vous impoſe, i'allegueray le texte ainſi qu'il eſt eſcrit en Latin, & puis ie le tourneray en François de mot à mot: *Natiua duritia maximè diſtat,*

*Paſſage de
Pline mal
entendu
par Lannay.*

Luteam vocant. Et tamen illa quoque herba, quam Luteam appellant, tingitur. c'est à dire, la Chrysocolle naturelle est beaucoup differente en dureté, ils la nomment Lutee. Et toutesfois la couleur luy est aussi baillee par le moyen de ceste herbe qu'ils nomment Lutea. Je me doute bien de ce qui vous a abusé: vous avez pensé que les anciens n'auoyent que d'une sorte de Chrysocolle, à sçauoir la verte, encores que si vous eussiez bien leu Matthioli, vous eussiez parauanture trouué le contraire, & l'eussiez retiré du commencement du chapitre de Pline, quand il dit que la Chrysocolle se fait es mines de cuyure, d'or, d'argent & de plomb: & quand Matthioli a escrit que selon la diuersité des mines la Chrysocolle diuersifie en couleur. Si donques vous voulez bien entendre ce passage de Pline, il faut sçauoir qu'il y a deux sortes de Chrysocolle: l'une naturelle & l'autre artificielle, la naturelle est ou verte sortant des veines de cuyure: ou iaune q. sort de la mine d'or: ou blanche qui sort de la mine d'argent, ou de la mine de plomb. L'artificielle aussi reçoit tout autant de differences, selon la difference des veines minerales, lesquelles, comme escrit Pline, sont arrousees artificiellement tout au long de l'hyuer iusques au mois de Iuin & Iuillet. Et oultre toutes ces differences, il y en a encores deux autres, tellement que la Chrysocolle verte artificielle est dou-

*Differēces
de Chrysocolle.*

ble, l'une minérale & l'autre qui est faite avecques l'urine d'un enfant. La iaulne est aussi double, l'une minérale par le moyen de la mine d'or artificiellement arrousee: & l'autre artificiellement teincte avecques l'herbe nommée Lutea, en la façon que Plinè l'a escrite. Si vous eussiez bien entendu ces différences, vous n'eussiez pas estimé qu'il y eust eu faulte en Plinè: car le passage de Plinè s'entend de la Chrysocolle iaulne, tant naturelle qu'artificielle. Parquoy ie vous conseille de retracter vostre phantastique correction pour ceste heure, & si vous n'y entendez autre chose, ie suis bien d'advis que vous ne preniez plus tant de peine. Si vous eussiez esté si grand clerc, comme vous pensez estre, vous n'eussiez fait ceste lourde désmarche. Et n'eussiez aussi voulu faire ce tort à Hermolaus Barbarus & autres, lesquels ont escrit sur ce passage, & toutesfois n'ont apperceu ceste faulte, côme vous, aussi nel'auoyent-il phantastique comme vous. Regardez aussi comment du Pinet qui a tourné Plinè en François, s'est bien gardé de faire telle faulte. Mais reuenons à nostre Borax fait de Nitre.

Nous auons monstré en nostre Discours que le Nitre ne pouuoit corriger la malice de l'Antimoine, par l'argument qui s'ensuit: Toute correction qui se fait par meslange d'autre médicament est faite pour trois rai-

sons : ou pour contrarier à la malice cachée & naturelle du médicament, qui est préparé : ou pour contrarier à ses qualitez premières quand elles sont excessiues : ou bien pour empêcher les inconueniens qui peuvent suruenir de l'usage de tels medicamēts. Or est-il ainsi q̃ le Nitre n'a la vertu & faculté de contrarier à la malice cachée de l'Antimoine, ny à ses qualitez : & mesmes ne peut empêcher les inconueniens qui peuvent suruenir de l'usage de l'Antimoine : Il s'ensuit doncques que le Nitre ne peut corriger l'Antimoine & par consequent que la meslange que vous en faites ne vaut rien. La maieur proposition de cest argument est prise de mot à mot de Mesué, & est approuuée par toutes les escholles de medecine, & par ceux qui en ont escrit : Parquoy le tout gist maintenant en la preuue de la mineur proposition, laquelle estant prouuée par raisons & authoritez, fera naistre vne conclusion nécessaire, en tout & par tout contraire a vostre meslange.

La malice cachée de vostre Antimoine, ou plus tost de vostre chaux d'Antimoine (car c'est avecques ceste chaux que vous meslez le Borax) est celle qu'elle a cōmune avecques tous les mineraux, entre lesquels les sels tirez de terre, comme est le Nitre dont nous parlons, ne peuvent auoir la vertu de corriger ceste malineté naturelle : d'autāt qu'ils participent aucunement de la nature metal-

lique, & sont compris foubz vn meſme genre, a ſçauoir foubz la nature mineralle. Car le Nitre eſt auſſi bien mineral, comme eſt l'Antimoine, & par cōſequent il tient de la nature mineralle, & ne ſçauroit corriger en autruy le vice dont en partie il eſt entaché. Je ſçay bien qu'il eſt beaucoup moins d'ange-reux : mais tant y a que vous ne pouuez nier qu'il n'en retienne quelque choſe: dont il enſuit qu'il ne peut auoir la propriété de corriger ceſte malice naturelle & cachee. La nature animalle & la nature mineralle ſont ſituees aux deux extremittez: tellement que ce qui tient le moyen entre deux eſt la nature vegetalle, qui ſemble participer des deux. Car les vegetaux, cōme les plantes & les herbes, viuent & croiſſent en façon que font les animants : & toutesfois ils ne ſe meuuēt non plus que les minéraux. Parquoy, ſil y a quelque choſe au monde qui puiſſe rendre les minéraux familiers de la nature humaine, qui eſt animalle : certainement il fault qu'elle ſoit priſe en la nature vegetalle. Vous ne reſpondez rien à ceſte raiſon, mais vous paſſez par deſſus, & me demandez en voſtre page 73. (laquelle eſt marquee 63.) ſi l'or mis en pouldre eſt plus familier que celuy qui eſt reduit en eau, ſans eau forte. Puis vous dites qu'il ny a point de doubte qu'il ne ſoit plus familier eſtant reduit en eau: que ceſte reduction ſe fait par le moyen de ſels. Et

que les orfeures purifient leur or avec le ciment royal qui est fait de sels & de brique: dont vous faites ceste conclusion que les sels ont la vertu de rendre les metaux familiers de la nature humaine. Auisez maintenāt que c'est que ie vous respons. Premièrement encores que ie vous confesse toute ceste proposition, si est-ce que vous n'avez rien gagné. Car lors que par le moyen des sels on faict ceste reduction, ou que par le moyen du ciment royal on purifie l'or: les sels & le ciment royal ne demeurent pas avecque l'or purifié: mais ilz sont retirez avec les immondices de l'or, tellement qu'en la partie purifiée il ny a que de l'or. Et toutesfois quand vous meslez le Borax parmy la chaux de vostre Antimoine, le Borax demeure & ayde à faire le corps qui en réussit: Car vous dites vous-mesmes que de trois corps, asçavoir de l'Antimoine calciné, de l'Antimoine crud, & du Borax, il n'en est fait qu'un. Pour ceste raison j'ay escrit en la seconde page du 23. feuillet de mon Discours, q̄ les metaux sont purifiez par les choses qui ont la vertu de ce faire, cōme sont les sels, mais que par ce moyen les parties impures en sont separees, lors qu'ils tirent avecque eux la substance terrienne, & y laissent seulement la pureté des corps. Cela se fait donques non par mélange, de laquelle il est icy question: mais par abstraction & retirement des parties impures. Parquoy tout ce

*Launay se
vante faul-
cement de
auoir leu
Geber.*

que vous alleguez, n'est pas à propos, pour prouuer q̄ le Nitre meſſangé dedans la chaux d'Antimoyne, a la vertu de le rendre familier de la nature humaine. Or pour autant qu'en voſtre page 60. marquee 50. Vous dites que vous ne daigneriez regarder Geber d'auantage pour entendre cecy, veu qu'il y a long tēps que vous l'auez leu : toutesfois que vous ne pouuez entendre comment les ſels tirent la ſubſtance terrienne des metaux, & n'y laiſſent que la pureté des corps. Et pourautant auſſi que vous me demandez ou i'ay trouué que le ſel tire avecque ſoy la ſubſtance terrienne des metaux, ie vo' cotteray le paſſage de Geber, & le vous mettray en françois, à celle fin que les leſteurs voyent comment il ya ſi long temps que vous ne le veſtes, que ie pēſe plus toſt que iamais vous n'en auez ouy parler, ſi ce n'eſt que vous pēſiez avecque Platon (car vous eſtes vn grand Platonique) q̄ les eſprits auāt qu'entrer és corps ayent veu toutes choſes. Geber donques au chapitre 70. où il parle de la preparation de l'eſtain, & du plomb, eſcrit ce qui enſuit : Ces corps eſtans reduits en chaux ſont purifiez en ceſte maniere : ou par les ſels, ou par les aluns, ou par le voirre : c'eſt aſſauoir apres que les corps ſont calcinez, il faut verſer en la chaux d'iceux, de l'eau d'alūs, ou de ſels, ou meſler en icelle du voirre & qu'il ſoit reduit en corps. Vous recommencerez à faire cecy deſſus ces corps autant

de fois & iusques à ce qu'ils apparoiſſent parfaitement mondifiez. Puis il dit rendant la raison de telle purification: *Nam cum sales & alumina & vitrum fundantur fusione alia quam corpora, ideo ab illis separantur, & secum terream substantiam ducunt, relicta sola corporum puritate.*

C'est a dire: Car pourautant que les sels, les aluns, & le voirre se fondent par vne autre fusion que les corps, ils se separent d'iceux, & emmenent avecque eux la partie terrienne, delaisſant la seule pureté des corps. Dites maintenant, maistre asne, ce passage n'est-il pas suffisant pour vous faire confesser q̃ vous en parlez comme vn clerc d'armes, & que iamaïs vous n'avez veu Geber? & toutesfois vous n'avez point de honte de dire que vous ne le pouuez entendre, qu'il ya long temps que vous ſçauiez cela, & que vous ne daigneriez lire Geber. Mais réuenons à vostre argument. Je vous pourroy dire de rechef que ceste vostre consequence ne vaut rien, aſçauoir les sels ont la vertu de purifier les metaux, ils ont dōques la vertu de leur oſter leur malice naturelle & les rédre par ce moyen plus familiers de la nature humaine. Car purifier les metaux n'est autre chose que les rendre plus purs en leur essence, & les deſcharger des inmondicitez, qui ſont meſlees parmy eux, tellement que leur premiere essence, c'est à dire ce qui les fait-tels qu'ils ſont, demeure touſiours, & ne la changent aucunement,

dont il ensuit qu'encores que lès sels purifiéz les metaux, ce n'est pas à dire qu'ils corrigent la naturelle malineté qu'ils ont au regard de la nature animale. Voila la preune du premier point de ma mineur propositiō, qui est que le Nitre ne peut corriger la naturelle malineté de l'Antimoine.

Le second point est, qu'il ne peut corriger les qualitez excessiues de l'Antimoine calciné, ou de la chaux d'Antimoine. Ce que j'ay compris & prouué par vn tel argument en la 2. page du 20. fueillet de mō discours, disant: Toute espee de sel tiré de terre dur, espais ou massif & semblable à la pierre, ronge d'auantage ayāt trouué chaleur & est plus chaud & plus sec. Le Nitre dont on fait le Borax est vne espee de sel tiré de terre, dur, espais, massif & semblable à la pierre: parquoy ayant trouué chaleur il ronge d'auantage & est plus chaud & plus sec. Or est il ainsi que pour le mesler parmy la chaux d'Antimoine il est mis sur le feu & trouue chaleur: dont il ensuit que tant s'en fait qu'il corrige la chaleur & secheresse de la chaux d'Antimoine, que mesme il l'augmente.

La proposition de cest argument est prise de Galen au 20. chapitre du quatrieme liure des simples. Là ou parlāt de la nature des sels, il dit au commencement du chapitre, que toute espee de sel tiré de la terre est plus espais & terrestre que l'autre: Et en la fin du chapi-

tre il dit que toute essence ou corpulence espaisse ronge d'auantage, aſcauoir depuis que elle a trouué quelque chaleur. Vous vous mettez en pourpoint pour crier contre moy, & dictes que i'ay falsifié le lieu, pourautant que Galen dit en ce commencement du chapitre que toute espece de sel qui est plus dur, plus massif & plus terrestre, est moins chault. Si Galen n'eust escrit que cela, vous eussiez eu fort bõne raison: & de ma part i'eusse pris vne torche pour vous en faire amède honorable: mais aussi si vous eussiez veu vn peu plus que la longueur de vostre nez, & que vous eussiez leu & releu tout le chapitre, cõme vous dites qu'auetz fait, il n'y a point de doubte que vous n'eussiez trouué en la fin le passage duquel i'ay tiré mon argument. Et ce encores d'auantage si vous vous fussiez resouenu que nous parlõs du Nitre, lequel a passé par le feu avecque la chaux d'Antimoine. Toutesfois il est bõ à voir que vous auetz leu ce passage tout ainsi que celuy de Geber: ou bien si vous l'auetz mieux leu, il faut que vous soyez vn grand paresseux qui ne l'auetz leu tout au long: ou vne grande beste qui ne l'auetz peu entendre: ou vn malicieux & effronté calomniateur qui m'accusez contre vostre consciẽce que ie l'ay depraué. Ceste calomnie se manifeste encores d'auantage en ce que ie ne transcris pas le texte de Galé: ains seulement ie tire vne consequence du sens de

tout le chapitre en ceste façon : Le Nitre duquel le Borax est fait est dur , espais , & semblable à la pierre, ainsi que nous auons dit cy deuant, & par consequent ayant trouué chaleur (notez ces trois mots, maistre Baudet,) il ronge d'auantage, cōme escrit Galen au chapitre 20. du quatrieme liure des simples: là ou mesmes il dit que toute espeece de sel tiré de terre est plus espais & terrestre que l'autre, dont il ensuit qu'il est plus chault & sec. Ainsi doncques pouuez vous iuger que si i'eusse transcrit le lieu de Galen ie n'eusse pas mis ces mots, *dont il ensuit*: & ces mots avecques ceux de deuant , à sçauoir *ayant trouué chaleur*, vous doiuent suffire pour pēser que ie m'arrestois sur la fin du chapitre aussi bien que sur le commencement : bref que mon argument estoit fondé sur tout le sens du chapitre entier. Regardez comment vostre asnerie vous a esgaré les sens & les esprits, si bien que vous n'avez eu loisir, auant que me respōdre, de lire tout le chapitre : auquel toutesfois il ny a gueres d'auantage d'vne douzaine de lignes.

Voila quant à ce qui touche la chaleur du Nitre passé par le feu: & quant à sa seicheresse , elle est toute manifeste : car sa nature terrestre, sa duresse, son espaisseur & massiueté, avec la semblance qu'il a à la pierre, montrent assez qu'il est sec de soy-mesme, & encores plus lors qu'il a passé par le feu. Com-

ment donques sera-il possible que le Nitre estant tel, puisse corriger la chaleur & seiche-
resse de vostre chaux d'Antimoine? Les qua-
litez ne sont point corrigees sinon par leurs
cōtraires : or n'y a-il en ceste meslange aucu-
ne cōtrarieté de qualitez: il n'y a donques au-
cune correctiō. Ainsi donques la maieur pro-
position demeurera vraye nonobstant vostre
babil. Et quant à la mineur proposition vous
l'accordez, & est prise d'Agricola. Parquoy,
comme ainsi soit, que le Nitre ou le Borax
fait de Nitre estant meslé parmy la chaux
d'Antimoine, passe par le feu, en la fusion q̃
vous en faites: il s'ensuit que ma derniere cō-
clusion est vraye, asçavoir que tant s'en faut
qu'il corrige la seicheresse & chaleur de la
chaux d'Antimoine, qu'au contraire il l'aug-
mente.

Nous auons encores à prouuer vn point,
qui est que le Nitre ne peut corriger les incō-
ueniens, lesquels peuuent suruenir de l'vsage
de l'Antimoine. Les principaux inconueniēs
qui ont accoustumé de suruenir apres la prise
de quelque medicament malin sont, cōme
escriit Mesué, les deffaillances, les époinçon-
nements de l'estomach, les tranchees & les
racleures de boyaux. Or est-il ainsi que le
Nitre, principalement celuy qui a passé par
le feu, n'a la vertu d'empescher les deffaillan-
ces, ny les epoinçonnements de l'estomach,
ny les trenchees, ny les racleures de boyaux:

mais au contraire il les augmente : parquoy le Nitre n'a la faculté d'oster les incōueniens qui peuuent aduenir de l'vsage de l'Antimoine. Les deffaillances procedent ordinairement en la prise des medicamēts, à raison des epoinçonnemens de l'estomach, lequel patissant tire incontinent les esprits en compassion, dont la deffaillance ensuit. Et pour ceste cause, comme escrit Galen, au second commentaire sur le liure De la diette és maladies soudaines, on a inuenté de mesler des choses de bonne odeur parmy les medicaments purgeans, de peur que leur seule mauuaise vertu ne touche l'emboucheure de l'estomach, laquelle principallemēt ils offensent. Et Mesué escrit qu'on a accoustumé de mesler les choses qui sont de bonne odeur parmy les medicaments malins à celle fin d'obuier à c'est incōuenient. Car, comme il dit, les bonnes odeurs rendēt la medecine meilleure, ils empeschent l'agitation & l'enuie de vomir, ils confortent le cœur, ils esgayent les esprits & engendrent la ioye. Ainsi ne pouuez vous dire que vous mesliez vostre Borax avecque l'Antimoine pour ceste raison: car il n'a aucune bonne, ny mauuaise odeur, si bien qu'il n'a pas la vertu d'empescher les deffaillāces. Mais au cōtraire il faict les epoinçonnemēts de l'estomach, & ainsi il ne peut empescher les trenchees, ny les racleures de boyaux. La raison de cecy est prise tant à cause de sa nature

generalle

generalle que de sa particuliere : de sa nature
generalle, di-ie, à cause qu'il est espece de sel:
car comme dit Mesué en ses reigles vniuer-
selles, la nature de toute salure est de restrain-
dre, renuerfer & troubler l'estomach & d'es-
mouuoir le vomissement, de deseicher & pur-
ger en raclant. Vous dites à cela en vostre pa-
ge 71. marquée 61. que ne le pouuez entendre
& que ceste proposition est faulse: toutesfois
i'auois dit en mon Discours qu'elle estoit de
Mesué, & le dis encores, en l'endroit où il de-
clare les actions de chasque saueur & parle
d'icelles generally, comme i'ay fait. Si
vous m'auiez monstté la dissemblance qu'il y
a entre ma proposition & celle de Mesué, vous
auriez occasion de dire que la mienne seroit
faulse: mais n'ayant dit autre chose que ce
que Mesué en a escrit, c'est à Mesué à qui vo^s
vous attachez: c'est Mesué que vous demen-
tez & nō moy. C'est Mesué, di-ie, lequel vous
auez leu tout ainsi comme il y a long temps
que vous auez leu Geber. Tant y a que ceste
vertu & faculté generale est en tous sels: mais
plus aux vns qu'aux autres. Tout ce que vous
pensez dire au contraire en ceste mesme pa-
ge & en la 60. ne conclud autre chose sinon
qu'il y a des sels artificiels meilleurs les vns
que les autres: moins poignants & moins
aspres: mais vous ne prouuez pas qu'ils ne re-
tiennent de ceste faculté generale, que Mesué
dit estre en leur substance. D'auantage il n'est

pas icy question des sels artificiels : mais du Nitre, qui est de l'espece des naturels, pris en terre, lesquels sont durs, massifs & ressemblent à la pierre : & lesquels estans tels ont entre tous les autres les facultez que Mesué a escrit : & principalement lors qu'ils ont passé par le feu, & qu'ils approchent de la nature de l'Aphronitre, ennemy mortel de l'estomach, comme escrit Galen. Mais au contraire vous dites qu'encores que le Nitre soit brulé, si ne sera-il ennemy de l'estomach : tesmoins ceux de Grece qui encores à present en vsent au lieu de sel. S'ils vsent de Nitre, certainement ce n'est pas du brulé : car le Nitre brulé devient amer, tellement que ceste raison ne vaut rien pour prouuer que le Nitre brulé n'est ennemy de l'estomach. Vous dites encores qu'il entre en la composition du Diospoliticum, escrite par Galen : mais ie vous nie que ce soit le brulé. Et d'auantage vous ne dites pas qu'il est meslé avecques le Cinamo me, le Gingembre, le Poiure commun & la Rue, lesquels le corrigent. Bref, quand vous alleguez les facultes du Nitre selon Galen, vous ne dites pas qu'il parle du Nitre tel que Dioscoride l'a descrit, à sçauoir leger, d'une couleur vermeille, ou blanche : ouuert de trous en plusieurs endroits & quasi comme spōgieux. Parquoy tout ce que vous appuyez la dessus, ne vaut rien : & qu'il ne soit ainsi, Pline a escrit que le Nitre pierreux ne vaut

rien, tel, dis-je, que l'on le fait en Aegypte & près de Memphis. Vous voyez doncques manifestement que les arguments que vous pensez tirer des facultez du Nitre, telles que Galien les a descrites, ne peuvent servir en cest endroit, puisque le Nitre duquel les anciens ont parlé en la façon que vous en pensez parler, n'est pas celuy dont nostre Borax est fait. Et encorés que ie ne sente aucune amertume ou salure au Borax, si est-ce qu'il ne s'ensuit pas qu'il ne face dommage à l'estomach : ce qui se prouue par les effects qui sont tels que le Borax meslé dedans la chaux d'Antimoine, est cause des vomisseméts, espointonneméts & subuersions qui se font. Et qu'il ne soit ainsi, s'il n'y auoit point de Borax en l'Antimoine préparé, vous trouueriez qu'il ne feroit point vomir. Vous proposez bien en vostre page 69. marquée 59. qu'il y a trois moyens pour prouuer les medicaments, à sçauoir par le goust, par la senteur, & par les effects. Vous vous escarmouchez sur la saueur du Borax, & dites qu'il n'est point amer : mais vous laissez les effects derriere, lesquels toutesfois sont les indices plus certains & assurez en la cognoissance des medicaments. Aussi nostre question n'est pas posée, à sçauoir si le Borax est amer ou non : mais à sçauoir si les effects du Borax meslé dedans la chaux d'Antimoine sont tels que d'espointonner l'estomach & faire vomir. Ce qui se

*Sommaire
conclusion
du Nitre
& Borax.*

trouue estre vray en ce que l'Antimoine ou il n'y a point de Borax ne fait point vomir:& par consequent le Borax en est cause. Parquoy ce dernier poinct est veritable, asçauoir que le Nitre ne peut empescher les inconueniens qui suruiennent de l'vsage de l'Antimoine. Et ainsi nonobstant vos ruades, vous n'avez eu aucune raison d'impugner ce que j'ay escrit au 21. fueillet de mon Discours. Pour la conclusion donques de toute ceste partie no⁹ diròs q^e le Borax ou le Nitre (duquel Matthioli vse au lieu de Borax, selõ la derniere impression de ses Commentaires) n'a la vertu & faculté de cõtrairier à la malice cachee de l'Antimoine, ny à ses qualitez:&q^e mesmes il n'empesche point les inconueniens, lesquels peuvent suruenir par l'vsage de l'Antimoine.

Chapitre quatrieme, auquel il est monstré, que l'Antimoine preparé en la façon que le prepare Matthioli, ne peut estre mediquement purgeant.

EN C O R E S qu'ayât prouué que l'Antimoine crud & preparé est poison, comme nous auõs fait, il ensuyue incontinent qu'il ne peut estre bon mediquement purgeât, si est ce que ie deduiray le plus brefuement qu'il me sera possible les raisons pour lesquelles ie l'ay ainsi escrit en mon Discours. Ce qui seruira aussi pour fortifier d'auantage ce que nous auõs dit cy deuant. Pour

prouuer q̄ l'Antimoine ne pouuoit estre bon medicamēt purgeāt. I'ay declaré en mō Discours q̄ls sont les medicamēs purgeans, leurs actiōs, & pourquoy il y en a de diuerſes sortes: puis i'ay proposé les effect̄s & les actions des venins, & en la fin i'ay collationné les effect̄s de l'Antimoine avecques l'vn & l'autre, & ay monſtré cōme ils ſuyuēt ceux des venins, & nō ceux des medicamens purgeās. Dont i'ay apres tiré ceſte conſuſion, qu'il ne pouuoit estre bon médicament purgeāt, mais pluſtoſt venin. Ie n'ay que faire de repeter ce que i'ay dit touchant ces poincts, car ce ſeroit ſuperfluité: mais ſeulement ie confirmeray ce que i'ay dit contre voſtre ſot recanement.

I'ay eſcrit qu'il y auoit de deux ſortes de medicamens purgeans, les vns qui purgent non de leur faculté, ains par vn accident, c'eſt à dire en lachant le ventre par leur humidité: ou en ouurant les cōduits fermez par leur chaleur. Les autres ſont nōmez proprement medicamens purgeans, leſquels, comme eſcrit Galen, tirent l'humour nō plus ne moins que l'Æmant tire le fer, ou que les arbres tirēt de la terre ce qui leur eſt familier. Ceſte propoſition eſt priſe du 19. chap. du 5. liure des Simples de Galen, cōtre laquelle vous vous mettez en peine en trois pages que vous y auez employees à faire des diuiſions & ſubdiuiſiōs ſi mal à propos, que ie m'aſſeure que le cteur qui les lira, iugera bien q̄ vous eſtes vn grād

Deux ſortes de medicaments purgeans.

brouillon : car vous tirez la plus part de vos diuisions des effectz & non de la substance & nature de la chose , ainsi que tout hōme bien raisonnant & iugeant pourra voir. Et tout ce que vous pouuez dire cōtre moy n'est sinō q' i'ay escrit que les premiers medicaments purgeans purgent non de leur faculté, ains par accident. Vous criez cōtre moy & de premiere arriuee vous donnez du muscau en terre par la diuisiō que vous faites en vostre page marquee 80. *Nous trouuons deux manieres de purgations. L'une est generale qui se fait par medicamēts qui attirēt l'humeur qui choisissent leur estre le plus familier de toute la substance & telle , comme auons dit , se fait ou par le vomir ou par la deiection basse. L'autre est particuliere quand nous purgeons un seul membre, comme le cerueau, le polmō, la poitrine, le foye, la ratelle, la vessie, les boyaux, la matrice de la femme : & tels besongnent par qualitez*

*Faute de
Launay.*

manifestes. Ceste diuision est bonne en ce que estre general & estre particulier sont deux opposites: mais l'explicatiō que vous faites des deux ne vaut rien. Car tout ainsi comme les deux membres principaux doiuent estre opposites , aussi les explications d'iceux le doiuent estre: d'autant que les definitions & les choses qui sont definies reciproquent ensemble: si bien que les definitions & explications de deux choses contraires, sont aussi contraires au regard l'une de l'autre. Je vous demande donques maintenant si attirer l'humeur le

plus familier de la substāce du medicament, est opposite à purger vn seul membre? Si vous dictes que ouy, Galen vous en demēt, quāt il dit en ce chapitre 19. que les medicamēs, lesquels on applique au cōduit naturel de femmes, ou en fomentatiō ou autrement, ont accoustumē d'agir doublemēt : car les vns provoquēt seulemēt en eschauffant, & les autres par leurs facultez que l'on appelle attirantes & purgeātes, lesquelles nous auons dit faire leur action par la familiarité qu'ils ont avec les choses qui doiuent estre attirees. Ainsi donques voyez-vous que non seulement es purgations generales on vse de medicaments qui attirēt l'humeur qui leur est familier, mais aussi aux particulieres, cōme est celle qui se fait à l'amarry. Ceux que l'on applique aux narines, & ceux que l'on masche en la bouche pour purger le cerueau, qui est vn membre particulier, sont aussi de mesme genre que ceux que lon applique au conduit naturel de la femme, ainsi que le mesme Galen escrit en ce mesme chapitre. Lisez-le & corrigez vostre diuision. Et la ou vous ne voudriez croire ceste mienne explication, retirez la du liure des Definiriōs medicinales, lequel a esté escrit par Monsieur de Gorris, la ou il dit en l'explication de καθαριτικὸν φαρμαχόν. Les medicamens, dit-il, lesquels font sortir du corps les vrines, les fleurs, les crachats: & ceux aussi q̄ lon met dedās les narines pour purger, ou desquelson

laue la bouche, ou que l'on mache sous les dents, sont de mesme espee que ceux, lesquels en attirant purgent ou par les vomissements, ou par le ventre d'embas, pourueu qu'ils ayent la faculté d'attirer l'humeur vitieux, & que par le moyen d'icelle ils parfaissent la vacuation. Mais à celle fin que ie ne vous tiennne plus long temps en suspens, ie mettray par vn mesme moyen son texte escript au mesme endroit touchant l'explication de la premiere espee des medicaments, lesquels i'ay dit purger nō de leur faculté, mais par accident. Surquoy vous vous estes mis en peine de me reprendre, & auez crié contre moy, comme vn effronté que vous estes. Voicy donques ce qu'il escrit, & ce qui me seruira d'vn fouet pour vous hastier d'aller: Medicament purgeant se dit en deux sortes, l'vne en commun, de tous ceux lesquels par quelque maniere que ce soit nettoient les immondices du corps: l'autre par excellence, de ceux, lesquels purgent ou par le vomissement, ou par les seelles. Les premiers purgent souuentefois par vne commune & indefinie, ou non arrestee faculté, & quelquefois par le moyen de leurs premieres qualitez ou par accident: mais les seconds purgent d'eux-mesmes, d'autant qu'ils sont tels en leur nature, & qu'ils ont la vertu d'attirer les humeurs qui leur sont familiers. Ainsi vous voyez donc Maistre sot, quelle raison

vous avez eue à me reprêdre, & dequoy vous sert tout ce que vous avez allegué en voz pages marquées 81. & 82. là où vous parlez de plusieurs medicaments qui amolissent, qui purgent en comprimant ou reserrant, tous lesquels font bien ce qu'ils font de leur propre faculté, mais ie vous nie que par icelle ils purgent. Car il n'y a seulement que ceux qui attirent les humeurs qui leur sont familiers, lesquels purgent par leur propre faculté: tous les autres purgent par accident: les vns en amolissant, les autres en lubriquât ou oignant les conduits, & les autres en les ouurant: & non pas en attirant. Or tout ainsi que c'est vostre coustume de mesler tousiours de la calōnie parmy vostre asnerie, vous n'y avez pas voulu faillir en cest endroit, quand vous n'avez point de honte de dire que i'ay escrit que la Casse purge par accidēt: car ainsi me l'imposez vous faulxement au commencement de vostre page marquée 82. Et toutesfois il ne s'en trouue vn seul mot en tout mō discours. Et si vous voulez sçauoir ce que i'en pèse, ie le vous diray. La Casse est vn medicamēt pur geant tant à cause de sa naturelle faculté attirante, que pour autant qu'elle adoucist & amollist. Elle est fort benigne & doulce: mais encores qu'elle soit telle, & que sans crainte d'inconueniēt on la baille aux femmes grosses & aux petis enfans, si est-ce qu'il faut bien considerer quand, & commēt, & à quels per-

*Calomnie
de Lannay*

De la Casse.

sonnage en la baille: Car tout ainsi qu'il ad-
 uient souuentefois qu'une petite estincelle
 de feu, laquelle de soy-mesme n'auroit pas la
 force de resister à vne goutte d'eau, ou de de-
 seicher le plus petit drapeau mouillé, ne lais-
 se pas toutesfois d'estre cause du bruslement
 de toute vne ville: ainsi la Casse esmeut quel-
 quesfois desnoises dedans le corps, lesquelles
 elle ne peut appaiser. Pour ceste cause les an-
 ciens & modernes Medecins ont escrit qu'il
 faut necessairement que le medicament que
 lon baille soit proportionné à l'humeur qui
 doit estre purgé, autrement qu'il ne se peut
 faire qu'il n'en aduienne incontinent. Car si
 le medicament est plus fort, & qu'il soit baillé
 en plus grande quantité, l'euacuation en sera
 trop grãde, & ainsi les incōueniens que Me-
 sué dit suruenir apres les purges mal ordon-
 nees, ne font faulte de se manifester, S'il est
 aussi trop foible au regard de l'humeur, il se
 fera vne esmotion & vn amas de la matiere,
 laquelle n'aura esté iettée hors, delà viendra
 la ficure, la douleur de teste, quelque fois vn
 spasme & cōuulsion, à cause, comme dit Me-
 sué, que la medecine aura esmeu la matiere,
 & ne l'aura pas tirée hors, mais elle se sera di-
 uertie sur les nerfs. Si vous eussiez bien enté-

Faute de du ces reigles que tout homme qui se messe
Launay dexercer la medecine doit entendre, celuy
en la pra- auquel vous baillastes de la Casse, cōme vous
etique. escriuez en vostre page marquée 81. ne fust

rombé en la double-tierce où vous le poussa-
stes. Car vous eussiez cogneu qu'il auoit me-
stier d'vn medicament plus fort que n'estoit
la Cassé, laquelle eust bien le pouuoir de res-
veiller, comme on dit communement, le
chat qui dormoit: mais elle ne peut pas le
chasser ou le tirer hors du corps, d'autât que
elle n'estoit assez puissante. Ainsi ressemblastes
vous le barbier, lequel voyant qu'il n'auoit de
la pratique assez, comme il desiroit, s'en alla
agacer les habitans de deux villages, lesquels
naturellement se vouloyent mal, & ayant iet-
té la premiere pierre, se retira pour aller ac-
coustrer ses appareils, se doubtant que bien-
tost il y auroit de la besongne taillee. Toutef-
fois ne pësez que ceste double fieure fust sur-
uenue de ce que la Cassé s'estoit conuertie en
vn mauuais humeur, qui depuis eust excité
ceste fieure. Car encôres que les anciens ayët
escriit que la Cassé quelque fois se conuertist
en alimët, si est-ce que ce n'est pas à dire que
elle se conuertisse en mauuais humeur. Aussi
la Cassé n'est pas du nombre des medicamëts
que i'ay dit se conuertir quelque fois en l'hu-
meur mauuais, ne trouuant contre quoy s'at-
tacher pour agir: car cela s'entéd de ceux qui
sont seulement purgeans par vne faculté at-
tirante, & nō de ceux que les practiciens nō-
ment medicaments alimenteux ou nourri-
ciers, c'est à dire qui seruent de medicaments
& qui aussi peuuent seruir de nourriture, tels

qu'est la Casse, & côme mesmes vous le confessez en vostre page marquée 91. Mais ce poinct semble estre vn peu hors de propos. Or apres auoir parlé que c'est que medicament purgeant, i'ay expliqué l'action & usage d'iceluy, disant que les medicamens nommez purgeans par excellēce, depuis qu'ils estoient pris en boisson, faisoient leur action ou par leuomissement, ou par les seelles.

Ce que lon doit considerer auant que purger vn homme. L'vn & l'autre se pratique selon la diuersité de l'humeur qui doibt estre tiré, c'est à dire, si l'humeur est de telle nature qu'il doibue estre tiré par haut, & qu'il s'y presente, nous ordonnons des medicamens qui purgent par le vomir: & au contraire nous ordonnons ceux qui purgent par bas si l'humeur est autre. Ce que non seulement nous considerons, mais aussi nous auons esgard à la particuliere nature du malade & a la saison de l'annee. Car il ya des malades, lesquels sont plus prompts à vomir que ne sont pas les autres. Il ya aussi des saisons de l'annee, auxquelles les humeurs sont plus prompts à se descharger par le vomissement, qu'ils ne sont pas es autres. Vous ne niez pas ces propositions, aussi ne pourriez vous. Mais à celle fin que l'on pense que vous auez dit quelque chose de nouueau, vous deprauiez & falsifiez le texte que i'ay escrit, & puis vous dites qu'il ya faulte: tout ainsi comme vous auez fait de celui de Plin. Car i'ay escrit que les medica-

Passagedu Discours falsifié par Lannay.

mens purgeans ont accoustumé de purger ou par les vomissemens, ou par les seelles: tellement, ay-ie dit, que selon la diuersité de l'humeur qui doibt estre tiré, de la nature du malade, de la saison, & de toutes telles considerations, nous auons accoustumé de les ordonner. Et pour faire accroire que vous estes vn grand correcteur, vous auez transposé la virgule ou distinctiō qui est apres le mot, tiré, & l'auez mise apres le mot, humeur: comme si ie parlois de l'humeur qui doibt estre tiré de la nature du malade: & toutesfois ie dis que nous ordonnons les medicamens ou vomitifs ou autres, ayant esgard à la diuersité de l'humeur qui doibt estre tiré: ayant esgard aussi à la diuersité de la nature du malade: ayāt esgard encores à la diuersité de la saison, & bref ayant esgard à toutes telles considerations. Voyla comment ce passage se doibt entendre sainement ainsi que tout homme qui sçait que c'est que de parler & d'escrire l'entendra, & comme les distinctions monstrent assez qu'il ne se peult entendre autrement. Et toutesfois, effronté que vous estes, vous n'auez poinct faict de difficulté de faire calomnieusemēt la faulte, & puis me l'imputer. Je prie le lecteur, au nom des lettres, de vouloir considerer vostre malice & regarder les deux passages: le vostre escript en la page marquee 84. & le mien escript en la premiere page du 14. fueillet de mon discours. Or.

*Qu'un
mesme
medica-
ment ne
purge par
les selles
& le vo-
missement.*

poursuyuant ces discours & vsages des medicaments, i'ay dict que nous ne voyōs point, si ce n'est par quelque inconuenient, qu'un mesme medicament face vomir & aller par bas, en vn mesme temps & par vne mesme vertu. Ceste mienne proposition est la principale de toute ceste dispute, & se peut aisément retirer de ce que Galen escript que les medicaments purgeans purgent ou par les vomissemens, ou par les selles: car ce mot, ou, n'est pas copulatif, mais disionctif: c'est a dire il separe les vomissemens d'auec les selles. Vous ne respondes rien a ceste proposition: ains seulement vous en prenez vne partie & dictes en vostre page marquee 88. que les anciens ont tant estimé le vomir qu'ils l'ōt preferé a toute autre purgatiō. Mais ie vous demande quant ils l'ont tant estimé, a ce esté en general? Non, mais lors qu'ils ont eu esgard (comme vous mesmes le confessez en cest endroit) a la maladie, a la saison de l'annee & a la disposition & habitude du patient. Aussi voyez vous que cela ne vous sert de rié, pour prouuer qu'un bon medicament purgeant face vomir & aller par bas en vn mesme temps & par vne mesme vertu: ce qui est toutesfois le neud de toute ceste matiere. Vous me demandez quel inconuenient il y a que telle chose se face: a quoy ie vous responds que deux mouuemens cōtraires faicts en vn mesme temps, & en vn mesme corps,

par le moyen des medicaments, debilitent la nature & ne sont iamais approuuez: car estants tels ils ne peuuent proceder d'une mesme cause, si ce n'est qu'elle soit desreiglee: attendu que la purgation qui se faict par hault est contraire a celle qui se fait par bas, comme escript Galen sur le neufiesme Aphorisme du quatrieme liure des Aphorismes. Aussi d'une cause reiglee il n'ensuit iamais contraires mouuements en vn mesme temps & en vn mesme lieu. Dauantage encores qu'en vn mesme corps il y ait deux humeurs vicieux, l'un desquels doibue estre vuydé par hault & l'autre par bas: si est-ce que vous ne le debuez entreprendre en vn mesme temps. Car ce seroit ressembler celuy qui trop embrasse & mal estreinct: ce seroit trauailler la nature a deux costez: Bref ce seroit faire ce qui iamais ne fut practiqué par les anciens, ny par les modernes. Tout ce que vous alleguez de Galen & de Fernel ne fait rien a ce propos: Car ie ne vous ay pas nié qu'il n'y ait des humeurs qui se purgent par hault, autrement i'aurois dict contre moy-mesme, quand i'ay escript que les medicaments purgeoyét ou par hault, ou par bas: mais ie dis encores qu'il ne se trouue point qu'un bon medicament q. face vomir & aller par bas en vn mesme temps & par vne mesme vertu. Voyla la question: suyuez la, si vous pouuez, ou bien taisez vous-en & le laissez faire a d'autres qui possible l'en-

tendront mieux que vous. Et quant est du
 texte de Galen que vous alleguez du com-
 mentaire sur le 59. Aphorisme du quatrieme
 liure, vous monstrez bien que vous ne l'en-
 tendez pas. Car Galen ne parle point là de
 la guerison de la fieure tierce faicte par pur-
 gation de medicament purgeant: mais de cel-
 le qui se faict par le mouuement de nature,
 telle que nous voyons aduenir en la fin de
 chasque accès: lors que la partie de l'humeur
 cholerique, laquelle a esté poulsee entre cuir
 & cher s'euacue par la sueur, & celle qui est
 demouree en l'estomach par le vomissement:
 comme celle qui est dedás les boyaux se des-
 charge par bas. Et qu'il ne soit ainsi le mesme
 Galen au liure de ceux qu'il conuient purger,
 chapitre quatriesme dict, que lors que la pi-
 tuite est abondante par tout le corps, il fault
 purger premierement par le bas, puis par le
 vomissement & puis par le nez & par le palais.
 Voyez comment il se garde d'entreprendre
 ceste purgatiõ en vn coup. Ainsi dõcques ie
 ne me mettray en peine de respõdre d'auan-
 tage a ce que vous auez escript en vos pages
 88.89.90. & 91. Car ie scay bien que le vomis-
 sement est bon en quelques maladies, enco-
 res que de soy mesme ce soit vne action con-
 tre nature: Ce que vous ne scauriez nier: Car
 & le vomir & le sanglot sont bien mouue-
 mens de l'estomach, comme vous alleguez
 du commentaire sur le 39. Aphorif. du 6. liure:

*Vomis-
 sement est
 vne chose
 contre na-
 ture.*

mais

mais vous ne dites pas que ce sont mouuements contre nature : ainsi que Galen les nôme au troisieme liure des Causes des Symptomes. Car encores que le vomir contraire à l'aualer se face par des conduits, lesquels sont naturels, si est-ce (côme escrit Scaliger) que ceste action ne leur est pas naturelle, & par tant elle est contre nature.

Après que i'ay declaré ceste action & vsa- *Pourquoy*
 ges des medicaments purgeans, ie donne la *il y a di-*
 raison, pour laquelle il y en a diuerses especes *uers medi-*
 & dy que cela aduient à cause de la diuersité *caments*
 des humeurs qui doiuent estre purgez, les- *purgeans*
 quels sont dissemblables en substâce, qualité,
 quantité, amas, mouuement & pourriture. Et
 pour autant qu'il y a trois diuersitez d'hu-
 meurs en nos corps, lesquels sont cause de
 toutes les maladies, il y a aussi de trois sortes
 de medicaments purgeans. Ces trois hu-
 meurs sont le phlegme, la cholere & la me-
 lancholie. Ainsi donques il y a des medica-
 ments lesquels tirent le phlegme, les autres
 la cholere & les autres la melancholie.

Or encores que ceste proposition soit *Ignorance*
 vraye, si est-ce que vous auez voulu monstrier *de Lannay*
 vn coup de vostre escrime en passant: & com- *en la con-*
 me bruslant de l'enuie que vous auez de con- *gnoissance*
 tredire à tort & à trauers, vous dites que vous *des hu-*
 vous estõnez cõment ie n'ay parlé que de ces *meurs.*
 trois humeurs, asçauoir du phlegme de la cho-
 lere & de la melancholie : & cõment i'ay ou-

blié les humiditez sereuses, lesquelles Galen
 nôme tât souuēt. Vous dites dauātage q̄ ceste
 proposition est telle que si elle n'estoit escrite
 d'vn docteur de Paris vous ne la croiriez
 point. Vous monstrez bien en cest endroict
 quel vous estes, & cōme vous estes bien ver-
 sé en la cognoissance des humeurs. Apprenez
 que les humiditez sereuses sont comprises
 sous le phlegme, tout ainsi comme la pituite
 salee & toutes les autres especes de phlegme
 contre nature. Apprenez qu'il y a plusieurs
 especes comprises sous le nom de phlegme,
 de cholere & de melancholie, comme sous
 leur genre: & que qui dit le genre comprend
 les especes, tout ainsi que celuy qui dit tout,
 comprend les parties. Et si vous pensez qu'en
 nommant seulement ces trois humeurs i'aye
 fait faute: accusez aussi Hippocrate au liure
 de la nature humaine, là où parlant des hu-
 meurs qui sont purgez par les medicamens:
 il ne nomme que la pituite, la cholere & la
 melancholie. Si vous y trouuez les humidi-
 tez sereuses, ie le vous donne gaingné. Mes-
 mes il baille ceste proposition que i'ay escri-
 te presque de mot à mot, disant: Le corps hu-
 main contient en soy le sang, la pituite & la
 double cholere: à sçauoir la iaune & la noire,
 lesquelles luy constituent la nature du corps:
 & à raison desquelles il est malade ou se por-
 te bien. Vous voyez qu'il ne fait icy aucune
 mentiō des humiditez sereuses, aussi n'en est

il mestier . Car qui dit la pituite ou le phlegme, celuy là dit les humiditez sereuses. Voyez l'explication qu'en fait Galen, tant aux liures des elements , comme au liure de la cholere noire. Et à celle fin qu'il ne vous semble que ie sois seul qui l'interprete ainsi, & qui l'a ainsi escrit , ie vous ameneray de mot à mot le texte d'un docteur de Paris, auquel , comme ie pense, vous ferez difficulté de repliquer: c'est monsieur de Gorris au mesme endroict que i'ay desia allegué. Parquoy comme ainsi soit, dit il, qu'il y a trois differéces d'humeurs dedans les corps des hommes: ainsi y a il de trois sortes de medicaments purgeans, à sçavoir les Phlegmagogues, les Cholagogues & les Melanagogues, ainsi nommez à cause de la faculté qu'ils ont de tirer le phlegme & la cholere tant iaulne que noire. Aduisez donc maintenant si vous le deuez croire, & vne autre fois ne soyez si impudent de reprédré ce que vous n'entendez pas. Si vous avez trouué en Galen les humiditez sereuses ioinctes avec les autres, ç'a esté ou pour vne plus grande signification de ce qu'il entendoit, ou pour remarquer de quel phlegme il parloit, ou pour monstrier quels humeurs pituiteux & phlegmatiques ont accoustumé de faire la phlegmatique cacochymie, comme en l'endroit que vous alleguez. Or si vous avez enuie d'impugner ceste proposition, qui est d'Hippocrate, repetez & expliquez par Galen

aux liures des elements & au liure de la cholere noire, transcripte par de Gorris, & mise en mon Discours: il faut que vous prouviez que l'humeur fereux n'est pas vne espece de phlegme. Si vous ne le faites, comme ie m'assure que vous ne sçauriez, il faut que vous confessiez que vous estes vn grand asne.

Or ce ne vous estoit assez d'auoir descouuert vostre asnerie en cest endroit, si encores de-rechef vous ne l'eussiez repete en vostre page margee 105. là où apres auoir fait vne deduction des differences des humeurs en la façon que vous entendez, vous me reprenez de ce que j'ay dit que les trois humeurs estoyét causes de toutes les maladies, qui viennent au corps, & alleguez au contraire, que le sang est l'vn des humeurs, lequel fait des maladies & que par consequent il y a plus de trois humeurs, qui sont causes des maladies, qui suruiuent en nostre corps. Si vous eussiez considéré ce dont il estoit question vous n'eussiez fait cest argument. Car nous parlons des maladies lesquelles ont besoin de purgation faite par les medicaments veritablement purgeans: tout ainsi comme de Gorris ne nommant que trois humeurs n'a eu esgard qu'a ceux qui doiuent estre ainsi purgez. Vous ne voudriez pas l'accuser qu'il ne sceut mieux que vous que le sang est l'vn des humeurs du corps, & toutesfoi

il ne le nomme point. Or toutes les maladies qui se font par le sang, procedēt ou lors qu'il surpasse en quantité les limites de nature, ou lors qu'il s'eschauffe seulement, ou lors qu'il se pourrist. S'il surpasse en quantité, la seignee est necessaire & non la purgation : s'il est eschauffé seulement, il ne faut vser que de refroidissans & quelq̃ fois de la seignee, pour arrester ceste fureur, & non de medicament purgeant : car aussi n'en auons nous point qui purge le sang. Mais si ceste chaleur perseuere, & qu'il pourrisse, Galen escrit sur le premier liure de la diette és maladies soudaines, que la partie plus desliee se conuertit en cholere, & la plus espesse en melancholie : tellement qu'il ne le faut plus nommer sang : mais cholere & melancholie, lesquelles se purgent par les medicaments susdicts. Ainsi vostre bel argument s'esuanouist en fumee. Aussi vous vous estonnez de ce q̃ ien'ay veu le passage d'Hippocrate cy deuant allegué : Et moy ie ne m'estonne pas que vous l'ayez leu & transcript en vostre liure, & que toutesfois vous n'ayez point fait de difficulté de dire incontinent apres, sept ou huit lignes au dessous, que i'ay obmis les humiditez sereuses & aqueuses : tout autant comme si vous disiez qu'Hippocrate mesme les a obmises: car il n'en a point parlé: ie ne m'en estonne point, dy-ie, car ie sçay bien que vous estes assez impudent. Mais

vous faites encores bien plus le sot en la page
suyuante marquee 106. quand vous dites
que ces humeurs ne sont encores les seules
causes des maladies : Car, dites vous, *il y en a*
d'externes, comme est l'ær, lequel mue le corps &
les humeurs, voire les esprits en sa nature. Mai-
stre Baudet, quand l'ær est cause des mala-
dies en est-il cause que nous nommons con-
ioincte, laquelle doit estre purgee? n'est-ce
pas apres qu'il a infecté & gasté les esprits,
les humeurs, & en fin les parties solides &
fermes? vous pensez dire quelque chose de
nouveau & vous monstrez que vous estes
vne grande beste.

*Quel An-
timoine
n'est point
medica-
ment pur-
geant.*

Ayant ainsi deduit la nature, les actions,
les effects & la raison de la diuersité des me-
dicaments purgeans, ie propose les actions
des venins: puis ie collationne celles de l'An-
timoine pour mōstrer qu'il n'est point medi-
cament purgeât, mais venin. Premièrement ie
propose qu'il n'est pas du nombre des medi-
caments purgeans, lesquels sont ainsi nom-
mez en commun, & non par excellence. Car
s'il estoit du nombre de ceux là il purgeroit
ou en laschant le ventre par son humidité: ce
qu'il ne peult: car il n'est pas humide. Vous
calomniez ceste raison en vostre page mar-
quee 83. disant : qu'il n'est pas necessaire que
les medicaments qui ouurēt les conduits fer-
mez par le moyen de leur chaleur, soyent hu-
mides. Aussi ne le dis-je pas. Mais ayant pro-

posé que les medicamēts qui purgent par accident ont accoustumé de ce faire, ou en laschant le ventre par leur humidité, ou en ouurant les conduits fermez par leur chaleur: ie concluds qu'il ne peut estre de ce rang, d'autant qu'il n'est pas humide pour lascher le ventre & que tant s'en faut qu'il ouure les conduits que mesmes il les estoupe. Vous n'estes pas content de ceste calomnie: mais vous en adioustez encore vne, estimant que ie dis que l'Antimoine calciné ne peut ouvrir les conduits: & toutesfois il n'est encores question en cest endroict que de l'Antimoine crud n'estant encores préparé, duquel ie n'ay parlé que cinq feuillets apres.

*Calomnie
de Lannay.*

Toutesfois puis que vous mettez l'Antimoine calciné au rang de ceux lesquels purgent par leur chaleur en ouurant les conduits fermez: ie vous mōstreray que cela ne se peut faire: puis ie viendray au demeurant. Et a cel le fin de vous oster toute occasion de calomnie, ie feray cest argument, lequel ie deduiray par le menu.

Que l'Antimoine ne purge point en ouurant.

Si l'Antimoine est du nombre des bons medicaments purgeans, il purge ou indifferemment en ouurant les conduits fermez, ou bien il purge par excellence, c'est à dire par la propriété naturelle qu'il a de tirer l'humeur, lequel luy est familier: Or est-il ainsi qu'il ne le faict ny par l'un, ny par l'autre moyen: il n'est donques pas bon médicament purgeant.

Nous sommes d'accord de la maieur proposition, il suffira que ie preuue la mineur.

Et quand à la premiere partie de ceste mineur, ie pourrois vser contre vous de la fin de nō-recevoir, comme disent les aduocats plaidants, d'autant qu'en vostre premier liure donnant la raison, par laquelle l'Antimoine purge, vous n'en auez amené d'autre que la propriété de toute sa substance, qui est vne vertu admirable & diuine, qui ne vient de nulle permixtion elementaire. Et toutesfois vous me confesserez que si l'Antimoine purge en ouurant les conduits, cela procede de la permixtion elementaire, asçauoir de la chaleur. Mais ie neveux estre si rigoureux que de vous prendre au pied leué, & puis que vous vous estes raduisé depuis, ie suis content d'y respoñdre: car par aduventure auez vous faict protestation d'adiouster ou de diminuer. Premièrement s'il est tel, comme vous dites, vo⁹ auez malicieusement & contre vostre conscience soustenu qu'il n'estoit pas chaud, acré & mordant; Car s'il purge en ouurant, il faut qu'il soit tel, comme Galen escrit au chapitre 13. du 5. liure des simples, & comme vous confessez en ceste page marquée 83. ne vous resouenant plus de ce que tant opiniastrément vous m'auiez nié, soustenāt le contraire. D'auantage les medicaments qui purgent en ouurant les conduits, ont accoustumé de purger indifferemment toutes les ordures du

corps, & ne peuuent seruir aux maladies particulieres, si ce n'est en tant qu'ils purgent les ordures communes. Car pour les maladies particulieres il faut vser de medicaments, qui par leur vertu & faculté naturelle ayent la force de tirer l'humeur qui en est cause: Ainsi voyez vous les absurditez esquelles vous estes tombé: ioinct qu'il est impossible que si petite portion de medicament ouurant, puisse agir & faire telle action, qu'estant auallé a la quantité de trois ou quatre grains, il puisse tellement ouvrir les conduits du corps, que si grande quantité d'humeur en sorte. Et mesmes les medicaments qui agissent par qualitez manifestes ne peuuent agir sinon estants pris en grande quantité. C'est ce que dit Auerrois que les medicaments n'ont point ceste chaleur sinon a raison de leur corpulence, & que la chaleur n'eschauffe point sinon a raison de la quantité proportionnee en icelle. Je suis donques d'aduis que vous demouriez en vostre premiere opinion, & que vous dissiez que telle purgation se faiet par similitude de substance. Ainsi ie retourneray a faire cōparaison des actions de l'Antimoine avecque ce que nous auons dict des bons medicaments purgeans par excellence, & vous monstreray que ce que nous auons dict: & ce que mesme vous dictes d'iceux ne se trouue en vostre Antimoine.

Les bons medicaments purgeans font leur

Sommaire action & purgent ou par haut, ou par bas, &
re compa- non par les deux ensemble, comme i'ay mō-
raison des stré : mais vostre Antimoine purge & par
bōs medi- hault & par bas ensemble : il n'est donques
caments pas médicament purgeant.

purgeans - L'usage des médicaments purgeans est tel
avec l'An- que s'il est questiō de purger vn humeur me-
timoine. lancholique, comme en la fieure quarte : que
 le malade ait la poictrine estroicte & le col
 long, & qu'il soit hyuer, on se garde de bail-
 ler ceulx qui font vomir. Or est-il ainsi que
 l'Antimoine faict vomir. L'usage donques de
 l'Antimoine ne vaut rien es maladies melan-
 choliques, a tous malades qui ont la poictri-
 ne estroicte & le col long : & principalement
 s'il est hyuer.

Quand on veult vser des bons medicamēts
 purgeans on les diuersifie selon la diuersité
 des humeurs, des maladies, des natures des ma-
 lades, de l'aage & du sexe des malades, & se-
 lon la diuersité des saisons. Or est-il ainsi que
 l'Antimoine calciné ne se peut diuersifier se-
 lon la diuersité des maladies, des natures, de
 l'aage & du sexe des malades, & selon la di-
 uersité des saisons : Car quoy que vous en fa-
 cieiez & que vous le mesliez parmy des conser-
 ues il fait vomir & aller par bas en toutes pur-
 gatiōs d'humeurs, en toutes maladies, en tou-
 tes natures, tant celles qui peuuent vomir, que
 celles qui n'y sont disposées : en tout aage, en
 tout sexe & en toute saison. Il s'ensuit donc-

ques que lon ne peult vser de vostre Antimoine, comme d'un bon médicament purgeant.

Tout bon médicament purgeant ayât faict son action laisse vn grand soulagement au corps, tellement que ceux qui sont purgez se sentent fort allegez. Mais l'Antimoine laisse vne lassitude & defaillance, tant s'en faut qu'il allege. Il n'est donques pas bon médicament purgeant. Les bons medicamēts purgeans baillez és maladies bilieuses purgent la cholere: és melancholiques ils purgent la melancholie: és phlegmatiques ils purgent le phlegme. Mais l'Antimoine baillé en toutes ces maladies, comme vous faictes, faict tousiours sortir des eaux. Il n'est donques pas bon médicament purgeant. Les purges qui se font par bons médicaments purgeās aux cōmencemēts des maladies, sont dissemblables a celles qui se font en la fin: mais l'Antimoine fait tousiours sortir mesmes humeurs au commencement & en la fin des maladies, lesquelles ne sont point dissemblables: il n'est donques pas bon médicament purgeant. A bonne raison donques i'ay escript que l'Antimoine ne tire point l'humeur qui est vicieux, asçauoir es maladies melancholiques, esquelles Matthioli dit qu'il est si souuerain, & esquelles principalement l'humeur est contenu és parties basses, & pourtant doit estre purgé par bas seulement, comme escript Galen: qui est

le lieu, par lequel la nature, l'humeur & la maladie ont accoustumé de se descharger: & qui est aussi le lieu commode par la loy de nature: & que partant il s'ensuit qu'il n'est pas bõ médicament purgeant. J'employe pour confirmation de cecy la pluspart de ce que vous auez escrit en vos pages marquees 84. 85. 86. & 87. J'employe l'Aphorisme & le commentaire neuvieme du quatrieme liure des Aphorismes. Bref j'employe vne infinité de passages, que ie pourrois alleguer, si ie scauois que ils ne fussent assez communs à vn chacun qui aura vn peu versé en la medecine. Si vous re-
pliquez que l'Antimoine est bõ pour les humeurs qui se peuuent purger par hault, ie vous allegueray, comme desia i'ay faict, que toutesfois & quantes qu'il faut purger par le vomissement il est mestier de resserer le bas: par le texte de l'Aphorisme d'Hippocrate 67. du 7. liure: il faut, dit-il, rendre coulants & fluydes les corps que lõ veult purger: Si c'est par hault il fault arrester le ventre, & si c'est par bas il le fault humecter. Or voyez vous que vostre Antimoine fait le contraire: Car en faisant vomir il fait aussi aller par bas, qui est contre ce precepte. Vous ne respondes rié a ceste raison: mais seulement afin que lon pè se que vous ayez fait quelque chose, vous dites qu'il n'est point parlé de resserer le hault es purgatiõs qui se font par bas. Quant ores il n'en seroit point parlé, cela n'empeschera

pas que vous ne feüssiez faulte cōtre ce precepte: en ce que vous faites vomir & aller par bas en mesme temps. Et toutesfois la mesme raison pour laquelle il fault resserer, ou arrester le bas, quand on veut faire vomir, se peut & doit reciproquement rapporter au hault, quād on veut purger par les selles: tellement que cōfessant l'un, vous estes aussi cōtraint de confesser l'autre: si bien que le sens de l'Aphorisme & du commentaire de Galen n'est point dissemblable a ce que j'ay allegué cōtre vous: Et ainsi ie ne l'ay point expliqué faulsemēt. Pour le moins vous deuiez respondre, ce me semble, a la premiere partie qui est le texte pur d'Hippocrate & lequel est contre vous formellement.

Ie vous ay declaré en mon Discours quels *Quels* estoient les humeurs que l'Antimoine fait *humeurs* sortir du corps, asçauoir ceux qui naturellement sont attachez au dedans de l'estomach *l'Anti-* & des boyaux, & qui rendent ces parties plus *moine fait* glissantes, & sans lesquels aussi les actions naturelles ne se pourroyent faire si heureusement, comme elles se font. Ce sont humiditez phlegmatiques superflues de la nourriture: mais vtilles pour maintenir les parties naturelles en leur souplesse accoustumee. Ceux qui en ont pris tēsmoigneront que les voidāges qu'ils ont faites ont esté la pluspart de telles humiditez. Et pour vous monstrier qu'elles sont naturelles & louables, ie desduiray

briefuement les differences des humeurs : ce que ie ne ferois si ce n'estoit qu'en le pensant faire vous y auez operé si dextrement, qu'à la premiere desmarche vous auez choppe, si bien qu'il vous a esté facile de bastir voz mē-
 songes sur cestepremiere faulte. Nous appel-
 lons humeur en general tout ce qui est liqui-
 de & peult couller dedans le corps. Or entre
 les humeurs du corps les vns sont naturels,
 lesquels seruent a la conseruation & entrete-
 nement de la nature : les autres sont non-na-
 turels lesquels au contraire offensent & de-
 struisent la nature. Auicenne les nomme bōs
 & mauuais. Il ya deux differēces de naturels,
 les vns ont esté nez auecques les corps : les
 vns desquels sont entrez en la conformation
 des parties, comme l'aqueux & l'aerien sub-
 stantifique : mais les autres sont demourez
 pour ayder l'action des parties instrumen-
 taires & organiques, cōme sont les humeurs
 des yeulx, comme est l'humeur sereux conte-
 nu dedans le Pericarde ou Suscœur: bref com-
 me sont les humiditez pituiteuses & glereu-
 ses, lesquelles sont dedās les ioinctures, & des-
 quelles Galen à monsté l'vsage au 8. chapi-
 tre du 13. liure de l'vsage des parties. La secon-
 de difference des humeurs naturels est de
 ceux que lon nomme suruenants, c'est a dire
 ceux qui depuis l'entiere conformation du
 corps, suruiennēt de dehors : les vns desquels
 sont alimentaires ou nourriciers, comme est

*Que c'est
 qu'hu-
 meur &
 les differē-
 ces des hu-
 meurs.*

le sang & les substances contenues en iceluy, desquelles toutes les parties du corps humain sont iournellement nourries. Les autres sont excremétaires, c'est a dire, qui ne nourrissent point: mais sont reiettez par la nature hors de la boutique du nourrissement: ce qu'elle fait ou pour quelque sien vsage, ou pour les iecter du tout hors du corps. Ces humeurs excrementeux sont diuers, selō la diuersité des cuissōns qui se font dedans le corps: car en chaque cuissōn il ya excrement. De la sont engendrees les humiditez pituiteuses & glercuses en la premiere cuissōn, qui est faite en l'estomach: de la vient la cholere & la melancholie en la seconde cuissōn faite dedās le foye: de la procede aussi la semence & le lect en la troisieme cuissōn faite aux parties du corps: Bref plusieurs autres humeurs sont engēdre en ces cuissōns, tous lesquels sont naturels, & partie desquels sert aux actions de la nature, auant que sortir hors. Regardons maintenant comme voz paroles se pourrōt accorder avec cestes cy. Vous escriuez en vostre page marquee 101. la ou vous voulez faire de l'abille homme en la deduction des differences des humeurs naturels, & la ou vo^o vo^o plaisez dauātage q̄ ne feit iamais Pelee en ce glaue que luy donnerent les Dieux. *Nous appellons, dites vous, les humeurs naturelles celles, desquelles nature se sert pour la nourriture du corps: lesquelles promiennēt de boire & de māger & sont elaborees &*

transmuees dedans les mēbres nutritifs par la chaleur naturelle d'iceux: Puis quand ils sont ainsi bien elaborez: & conuertis en substance apte, à nourrir le corps. Et qu'une chacune partie: s'en peult ayder, pour se refociller, & restaurer: ce qu'elle a perdu de sa substance. Nous appellons tels humeurs, naturels. Et n'en trouue qu'une, qui merite estre ainsi appelée. Qui est le sang naturel, pur, & doux: sans meslange d'aucune superfluité. Je laisse les fautes qui sont en ce langage, & les lourdes pūctuations & distinctions, qui vous sont tellement communes en tout vostre liure, que celuy seroit trop malicieux qui en vouldroit charger l'imprimeur. Je viens au fait, vous admonnestant toutesfois de ce que Cesar Scaliger admonnestoit Cardan en son exercitation 88. que vous ayez vne autrefois a bien escrire & parler, ou ne vous en en mesler point. Je dis donques, S'il est ainsi qu'il n'y a que le sang pur & doux qui doye estre nommé humeur naturel, que deuiendront tous les autres escrits cy dessus? S'ils ne sont point naturels, il fault qu'ils soyent non naturels: & par consequent qu'ils excitent des maladies: Car nous appellons humeurs non naturels ceux qu'Avicenne a nomméz mauuais, lesquels sont causes des maladies. Or de dire, cōme vous avez fait en vostre page marquee 105. que de leur propre nature ils sont vicieux, il n'y a point d'apparence: Car tout ce qui est vicieux doit estre incontinent ietté du corps, autrement il fait

Ignorance
de Lannay

faict des maladies. Mais ny le phlegme, ny la cholere ny la melancholie ne doit estre incontinent iettée du corps, ains y doit estre reservee en quantité suffisante pour l'usage de nature : Ils ne sont donques point vicieux . Je sçay bien que s'il y en a trop grande abondance qu'ils font des maladies , mais aussi faict bié le sang le plus pur & le meilleur. Parquoy il faut dire qu'ils sont excrements naturels: excrements , a raison qu'ils sont reiectez de la nourriture:& naturels à cause que tant s'en faut qu'ils facent des maladies, qu'au contraire ils aydent les actions naturelles.

Ainsi donques ce phlegme qui est vn excrement naturel de la premiere cuisson faicte en l'estomach, est double , comme escrit Galen au premier liure de la faculté des aliméts: l'un est espaix & froid , semblable a l'humeur que lon void au fond des vrines: l'autre n'est pas espaix , lequel a beaucoup d'humidité ioincte avecque vn esprit flatulant: ce qui aduient a raison de la matiere, laquelle n'est en tout & par tout vaincue par la chaleur naturelle. Ces deux humeurs froids sont volontiers aygrets, l'un toutesfois plus que l'autre. Le premier est du tout inutile , non pas non naturel , si ce n'est qu'il soit retenu dedans le corps par quelque inconuenient: l'autre sert de beaucoup , car il maintient l'estomach & les boyaux en leur souppléssé accoustumée, & est celuy que nous voyons ordinairement és

dissections anatomiques, estre attaché contre l'estomach & cõtre les boyaux, & lequel leur est tellement naturel, que sans iceluy ils ne pourroyent faire leur action. Il est aussi tellement vtile, qu'avecque plus grande elaboration il se peult conuertir en sang, comme escript Galen : & pour ceste cause Aristote le nomme excrement vtile du premier aliment, lequel estant meslé parmy le pur aliment à la faculté de nourrir.

Histoire.

Ces deux derniers humeurs sont ceux que ordinairement vostre Antimoine fait sortir du corps, comme i'ay premierement obserué en moymesme, lors que i'en pris : comme ie l'ay obserué en plusieurs autres : & comme ie l'ay encore veu depuis vn an en vn Cõseiller de la Cour de Parlement, lequel nonobstant toutes les remonstrances que plusieurs medecins de ceste ville luy eussent faites de ne prendre de l'Antimoine, s'opiniastra tellement qu'il en prit. Craignant toutesfois les inconueniens & accidens qui en pouoyent suruenir me feit appeller pour luy assister. Cest homme de sa nature estoit melancholique, estoit tourmenté d'vne des plus estranges maladies que l'õ eust sceu veoir : auoit accoustumé en toutes ses purgations de ietter par bas grande quãtité d'humiditez melancholiques, glereuses, espesses, noires & terrestres, desquelles procedoit vne partie de sa maladie. Toutesfois ayant pris cest Antimoine

il ne iecta que de ces humiditez que i'ay dictes, en si grande abondance qu'il n'y eut celuy d'entre nous qui ne s'en esmerueillast. De la en auant il eut vne si grande foiblesse qu'il fut plus de quinze iours sans se pouuoir remettre. Je ne suis point seul qui l'ay ainsi obserué, Il y en a plusieurs qui le peuuent tesmoigner, gens de bien & dignes de foy. Or puis qu'il est ainsi que l'Antimoine fait sortir les humeurs naturels, l'un desquelz est vtile & demande a demeurer au corps, & l'autre inutile qui est iournellement mis hors avec les ordures ordinaires: ma consequence n'est elle pas bonne que l'Antimoine ne purge pas l'humeur vicieux? S'il eust purgé en ce Cōseiller, duquel i'ay parlé, l'humeur vicieux, n'eust il pas purgé l'humeur melancholique? Il n'y a point de doubte: Car de sa nature il estoit melancholique, il estoit malade d'une maladie longue depuis deux ans, laquelle luy a duré six mois encores, tant qu'il en est mort. Il auoit accoustumé en toutes ses purgations ordinaires de ietter des humeurs melancholiques, dont il se sentoit fort allegé, & toutesfois l'Antimoine qu'il prit ne fait sortir que des eaux: ie dis depuis le commencement iusques en la fin de son operation. Ce qui est encores plus à remarquer en cest homme, c'est que quelques iours au-parauant il auoit pris plusieurs drogues, que quelques empiriques luy auoyent baillees, lesquelles luy

auoyent fait sortir grande quantité de telles eaux : & toutesfois il ne laissa derechef d'en ietter encores autant. Or ne veux-je pas nier qu'il n'aduienne quelque-fois que parmy ces humiditez il n'y ait des autres humeurs qui se iettent par le benefice de la nature, laquelle se sentant aiguillonnée, tasche de se descharger de tout ce qui luy est nuisible : mais que ce soit par la vertu de l'Antimoine, ie le nie.

Que l'Antimoine ne peut guerir q d'une sorte de maladie, encor qu'il fust bon médicament.

J'ay encores amené vne autre raison en mon Discours, par laquelle i'ay monstre l'abus de vostre drogue, disant, que si l'Antimoine est vn medicament, & qu'il tire l'humeur par la similitude de sa substance, il faudra ou qu'il ne guerisse que d'une sorte de maladie, ou bien qu'il n'y ait qu'un humour au corps : d'autant que s'il tire le phlegme par ceste similitude, il ne pourra pas tirer la cholere par la mesme similitude : car le phlegme & la cholere sont humeurs contraires. Ceste proposition est appuyee sur celle d'Aristote, quand il dit, que rien ne peut proceder de son contraire. Là dessus vous pësez bien m'auoir pris au trebuchet, & dites en vostre page marquee 89. *Vostre raison est semblable à ceste-cy. Si la nutrition des membres du corps se fait par similitude de substance, le sang qui nourrist la chair ne pourroit nourrir que la chair : & non les autres qui ne sont semblables à elle. Car la substance de la chair, est differente à celle des nerfs*

& des os & des ligaments: Ergo il ne les peut nour-
 rir: mais seulement la chair, d'autant qu'elle a
 similitude de substance avec luy. Ce qui est manife-
 stement faux & vostre raison aussi. Voyla vo-
 stre texte qui contiét vostre premiere respõ-
 se, laquelle il nous fault vn peu examiner &
 vous monstrer vostre asnerie en trois mots. Le sang qui nourrist toutes les parties du
 corps n'est pas simple: mais il a en soy vn
 sang subtil & cholerique, duql les parties du
 corps plus seiches & plus chaudes sont nour-
 ries: il a aussi vn sang phlegmatique, duquel
 les parties froides & humides, ou pituiteuses
 sont entretenues: il a encores vn sang melan-
 cholique, pour nourrir les parties froides &
 seiches. Bref il a vne portion de sang que lon
 nomme pur, pour entretenir les parties char-
 nues, humides & chaudes. Ainsi donques si
 par le sang vous entendez celuy qui est de-
 stiné à nourrir tout le corps, lequel vulgai-
 rement nous nommons masse sanguinaire,
 ie vous responds que vous vous abusez beau-
 coup, pensant que ma raison soit semblable:
 Car la comparaison ne seroit pas raisonna-
 ble, de l'Antimoine qui est simple en soy, au
 sang qui est fait de diuerfes natures. Mais si
 vous entendez celuy qui est pur, à sçauoir, ce-
 luy qui fait l'vne des parties de toute la mas-
 se, ie vous responds que la comparaison n'est
 pas mauuaise, & que vous estes vn sot, si vous
 pensez que le sang qui nourrist la chair puis-

*Ignorance
de Lannay*

se nourrir les os, ou que celuy qui nourrist les os en puisse faire autant à la chair. Apprenez que c'est que le sang, & en combien de sortes il est pris par les medecins. I'employe ceste mesme response à la similitude que vous auez alleguee en la page suyuant, asçauoir de la racine des arbres, laquelle tire diuerses sortes de nourritures: car c'est vne mesme raison, d'autant que le suc tiré de la terre par la racine est semblable a toute la masse de sang, les parties de laquelle sont differentes, selon la diuersité des corps qui doyuent estre nourris. Vous me pësez encores mieux tenir quand vous argumentez des qualitez à la substance, disant que la Rheubarbe est amere & stiptique, qui sont deux qualitez contraires: à quoy ie vous responds que si vous eussiez estudié vostre physique, vous eussiez appris qu'en vn mesme corps il y peut auoir des qualitez contraires, mais non pas des substances: car chaque corps n'a qu'une substance. Lisez vostre Aristote: il la vous apprendra. Vous passez plus outre en ceste mesme page sur la fin, disant: *Puis semble à veoir par vostre dire que nulle maladie ne peut estre engendree, de deux diuerses humeurs. Ce qui est du tout contraire a raison: &* contre ce, que voyons tous les iours. Voyla vn de vos coups d'escrime accoustumez, asçauoir calomnie. Ie vous prie de cotter le passage ou i'ay dit ce que vous m'imposez, si non ne trouuez point mauuais si ie vous dis, sauf l'hon-

neur de vieillesse, qu'il n'en est rien, & que vous estes vn calomniateur effronté. Je sçay bien, Dieu mercy, que diuerses maladies peuvent estre entrelassees ensemble : & toutefois cela n'empesche point que ma proposition ne soit vraye : asçauoir que si l'Antimoine tire la cholere par la similitude de substance, il ne peut par la mesme faculté tirer le phlegme. Venons maintenant à l'autorité de Galen, laquelle vous m'alleguez au contraire, & laquelle est escrite au cinquieme des simples, là ou il dict que tous medicaments, lesquels il s'est apperceu auoir vertu de purger ont la puissance de tirer, les vns vn des humeurs, les autres deux, ou bien plusieurs : ce qui leur est commun à tous. Si vous eussiez bien entendu ce passage vous ne fussiez tombé en cest erreur de penser qu'une mesme substance, qui est simple puisse par vne mesme vertu attirer deux choses contraires : Car il n'y a homme au monde tant peu versé en la philosophie naturelle, qui ne die que s'il y a similitude de substance entre l'Agaric & le phlegme, il faut qu'il y ait dissimilitude aussi entre l'Agaric & la cholere : car le phlegme & la cholere sont choses non seulement dissimilaires, mais aussi contraires. La question d'oùques est, comment il se peult faire qu'un mesme medicament purge le phlegme & la cholere, veu qu'ils sont contraires : voire qu'il s'en trouue quelques vns qui ayent la force de pur

*Comment
vn mesme
medica-
ment peut
purger di-
uers hu-
meurs.*

ger tous les humeurs . Escoutez donques & retenez, si vous pouuez : Chasque médicament purgeant a en soy deux vertus de purger: l'une luy est particuliere, laquelle il execute par la similitude de sa substance: c'est à dire, comme escrit Auerrois, par vne propriété, laquelle procede de la proportion des elements, & laquelle immédiatement suit la forme. Item par vne aptitude, laquelle est entre l'agent & le patient, en telle maniere, que ce qui est le plus fort, est apte à agir: & le plus foible à patir. Car il ne faut pas que nous pensions que ceste similitude de substance soit telle que l'une ressemble à l'autre, d'autant que chasque corps a vne forme particuliere: mais pour-autant que les propriétés de l'une & de l'autre sont semblables, nous disons que les substances le sont aussi. Non que veritablement elles le soyent: car s'il n'y auoit quelque dissimilitude entre les deux, il n'y auroit point d'action. Ils sont semblables en genre, & dissemblables en espece. L'autre vertu de purger est generale & commune, par laquelle vn médicament peut non seulement faire sortir du corps son semblable: mais aussi tous les autres humeurs, & le sang mesme: Car tout médicament purgeant irrite la nature, il relasche & ouure les conduits. Ceux qui sont doux & benignes ne tirent que l'humeur qui leur est familier, ou bien peu d'autre avecques, d'autant qu'ils ne

ont pas assez de force, pour dauantage irriter la nature. Ceux qui sont plus forts en tirent deux: commel'Agaric: l'vn par la similitude de substance & vertu particuliere, asçauoir la pituite: l'autre par sa vertu commune & generale, asçauoir la cholere, laquelle est plus facile à suyure. Car comme dit Hippocrate, incontinent que le medicamēt est entré dedans le corps, il agist premierement en ce qui est plus prochain de sa nature, entre toutes les choses qui sont au corps: puis il tire & purge le demeurant. Ceux qui sont violens en purgent dauantage: Car ceste generale & commune puissance est plus forte en eux qu'elle n'est es autres. Ceste explication se peut facilement retirer mesme du texte de Galen, lequel vous auez laissé, quand il dit en la fin ces mots: Ce qui leur est commun à tous: asçauoir de purger deux ou plusieurs humeurs. Or pour autant que ie sçay bien que mon nom vous est tellement odieux, qu'a grand peine voudriez-vous croire à ce que i'ay dit: mais au cōtraire vous vous opiniatrez dauantage contre la verité: Je suis content que vous ne m'en croyez point, pourueu que vo⁹ vouliez adiouster foy à deux personages excellens en leur art, desquels ie vous coteray & allegueray le texte de mot à mot: l'vn est François, & l'autre Espagnol: asçauoir, Fernel & Christofle à Vega. Fernel escrit, autroisieme liure de sa Methode chap. 5. ceste

desmesuree & superabondante purge ne se peut faire à raison de la propriété de toute la substance, pourautant que nul médicament ne peut auoir la substance semblable à tout humeur. Quelques vns rapportent ceste cause à la chaleur & acrimonie, ou poincture du médicament, laquelle en partie ouure les embouchures des veines, & en partie irrite continuellement & tellement qu'à peine peuvent elles retenir les humeurs. Parquoy outre la particuliere vertu de purger, que chascun médicament retient comme propre, il est encores necessaire de luy en attribuer vne generale, par laquelle il s'attache mesme aux autres humeurs & les purge communement. Il dit encores en la fin du mesme chapitre: Parquoy il est necessaire que chascun médicament soit doué d'une generale vertu de purger, outre sa particuliere, par laquelle lors que la purge sera trop forte, il fera sortir les autres humeurs, & ce estant aydé par la chaleur & acrimonie, ou poincture. Le passage de Christoffe à Vega est en son second liure de l'art de medeciner, l'endroit ou il parle des medicamens purgeans, en ceste façon: Parquoy veu qu'il est impossible qu'un mesme medicamēt ait similitude & familiarité avecques les humeurs, lesquels sont de diuerse nature, substance, temperament & meslange: aussi nous asseurons qu'il ne se peut faire qu'un médicament seul & simple tire la cho-

lere & la pituite : mais que quelques-fois il purge l'un & l'autre : l'un par familiarité de substance , & l'autre en irritant la nature , en relâchant & ouvrant les conduits. Si vous eussiez bien leu ces docteurs muets, desquels vous dites n'estre destitué, vous ne m'eussiez repris à l'estourdie : mais vous eussiez trouué que Vega appelle tous ceux qui pensent autrement, lourdaux & ignorants. Toutesfois si vous pësez qu'ils ne soyët hommes suffians pour en estre creuz, lisez au 5. liure du Colliget d'Auerrois, & vous trouuerez ce que ie dy, voire de mot à mot : & d'abondant vous y pourrez lire vne autre raison, par laquelle les medicamës qui agissent de toute leur substance, peuuent purger diuers humeurs. De la nous pouuôs retirer la raison des purges desmesurees , lors que lon baille trop grande quantité de medicament purgeant & que plusieurs humeurs en sont iettez hors du corps. Car, comme escrit Falopius, ceste purge ne se fait point par la nature du medicamët pur-*Cause des purges desmesurees.* geant, mais premierement l'humeur qui est purgé au commencement est tiré par la nature (asçauoir particuliere) du medicament : puis les autres humeurs suyuent, ou à cause de la vehemence du medicament, ou à cause des parties imbecilles, foibles & lasches.

Ie sçay bien que quelques vns ont voulu expliquer ceste diuerse purge en vne autre sorte, disant, que la nature peut mesler di-

uerſes ſubſtāces en la compoſition d'un corps ſimple : tout ainſi que lon fait artiſciellemēt en la meſlange des medicamens compoſez, la ou il ſe fait vn temperament accidentaire, procedant des qualitez des ſimples medicamens, leſquels ſont meſlangez & par leur naturelle action ſ'accordent en vne forme, que nous nommons accidentaire, ou artiſcielle : ſans que les formes ſubſtanciellles de chaſque ſimple ſoyēt aucunement perdues. Toutesſois il y a grāde apparēce de penſer q̄ ceſte diuerſité ſoit ſeulement és qualitez premieres, ou ſecondes: & non és ſubſtances, d'autant q̄ chaſque corps naturel, biē qu'il ait diuerſes qualitez, toutesſois n'a qu'une ſubſtāce, laquelle eſt ſimple & occulte, dont procede ceſte action, par laquelle les humeurs ſont purgez.

Ceſte propoſitiō donques eſt vraye ſelon Galen, & ſelon ceux qui l'entendent mieux que vous, aſſauoir quand ores ainſi ſeroit que l'Antimoine fuſt bon medicament purgeant, ſi eſt-ce que ſi par ſa ſimilitude de ſubſtance il tire le phlegme, il ne peut pas, par ceſte meſme ſimilitude de ſubſtance, tirer la cholere, ou la melācholie. Et toutesſois vous n'avez point de honte de dire que ie ne ſay que brouiller le parchemin, que c'eſt bien argumenté pour vn docteur de Paris, que ie ne ſay que ie diſ : & mille autres telles impudences, par leſquelles vous vous declairez e-

estre encores bien fort ieune d'esprit.

Ces raisons, parauenture non assez con- *Diuerses*
 siderees, ont esté causes q̃ les derniers Grecs *opiniōs des*
 nese sont accordes touchant la vertu des *medecins*
 medicaments simples, qu'ilz disent pouuoir *Grecs tou-*
 purger diuers humeurs: Car les vns escriuent *chant la*
 que la Scamonee purge la cholere & la pitui- *vertu des*
 te. Paul & Aesse n'ont parlé seulemēt que de *medica-*
 la cholere. Les vns escriuent que la Colo- *mens qui*
 cynthe purge le phlegme & les humeurs gle *purget di-*
 reux: les autres ont dit la cholere & la pitui- *uers hu-*
 te. Et ainsi d'une infinité d'autres: tellement *meurs.*
 qu'il est bon a voir qu'il y a vne grande in-
 constance, en ceste purge de diuers humeurs
 faicte par vn mesme medicament. Or ceste
 generale & particuliere vertu des medica- *Autre ex-*
 ments purgeans peult estre encores expli- *plication.*
 quee en ceste maniere: tellement que nous
 recongnoissons en la forme & substance des
 medicamēts purgeās vne vertu de purget, la-
 quelle est generale de soy-mesme, & par la-
 quelle elle agist generalmente & indefini-
 ment, mouuant & excitant ceste vertu pur-
 geante, qui est és medicaments purgeants.
 L'autre particuliere & definie vertu q̃ nous y
 recongnoissons n'est autre que ceste gene-
 rale, laquelle s'accorde a la particuliere mes-
 lange du medicamēt, & est quasi cōme con-
 duicte à purger c'est humeur cy, ou cestuy la.
 L'estre de ceste particuliere meslange est
 vne cause qui est meüe immédiatement, &

laquelle aussi fait mouuoir en agissant. Mess-
 ué semble aucunement toucher ces deux fa-
 cultez en chasque medicament, quant il dict
 que la forme (laquelle il nomme vertu cele-
 ste) a double faculté, l'une commune, & l'au-
 tre propre. Et Eustache Quercetan les a ex-
 pliquees briuelement en son commentaire
 sur le liure d'Hippocrate, de la nature humai-
 ne. Il ne se fault toutesfois abuser s'il aduient
 que les medicamēts, voire ceulx qui sont du
 nombre des benigns, facent sortir des autres
 humeurs, avecque celuy qu'ilz purgent de
 leur particuliere vertu. Car il y-a le plus sou-
 uent dedans les premiers boyaux, sçauoir est
 a la sortie de l'estomach, vn amas de cholere,
 laquelle coulle en ceste part par les cōduicts
 du fiel. Ce qui se voit en l'ordinaire dissection
 des corps, que lon anatomise. Il y a aussi grā-
 de quantité de pituite excrementieuse, tant
 vtile qu'inutile: tellemēt que parmy les pur-
 ges que fait l'Agaric (lequel de sa nature par-
 ticuliere s'attache au phlegme) il se rencon-
 tre de la cholere. Cela aduient pour autant
 que l'Agaric & la Rheubarbe, & la pluspart
 des medicaments purgeants par excellence,
 ont en eux ceste premiere generale faculté
 de purger, qui procede tant de leur chaleur
 & acrimonie, comme de leur poincture, par
 laquelle ilz purgent les humeurs qu'ilz ren-
 contrent, avecques ceulx ausquelz particu-
 lierement ilz s'adressent: mais c'est, comme

*Raison
 pour la-
 quelle les
 medica-
 ments be-
 nigns font
 sortir di-
 vers hu-
 meurs.*

J'ay dict, par ceste vertu commune. Or encores donques que vous voyez quelquefois des humeurs bilieux ou choleres par-my des pituiteux : voire des bilieux & pituiteux par my des melancholiques , ceste proposition ne laisse pas d'estre vraye , qu'un medicamēt par vne mesme vertu specifique ne peult tirer qu'un humeur.

Les matieres sont tellement confuses en vostre responce que sans y penser j'ay pres- que laiss  couller vne faulte , de laquelle vous m'accusiez qui  st en vostre page marquee 96. la ou vous me reprenez de ce que j'ay dit que la facult  des medicaments purgeans doit estre experim t e en la fa on que Galen a escript en son liure des Simples, & que pour congnoistre quel humeur il purge & comment, Il le faloit premierement bailler a vn h me sain & de bonne complexion, puis a vn qui soit vn peu intemper  : & en la fin a vn homme qui soit malade. Cela est escript au douziesme feullet de m  Discours. Vous dictes au contraire que Galen n'entendit jamais telle preuve debvoir estre ainsi faicte, des medicaments purgatifz. Et vn peu plus bas vous nous voulez faire acroire que la definition que Galen baille des medicaments, au premier chapitre du premier liure des Simples, ne s'entend point des medicaments purgeans. La preuve que vous pensez faire du premier point est en la page suyante

*Comment
il faut ex-
perim ter
les medi-
caments
purgans.*

afçauoir que les proprietiez des substances font eſlongnees de methode & de raiſon, & ne ſont cōgnues que par la ſeulle experience. Ie cōfeſſe que les proprietiez cachees ſont cōgnues par la ſeulle experience: mais ie diſ que de la il ne ſ'enſuit pas que l'experience des medicaments purgeants ne ſe face par quelque methode, en la façon que l'eſcript Galen: tout ainſi cōme des autres, qui agiſſent par qualitez. Car le meſme Galen diët que l'experience ſe peult faire de propos deliberé, tellement que ſi i'ay enuie d'experimenter la vertu d'un medicament, que i'auray opinion eſtre purgeant, ie le pourray bailler a un homme ſain en telle quantité qu'encores qu'il ſe conuertiffé en l'un des mauuais humeurs, ſi eſt-ce qu'il ne luy fera pas grand mal: puis ie le bailleray a un hōme intēperé & verray quelle action il aura faicte: en la fin ie le bailleray a un malade, pour cōſiderer apres quelz humeurs il aura tiré, & en quelle maniere, & combien. De la ie pourray faire vne conſeſſion, & dire tel medicament à la vertu de tirer un tel, ou un tel humeur. Cela eſt-ce autre choſe qu'experience? Eſt-ce contreuenir a la ſentence de Galen qui diët que les facultez de toute la ſubſtance ſe congnoiſſent par la ſeulle experience? Pour faire accroire voſtre opiniō, vous

*Faute de
L'annay.*

avez fait vne des lourdes fautes qui ſoit en voſtre reſponſe, & qu'un apprenti d'apothicaire

taire seroit bien marry d'auoir faite. Galen voulant escrire des medicamēs faiēt comme le bon Logicien, il cherche que cest que médicament, & dit : Nous nommons médicament tout ce qui peut changer & muer nostre nature. Vous pensez que cela se doiue seulement entendre des medicamens qui agissent par qualitez manifestes, & ie vous dy que la definition se doit rapporter aux medicamens, desquels il dispute en tout le liure: autrement elle seroit manque, & accuseriez Galen d'estre aussi mauuais Logicien que vous estes. Or est-il ainsi qu'il parle des medicamens purgeans, aussi bien comme des autres: Il s'ensuit donques que ceste definition comprend les vns & les autres. D'auantage la raison y est: Car les medicamens purgeans qui agissent par leur substance changent & muent, ou alterent aussi bien la nature, comme font les autes. Bref, si vous eussiez tourné le fueillet vous eussiez trouué au mesme chapitre que Galen ayant deuisé le médicament en simple & en composé, il donne la definition de Faculté, disant que cest vne cause efficiente: Puis il la diuise, & en la fin il dit: Certainement il y a vne certaine faculté purgeante és medicamens qui font vomir, &c.

Et au commencement du chapitre second, ou il monstre les moyens de iuger de chasque faculté des medicamens, ayāt esgard au corps auquel il doit estre appliqué: Par mesme rai-

son, dit-il, Il ne s'ensuit pas que si l'Helebore
 purge l'homme, qu'il purge aussi les Cailles.
 Vous voyez donques, ou pouuez voir, si les
 yeux de vostre esprit ne sont troublez, ou a-
 ueuglez d'ignorance, que non seulement Ga-
 len a donné la definition des medicamēs qui
 agissent par qualitez : mais aussi qu'il entend
 que lon experimente les medicamens pur-
 geans, & que lon arreste de leurs facultez au
 regard de ceux, lesquels ils doiuent purger.
 Parquoy, cōme ainsi soit que lon n'en puisse
 mieux arrester qu'en les experimentant sur
 les sains, sur les intēperez, & sur les malades.
 Il s'ensuit que calomnieusemēt & malicieuse-
 ment, mais plustost effrontemēt, vous m'avez
 repris de l'auoir escrit: Et n'avez point fait de
 difficulté d'expliquer l'intention de Galen cō-
 me si voulant parler de toutes sortes de me-
 dicamens, il n'auoit tontesfois donné la defi-
 nition que d'une espece. Dauātage vous auez
 vn passage de Galen en sa Methode, quād il
 dit qu'en icelle il declare les choses, lesquelles
 seulement se peuuent mōstrer par raisons &
 non par la seule experiēce: mais qu'aux liures
 de la faculté des medicamēs il mesle les vns &
 les autres : asçauoir ceux qui se cognoissent
 tant par experience, comme par raison. Ce
 passage vous mōstre que puisque Galen parle
 en ses liures de la faculté des Simples, tant des
 vns que des autres, Il faut qu'il ait entēdu sa
 definition tant des vns comme des autres.

I'ay encores vn seul point a cōfirmer contre vos ruades & contre la comparaison que *Faulse cō-* Paracelse a faite en son triosieme liure de la *paraison* longue vie, chapitre de l'Antimoine, la ou il *de Para-* dit au commencement que tout ainsi comme *celse.* l'Antimoine affinè l'or, ainsi & par mesme raison & forme il affine le corps. Laquelle comparaison i'ay en tout & par tout niee en mon Discours, disant qu'il n'y a aucune proportiō ou compassion entrè l'Antimoine & le corps, comme il y a entre l'or & l'Antimoine. Vous, *Calomnie* qui auez l'esprit prompt à calomnier, auez *de Launay* pris ceste mienne raison tout à rebours, disant, en vostre page marquee 64. que i'ay escrit qu'il n'y a non plus de proportion ou compassion entre d'Antimoine & le corps, cōme il y a entre l'or & l'Antimoine. Voyez donques apparemmēt par la collation de ces deux passages que vous estes vn falsificateur, & calomniateur. Car ie dy qu'il y a quelque accordance entre l'or & l'Antimoine, & qu'il ny en a point entre l'Antimoine & le corps humain. L'accordance ou cōpassion qui est entre l'or & l'Antimoine est qu'ils sont tous deux soubz vn mesme genre: Car l'vn & l'autre est mineral: mais le corps humain & l'Antimoine sont distinguez de genre: l'vn est animal, & l'autre mineral: l'vn est cōpris soubz les corps que les philosophes nōmēt animez, & l'Antimoine est soubz les inanimez. Parquoy ils sont fort eslongnez l'vn de l'autre.

Or est-il ainſi que tout ce qui a la vertu de purger vn autre, doit auoir quelque communication avec iceluy, autrement il luy ſeroit contraire en tout & par tout, & par conſequēt venin que no^s diſons deletere & de toute la ſubſtance. C'eſt pourquoy Fernel eſcrit que ſouuentefois vn remede eſt bon à vn & ne l'eſt pas à l'autre, à raiſon que, les medicamens ont des proprietéz communes avec les corps. Auſſi faut-il neceſſairement qu'il y ait compaſſion entre le corps & le medicament, quel qu'il ſoit : autrement noſtre chaleur ne pourroit pas agir en iceux pour les exciter & eſmouuoir à executer leur vertu & faculté. C'eſt ce qu'a eſcrit Falopius en ſon liure des Medicamens purgeans, aſçauoir, qu'Ariſtote a fort bien penſé, lors qu'il a dit que les medicamens purgeans ne ſont point domptez par la chaleur naturelle: toutesſois qu'ils enduret quelque choſe par icelle, d'autant qu'elle les amenuiſe en parties deliees, elle les diſſout & les eſpand par les corps. Il dit encores qu'Ariſtote a fort bien pēſé que ſi les medicamēts purgeāſ n'enduroyēt toutes ces choſes par la nature, il ne ſe feroit aucune purgation, d'autant que nous auons pluſieurs medicamens purgeāſ, leſquels toutesſois eſtans baillez ne purgent pas à cauſe qu'ils ne peuuent pas eſtre delayez, fondus & eſpandus dedans le corps par la chaleur, & tels ſont les metaux, le voirre & autres ſemblables, comme i'ay dit.

Qu'il doit auoir communication entre les medicamens purgeans, & les corps qui ſont purgez.

Brefie dis qu'il fault que le medicament aye vne nature moyenne entre les choses qui blessent le corps & celles qui l'aident. Ce que quelques vns ont interpreté entre la nature & l'humeur vicieux contraire a nature. Mais s'il est ainsi comme vous dictes en vostre page. 65. *que les medicaments purgeants n'ont nulle familiarité ou société avecques nostre nature & qu'a l'opposite ilz la degastent & corrompent & la muent en leur nature s'ilz peuuent* : quelle difference mettez vous entre medicament purgeant & entre le venin : veu que Galen escript que les medicaments purgeants recoyuent vn commencement de mutation par la nature? Ce commencement de mutatio n'est autre chose qu'un acheminement a nourriture. Or est il ainsi qu'il ne se peult faire aucun acheminement de nourriture en ce qui est en tout & par tout contraire, dont il ensuit que les medicaments purgeants ne sont en tout & par tout contraires a la nature: mais qu'ilz luy sont familiers en quelque chose. Mesme Galen a escrit au premier liure des aliments, que la Colocynthe, l'Helebole & la Scamonee ont en eulx quelque qualité douce & nourriciere: & toutesfois ce sont des medicaments lesquelz nous estimons estre les plus violéts de to^o & plus esloingnez de la nature humaine. Regardez que deuiédra vostre Antimoine lequel n'a en soy aucune telle qualité, ains comme vous confessez, est en tout &

*Faute de
Launay,*

par tout contraire a la nature. Voyla comment vous monstrez bien que vous ne sçauetz que c'est que venin, & moins encores q̃ c'est que medicament purgeant.

Pour toutes ces raisons Mesuë a estimé les medicaments purgeans estre les meilleurs, ceux qui estoient humides & chauds, d'autant que par ce moyen ilz se retirent d'auantage de la nature des venins & approchent de la nostre. Mais auant que sortir de ce propos i'examineray plus au long la cōparaïson que Paracelse fait de l'or au corps humain, & de l'Antimoine a ce qui a pouuoir de le netoyer. Ceste comparaïson est plus manifestement declaree en vn liure imprimé depuis peu de temps, soubz le tiltre de *La grande, vraye, & parfaicte chirurgie, du tresdoct & tressauant prince de Philosophie & de medecine Philippe Aureole Theophraste Paracelse, comprise en deux liures.* Ce tiltre est certainement vn beau bouchon pour vendre le vin. Il est donques escript au cinquiesme chapitre du troisieme traicté ce qui ensuit.

Le Medecin doit cognoistre la nature & vertu de toutes choses, & par ainsi il pourra trouuer la science des medicaments ou remedes, par les vertus exterieures cōme la nature demonstre : comme pour exemple de l'Antimoniũ qui a esté trouué par la science d'Alchimie, de maniere qu'il n'y a rien qui purifie & purge l'or sinon le seul Antimoniũ qui ne laisse en iceluy rien d'impur, parquoy les studieux hōmes

ont pensé que puis qu'il faisoit cela en l'or, qu'il doit auoir vne grande vertu, & arcane au corps humain, ce qui appert aussi, & c'est vn mistere que nous auons deuant les yeux: mais nous n'en pouuons vser ainsi qu'orseures, mais cōme medecins: parquoy s'est ensuyuie la preparation d'iceluy, de maniere que on en tire vne teincture laquelle on prepare en vne Medecine: tellement qu'il faict au corps la mesme operation qu'il fait en l'or: & tout ainsi qu'il purifie l'or, ainsi purge-il le corps, Exemple. Les orties, flammula, Cantharides, demonstrent manifestement lenrs operations, de sorte qu'elles font vesicatio & cauterisent, & c'est vne exterieure demonstration de leurs vertus: mais quand elles sont preparees par l'Alchimie, elle font beaucoup d'auantage, & tirent a elles ce qu'elles doyuent, & non seulement eau es vessies, mais tirent aussi dehors (outre ladiete eau) toutes catharreuses defluxions & leurs qualitez. La pierre d'aimant ou magnes attire le fer a soy, mais quand il est prepare par l'Alchimie, il tire a soy les fers enfonccz, & perdus dedans le corps & enclos de chair dedans les playes, & de telles choses preparees se doyuent faire les Emplastres vulneraires & par ainsi se trouuent de merueilleuses sciences, & i'eusse volontiers orné le premier liure de ma Chirurgie de tels subtils secrets & Arcanes, mais pource que la science d'Alchimie est en mespris, & que la pluspart des maistres vsent de Sophisterie: & d'auantage que nul ne veut rendre peine ne faire diligence, mais traictent toutes choses avec ignorance & rudesse d'entendement, ie m'en suis voulu

taire iusques en ma petite Chirurgie : Mais un chacun doit sçauoir que la nature demonstre ses vertus exterieuremēt & selon cela en doit le Medecin vser, pour la necessité des malades : & d'en auoir les vertus cela luy sera enseigné par la sciēce d'Alchimie.

Encores faut-il sçauoir que l'Antimoniū purge l'or seulement, & consume les autres metaux, & l'argent se diminue grandement par luy. Et pource que nostre corps est comme l'or, & est comparé a ice-luy en toutes ses qualitez & vertus, & que l'Antimoniū purifie le corps & l'or seulement, les reduisant en santé, & en leur plus haut degré, mais il corrompt & destruit toute autre chose, encore que elles soyent pures en elles mesmes, car il est comme un feu qui purge aucunes choses, & destruit les autres : Cest Antimoniū est vne purgation sans aller a selle, qui purge & nettoye le corps par dessus toute chose & prend entierement & oste tout ce qui est impur au corps, & le purifie iusques au plus haut degré de santé, & le deliure de toutes maladies desquelles procedent vlceres & autres accidents.

Les Philosophes l'ont fort cherché & experimenté mais ils n'ont point trouué le droit chemin, iusques a maintenant qu'il est venu en lumiere : & est vne science que tous maistres en medecine & Chirurgie deuoyent sçauoir, car sa purification est le commencement & entré pour guarir toutes maladies quelles qu'elles soyent, & là ou on en vse, ne sont tāt degastez & destruis : comme les ignares & presumptueux medecins en gastent : ie les appelle presumptueux, pource qu'en toutes leurs operations ne sont

seulement que cuidoer & presumer sans iamais sçauoir rien de certain qui est la plus grande mocquerie & vitupere qui pourroit aduenir à vn medecin.

Sa preparation est telle, & celuy qui la veut entendre, doit sçauoir l'Alchimie car on ne peut rien parfaire ne accomplir selon les Apoticairez.

R. Antimonij puluerisé comme vn Alcohol, soit reuerberé en vn reuerberatoire bien serré vn mois de long, & ce sera vn volatil, premierement blanc, en apres iaulne, au dernier rouge & brun de couleur, subtil & leger, quand il est rouge & reuerberé, tu le prendras & en tireras son essence par l'esprit du vin, tellement que ledict esprit excède de vingt doigts & quand son essence est dedans l'esprit du vin, tu les dois separer l'un de l'autre, & retiens l'esprit du vin ensemble ainsi meslez, cest la plus haute & parfaicte mondification & qui est plus noble & plus a priser, qui oste tout ce qui est impur au corps, & outre ce tout ce que l'homme peut trouuer en l'homme, ce secret & medicament le trouue, & ne fait nuls presumptueux & ignares medecins, mais experts & sçauants: Les Philosophes ont beaucoup cherché sur l'Antimonij, & aussi les artistes, mais ils n'ont point vescu le temps pour auoir le vray fondement & cognoissance pource qu'ils sont morts deuant moy.

Voila le chapitre entier au mesme langage, auquel il a esté traduit du hault allemand par M. Pierre Haffard. Premierement vous voyez de combien vostre preparation d'An-

timoine est eslongee de ceste cy, & que quã-
 ores ie vous confesseroy que l'Antimoine
 fait au corps la mesme operation qu'il fait en
 l'or, & que tout ainsi qu'il purifie l'or ainsi il
 purge le corps: si est-ce q par son tesmoigna-
 ge mesme vous serez mis au rang de ceux qui
 ont l'Alchemie en mespris & qui vsent de So-
 phisterie: Car vous n'en faictes pas vne pur-
 gation sans aller a la selle: ce que toutesfois il
 dict estre: vous n'en tirez point l'essence avec-
 que l'esprit du vin, & bref vous n'y obseruez
 aucunes des choses par lesqelles il le prepare.

Or la raison pour laquelle Paracelse à pensé
 que l'Antimoine purge le corps, ainsi com-
 me il purge l'or, est escripte en ce chapitre,
 quand il dict: *Et pource que nostre corps est cōme*
l'or & est comparé a icelluy en toutes ces qualitez

Faulse pro- & vertus, &c. Ceste propositiō de Paracelse
 position de est faulce & par cōsequent tout ce qu'il a ap-
 Paracelse. puyé dessus: Car encores que nous dissions
 que le corps de l'homme est comparé a l'or,
 asçauoir en ce qu'il est le plus excellent entre
 tous les corps viuans, comme l'or l'est entre
 tous les mineraux: si est ce que ce n'est pas a di-
 re qu'il luy soit semblable en qualitez & ver-
 tus: & ainsi les hommes, qu'il nōme studieux,
 ont fort mal pēsé que puis qu'il purifioit l'or,
 il debuoit auoir vne grande vertu au corps
 humain. Car, surquoy ont ilz apuyé ceste cō-
 sequence? si c'est sur les qualitez & verrus,
 cōme dict Paracelse, ilz sont mal fondez. Les

qualitez de l'or qui est mort sont cōtraires au qualitez du corps viuant. Il n'y a point de cōparaison entre les vertus de l'vn & de l'autre: bref il fault, auāt que passer plus oultre, prouuer ce point touchant les qualitez & vertus semblables en l'vn & en l'autre, autrement ie ne voy point pour quelle occasiō l'Antimoine doibue faire tant de miracles. Ie sçay bien que Dieu a doué de grandes vertus non seulement les animaux & vegetaux: mais aussi les mineraux. toutesfois il ne fault pas faire vne regle si generale que toutes choses soiēt bonnes a toutes. Ie confesse qu'il peult auoir en l'Antimoine, comme aussi és autres mineraux, des vertus & facultez, commodés pour guerir quelques maladies exterieures. Ie confesse que par le moyē de l'Alchemie on peult faire de fort belles cures. I'approuue, ie loue & exalte grandement l'extraction des huilles quintessentielles, d'autant qu'en icelles les vertus & facultez des choses sont plus pures & ainsi moins empeschees par les excrements corporelz. Ie sçay biē que leur action est plus prompte & manifeste, qu'elle n'est de celles que nous auōs chez nos Apoticairez, Ie sçay bien que Iean de Rupefcissa a monstře le moyen de tirer la quinte essence de l'Antimoine, de laquelle il vse és maladies exterieures: ie sçay bien qu'il luy baille telle louange qu'il n'y a miracle digne de comparer a la vertu de ceste drogue. Toutesfois il ne faut telle-

mēt desborder que nous penſiōs toutes choſes pouuoir eſtre faićtes par ce moyen. Les Huilles qui retiennēt la nature des choſes deſquelles elles procedent ſont bonnes, ou mauuaiſes interieurement ou exterieurement, ſelon la nature des corps ou elles ſont priſes. Car elles ne ſont en rien differentes d'iceux, ſinon en ce qu'elles ont grande vertu en peu de corpulence : tellement que les Huilles tirees des corps venimeux ſont plus dangereuſes que les corps meſmes. Si l'or, ſi le plomb, ſi l'Antimoine ſont venimeux eſtant pris par la bouche (cōme certes ilz ſont enſemble tous autres mineraux, les vns pl⁹, les autres moins) il ny a point de doubte que les Huilles extraites d'iceux ne ſoyent encores plus venimeuſes. Je diſ ſi en la preparation & extraction d'icelles il n'y a quelque choſe meſlee, qui aye la vertu de les corriger. Et d'autant que vous mettez en auant le Lapis ou pierre d'Azur, la pierre armenienne qui ſont mineralles, deſquelles toutesfois quelques anciens ſe ſont aydez, & les ont ordonnees a prendre par la bouche: Je vous diray librement ce que j'en penſe, & ne ſuis ſeul de ceſte opiniō: aſſauoir que pour les raiſons cy deuant deduićtes, ie n'en puis approuuer l'vſage: non pas meſmes de l'or, duquel toutesfois ſans raiſon on vſe en quelques pondres : mais c'eſt en ſi petite quantite qu'il n'en peult aduenir inconueniēt. Auſſi voyons nous aujourd'huy comment

l'vsage de ces pierres s'est abatardy, & en trouue-lon bien peu qui s'y veuillēt fier: encores que lon prēne assez de peine a les preparer. C'est pourquoy Falopius escript qu'elles ne sont plus en vsage: & qu'il n'a veu aucū qui en vsast, excepté Brassauolle, lequel mesloit quelquesfois le Lapis parmy le medcament qu'il nomme Elefcoph. Je croy qu'il n'y a celluy de si petit iugement qu'il ne sache bien que plusieurs Arabes, voyre quelques derniers Grecs, ont meslé quelques drogues par eux inuentees, plustost par opinion que par raisons qu'ilz eussent de ce faire: l'vsage desquelles toutesfois a esté laissé peu a peu, ou a cause des grāds inconueniēns qui en sont ensuiuis, ou a raison que telles choses estoient superflues.

Chapitre Cinquiesme, auquel il est briefuement monstré que l'Antimoine ne peut guerir la peste.



Vous auez remarqué en plusieurs endroits de vostre liure que l'Antimoine, entre autres proprietiez qu'il a, est fort singulier pour guerir de la peste. Ce qui m'a incité a rechercher plus curieusement les opinions des anciens & modernes escriuains, pour en retirer la verité: & pour essayer de faire aduouer ceste vostre proposition, ou bien la mettre au

rang des autres, lesquelles nous auons desia examinees. Et encores que les raisons cy deuant deduietes soyent suffisantes pour vous conuaincre d'erreur: Si est-ce que ie touchera ce poinct plus particulierement, a celle fin que les lecteurs puissent entendre vostre

Que c'est suffisance. Or pour autant que ce mot *Pe-*
quil est ste, n'est pas vn mot particulier a quelque
signifié chose, ains general comprenant plusieurs es-
par le mot peces de maladies soubs soy: & a celle fin q
de Peste. nous entendions plus aisément ce dont il est

Differēces deux premieres differences de maladies, les
des mala- vne sont communes & generalles, les autres
dies selon sont particulieres: les communes & general-
Hippo- les sont celles, lesquelles courēt en quelques
crate. lieux & s'attachent esgallement a plusieurs.
Et tout ainsi comme elles sont communes,
ainsi sont elles engendrees de causes commu-
nes, comme de la corruptiō de l'ær, lequel est
respiré par vn chacun: ou de l'vsage de quel-
ques eaux, ou viandes corrompues, desquel-
les vn chacun vse. Ces maladies sont ou par-
tialles, c'est à dire familiares en vn certain
pays & region, lesquelles, à raison des causes
communes à vn chacun, s'attachent esgalle-
ment à tous ceux de la region: ou bien elles
sont externes, suruenantes par quelque in-
conuenient non accoustumé. Les grecs & no-
Epidimies stre vulgaire aussi les appellēt epidimies, dōt

les vnes sont pestilentes, contagieuses & per-
 nicieuses, & les autres ne le sont pas. Les vnes
 & les autres viennent des causes que nous a-
 uons nommées générales & communes,
 mais diuersément infectées. Les maladies par-
 ticulières sont celles, lesquelles s'attachent par-
 ticulièrement à vn chacun: comme quand
 l'vn est malade de la fièvre tierce, l'autre de
 la quarte: l'vn de la pleuresie, l'autre de la sci-
 nâcie, & ainsi des autres. Ces maladies pro-
 cedent nō d'une cause générale, qui est l'ær:
 mais de la particulière manière de viure d'vn
 chacun. Ces choses ainsi sommairement escri-
 tes nous feront entendre que le mot de Peste
 n'est pas vn nom particulier d'une seule mala-
 die, mais de toutes celles lesquelles en vn mes-
 me temps & en quelques lieux s'attachēt ex-
 traordinairement & également à plusieurs,
 avecque vn venin, vne contagion & vn dan-
 ger present. La première cause de ces mala-
 dies pestilentes procede ordinairement de la
 pourriture tant des esprits que des humeurs,
 laquelle quelque fois s'engendre en nostre
 corps & quelque fois vient de l'ær infecté, le-
 quel entrant dedans les corps infecte quāt &
 quant les esprits, tant animaux que vitaux: &
 selō l'habilité ou aptitude des corps esmeut
 diuers accidents: comme fièvres, phrenesies,
 vomissemēts, caxangues, cōuulsions ou reti-
 remēts de nerfs, defaillances de cœur, & vne
 infinité d'autres accidēs escripts par Ruffin.

*Cause des
pestes.*

par Aësse & confirmees par les modernes. Je vous demande maintenant quelle maniere de peste c'est que vostre Antimoine guerist; & si disant que l'Antimoine guerist la peste, vous avez entendu de toutes, ou de quelque parti-

Accidens culiere. Toutesfois ie pense bien que vous
de la plus voulez entendre de ceste maniere de pe-
commune ste, laquelle est la plus commune en nostre
peste en no France, & de laquelle les accidents sont tels,
stre Fran- sçauoir est, douleur de teste, endormissemēt,
ce. vomissement, defaillance de cœur, charbon,
 apostume derriere les oreilles; dessous l'es-
 selle, ou en l'aine, laquelle est vulgairement
 nommee peste. Voyons donc maintenant si
 en ceste sorte de peste vostre Antimoine est
 si excellent que vous diètes, & s'il fait mira-
 cle. Ie vous fais donques cest argument: Si
 l'Antimoine guerist ou aide à guerir ceste pe-
 ste, il le faict ou pour autant qu'il combat &
 chasse hors la cause du mal; ou pour autant
 qu'il diminue & addoucist les accidents, ou
 bien pour autant qu'il fortifie les parties no-
 bles contre la malineté du venin: Mais l'An-
 timoine ne peult combattre & chasser hors la
 cause du mal, il ne peut diminuer ou addou-
 cir les accidēts, ny fortifier les parties nobles
 contre la malineté du venin: l'Antimoine
 dōcques ne peut guerir ny aider a guerir ce-
 ste peste. La maieur proposition de ce miē ar-
 gument est telle quelle ne peut estre niee:
 tellement qu'en prouuant la mineur j'auray

ce que ie demande . Le premier poinct que l'ay a prouuer est que l'Antimoine ne combat point & ne chasse la cause du mal. La cause de la peste est vn venin contagieux, la maligneté duquel doit estre dōptee par les choses qui ont puissance de ce faire, comme sont les Alexipharmques , c'est à dire les contre-poisons, ce que l'Antimoine ne peult faire en ceste qualité, d'autant qu'il n'a pas la nature de contrepoison , ny en sa substance & essence, ny en ses qualitez premieres, ou secondes . Les contrepoisons qui de leur naturelle vertu ou essence ont la vertu de combattre les venins doyuent auoir la nature moyenne entre le corps & le venin, & tellemēt proportionnee que iustemēt ils soyent au milieu des deux : ce qui s'entend non seulement de ceux qui combattent & domptent les venins : mais aussi de ceux qui purgent, lesquels pour le moins doyuent auoir nature moyenne entre le venin & les choses qui aident au corps, comme escrit Galen au cinquieme des simples. Montrez moy, ie vous prie, que vostre Antimoine ait ceste vertu moyenne entre le venin & les choses qui aident le corps . Il tiēt bien du venin, mais il ne se peut aucunement trouuer qu'il tiēne de ce qui aide la nature du corps , vrayement compris sous la nature animale & viuante: nous l'auōs monstré es chapitres precedents & se peut encores probablement manifester en ce que nul ani-

Par quel moyen on doit dompter la cause de la peste.

mant n'est nourry ny engendré d'aucuns des
 metaux, tant parfaits qu'imparfaicts : qui est
 vn grand argument du total esloingnement
 de l'une & de l'autre nature. Or encores q̃ la
 seicheresse soit cōtraire à l'humidité ioincte
 ordinaiemēt aux causes pestilentes, si est ce
 qu'il vient plus grand inconuenient de ceste
 naturelle contrarieté que de profit du dessai-
 chement que peut faire vostre Antimoine:
 ioinct que ceste cause pestilente n'est nō seu-
 lement humide : mais aussi chaude, laquelle
 peult estre augmentee par la chaleur de l'An-
 timoine: car nous auons monsté qu'il est nō
 seulement sec, mais aussi chaud. Les contre-
 poisons, qui par leurs qualitez combattent les
 venins ne les doyuent combattre d'une & les
 aider de l'autre: tellemēt qu'ils doyuent estre
 secs & froids: ou pour le moins s'ils sont
 chauds, ceste chaleur doibt estre temperee, &
 ainsi proportionnee à la chaleur humaine.
 Ces raisons sont suffisantes pour prouuer le
 troisieme membre de ma proposition, asça-
 uoir que l'Antimoine ne peut fortifier les par-
 ties nobles contre l'impetuosité du venin: car
 ce qui est cōtraire à la nature cherche tousiours
 la destructiō d'icelle & de tout ce qui luy ap-
 partient: tant s'en faut qu'il la defende. Nous
 auons les accidents, le principal & le plus cō-
 mū desquels est le vomissemēt, & les espoin-
 connemens de l'estomach, lesquels sont aug-
 mentez par l'Antimoine: car il faict vomir &

est ennemy de l'estomach, comme nous auõs monsté. Et quand a ce que vous dictes que le vomissement est propre contre les venins pour les faire sortir, vous monstrez que vous estes encore bien ieune en la cognoissance de ceste tât necessaire partie de la medecine: Car quand les anciens & les modernes ont ordonné le vomir contre les poisons, ils l'õt faict ayant esgard a ceux qui sont pris par la bouche & lesquels sont descendus dedans l'estomach: d'autant que pendant qu'ils sont encores en ceste partie, le plus souverain remede qui y soit, cest de le faire resortir: mais ce n'est pas tout vn en ceste peste, en laquelle le venin est espandu dedans les côduits du corps, au centre d'iceluy & es parties nobles: auquel cas iamais bon medecin n'ordonnera le vomir. Parquoy la comparaison que vous faictes en vostre derniere page ne vaut rien, & ainsi vous descouurez vostre ignorance. Quand ils ont pensé que le poison fut dedans l'estomach, ils ont fait vomir: s'ils ont eu opinion qu'il fut desuallé dedans les boyaux, ils ont ordonné des Clysteres. Et si par coniectures ils ont apperceu qu'il fut espandu & entré au centre, ils ont vsé de medicaments, lesquels ont la vertu de chasser à la circonference du corps, à fin de le faire sortir. Ainsi voyez vous dedans les Cõtrepoisons de Nicandre comment il ordõne le baing, asçauoir lors que le poison est entré en la manie-

*Faute de
Lannay.*

re que i'ay dicté . Or n'y a-il point de doute que le venin de la peste ne soit entré au profond du corps : voire aux principales parties d'iceluy : ce qui est facile de coniecturer par les apostumes qui apparoissent tantost aux aisselles , tantost derriere les oreilles & tantost aux aines:selon que le cœur, le cerueau, ou le foye est infecté . Je laisse à penser à tout homme qui n'aura que le sens naturel pour conduicte en cecy , si en ce mouuement de nature qui se fait des parties interieures à celles de dehors,il est bon de bailler vostre Antimoine , lequel en purgeant violement, comme il fait , tire la matiere venimeuse au dedans, cependant que la nature la pousse es parties exterieures & moins nobles,mesmes destinees pour receuoir les immondices de ces trois principaux membres du corps.Mais a celle fin qu'il ne vous semble que ce q'ie dy soit chose nouuelle,ie vous trāscriray ce que escrit Mathieu Curtius, en son traicté de la fieure pestilente:Il se faut garder,dit-il, de venir incontinent aux medicaments purgeants: car la matiere indigeste , encores qu'elle soit venimeuse , ne doit estre purgee , si ce n'est qu'elle fust furieuse , attendu qu'Hippocrate & Galen n'en ont point parlé.Premierement comme ainsi soit que tout medicament purgeant & violent participe d'une nature venimeuse,il augmente quant & quant la malice de la maladie . Dauantage les humeurs

*Purgatio
dāgereuse
au com-
mencemēt
de la peste*

n'estans preparez ny delayez , & les cōduits, n'estans ouuerts , il est vray semblable que rien n'en sera tiré : ou bien ce sera avec vne grande debilitation des forces : Ioinct qu'il sortira du bon & du mauuais. Et oultre comme ainsi soit que la principale cause vienne communement de l'ær, par lequel nous sommes blesez & offensez, il appert que lon n'oste pas la cause : ce qui est manifeste par la mesme experience : car Hippocrate a dit au troisieme des Epidimies, que plusieurs en estoient offensez & mouroyent subitemēt, tellement que si nous doutons que le malade meure, il vault mieux le laisser mourir par la force & malice du mal , que deshonnorer le medecin & la medecine , & haster la mort du malade avec le medicament. Toutesfois nous pourrons vser d'vn medicament faict d'Aloé, de mirrhe & de Saffran : ou bien au lieu de Saffran mettre de l'Amoniach, comme escrit Paul Aeginete. Car ce medicament n'est pas venimeux & ne tourmente pas beaucoup , attēdu qu'il ne passe pas au dessus des parties circonuoisines du foye . Voyla ce qu'il escript. Regardez maintenant s'il faict difficulté de purger és simples fieures pestilētes, ausquelles il n'apparoist point encore de apostume, comment vous vous en escrimez en celles, ausquelles ordinairement elles apparoissent. Regardez si vous obseruez le precepte d'Hippocrate, lequel escript qu'il faut

tirer la part ou la nature se deschargē. Escoutez derechef ce que Iean Cornard escrit en son liure de la peste, lors qu'il vient à parler de la purge: Certainement, dit-il, il faut vsfer en cecy d'un grand soing & diligente obseruation, de peur que les forces estās abbatues du iour de deuant par la force de la maladie, par la saignée & par les sueurs: le ioursuyuant la vie ne soit purgée avecques les humeurs. Parquoy ceux là sont beaucoup plus seurement, lesquels s'aident de clysteres. Il dit encore vn peu apres: Car soit que vous vouliez purger le second ou troisieme iour, il faut que vous ayez grand esgard aux apostumes, de peur qu'empeschant le mouuement de nature, laquelle par sa force iette hors les humeurs que vous essayez faire sortir par le ventre, vous ne les retiriez au contraire par le dedans. Au reste en toute la doctrine d'Hippocrate & Galen vous ne trouuerez point que la purgation ait esté commandee au commencement de la peste. Regardez les hyistoires tāt du premier que du troisieme liure des Epidimies, vous ne trouuerez point qu'Hippocrate ait purgé aucun de ces malades, encores qu'il se soit souuenu en quelques vns, & de clysteres & de saignées, & encores qu'il se soit montré tellement diligent à racompter les hyistoires des malades, lesquels il a ramassez en ces liures, qu'il nous peut seruir comme d'un patron, selon lequel tout bon

medecin se doit en tout & par tout façonner. Je ne veux reprouuer la purge en ces maladies, mais aussi ne la veux ie approuuer : Car tout ainsi que celle est vtile, laquelle se faict par clysteres & qui ne passe point les premières veines : aussi celle qui est vehemente est tresdangereuse. Je sçay bien qu'il faict bon quelque fois purger au commencement des maladies aiguës & soudaines, principalement quand la cause est furieuse, & cōme en rut: mais il faut regarder que la qualité du venin ne soit contraire en ceste maladie. L'Aphorisme qu'en a escrit Hippocrate s'entend principalement des maladies reiglees & ordinaires & non des extraordinaires, comme sont les pestilentes. On peut amener quelques raisons & autoritez prises des medecins Arabes, lesquelz semblent faire au contraire : mais ie ne m'arresteray a y respondre, d'autāt qu'elles ont esté expliquees & refutees par Ierosme Cardan en son second liure des Contradictions.

Ces choses ainsi le plus briuevement discourues qu'il ma esté possible, monstrent assez que ce n'est pas a vous a escrire, qui ne sçavez que c'est de parler: que ce n'est pas a vous a disputer, qui ne sçavez que c'est que d'argumenter : que ce n'est pas a vous a parler de la medecine, qui ne sçavez q̄ c'est q̄ de la nature & qui mesmes n'entendez les mots de l'art: lesquelz sont toutesfois necesseraires : Bref,

que ce n'est pas à vous à tenir le lieu que vous occupez : mais qu'il vous seroit beaucoup plus seant d'aller prescher les vertus & merueilles de vostre drogue au simple populaire, à la maniere des Charlatans & basteleurs, lesquels estans mōtez sur vne pierre en vn coin de carrefour, seduissent par leurs impostures les moins aduisez. Ou bien si vostre aage ne vous peult permettre de laisser le coing des tizons, Il vaudra beaucoup mieux que le reste de vostre vie, vous vous exerciez à guerir de la tigne, à la façon de ces vieilles courtisannes Romaines, lesquelles estans suranees se meslent de guerir les maladies, que les plus doctes medecins ont habandonnees. Car au demourant vous ressemblez ce Margyte, lequel à peine pouuoit conter iusques à cinq, & lequel cōme Aristote allegue es vers d'Homere, les dieux n'ont voulu estre mesme fosfoyeur, ny excellēt, ny gentil en quelque chose que ce fut.

Il appert aussi par toutes les raisons deuaites cy deuant, que ce n'a point esté sans cause que les medecins de Paris assemblez tous en vn, apres auoir esté aduertis long temps deuāt, de declairer ce qu'ils pēsoyent de ceste vostre drogue : ont d'vn commun consentement arresté ce qui ensuit, & ce que j'ay expliqué en François de mot à mot à celle fin que vous cognoissiez, que vous auez mal escript en l'epistre addressée à Monsieur du

Mesnil, quand vous dites qu'il est survenu debat entre les medecins touchant l'Antimoine: Car les medecins sont d'accord de sa malice, & n'y a que les Empiriques qui y contredisent.

En l'assemblee de tout le Collegē de la Faculté de medecine appelee pour donner iugement de l'Antimoine, il a esté aduisé par l'autorité de tous ceux qui ont esté excellens en l'art de medecine, confirmee par raisons, deduites souuentesfois, & derechef encores depuis peu de temps en la presence de l'Aduocat du Roy: que l'Antimoine est un poison, lequel doit estre mis au rang des Simples, qui ont une qualité venimeuse, & lequel ne peut estre tellemēt corrigé par aucune correction, que sans danger tresgrand on le puisse prendre dedans le corps. Donné aux escholles de Medecine le vingtneuſieme iour de Iuillet M. D. LXVI.

Or voyez,maistre sot & temeraire, si ie n'ay pas eu plus d'occasion de croire ceste compagnie, & de penser que l'Antimoine est poison, que non d'acquiescer à ce que vous enauez escrit. Si vous dites que toute ceste compagnie, qui est pour le moins de soixante, ait fait ce quelle a fait pour complaire aux Apoticairez, ie diray que vous estes vn menteur trop manifeste, & que tout ainsi cōme pour le moins il y en a d'aussi gēs de biē q̄ vous, aussi y en a il de plus sçauās. Et que ce qu'ils en ont fait n'a point esté pour l'enuie qu'ils portassēt ny à vo^r, ny à vos semblables, mais pour l'amour de la verité & du deuoir qu'ils doiuent à leur patrie, & à leurs Citoyens.

Et à celle fin que vous ne pensiez qu'ilz soyēt seuls de ceste opinion: ie vous transcriray icy ce qu'a escript Iean Vvier, medecin du duc de Cleues, homme docte & bien experimenté, au liurē qu'il a faiēt de l'Imposture des diables, des enchantemens & sorcelleries (lequel i'ay traduit ces iours passez) touchāt la suffisance de Paracelse grand Alchemiste, lequel a mis en auant l'Antimoine: Encore, dict-il, qu'ilz soient plustost dignes d'estre nommez forciers, comme aussi ces hom-


*Quel a esté mes nouveaux, lesquelz sont sortis depuis
à Paracelse quelque tēps de l'escholle d'un certain Theo-
et quels phrasle Paracelse, homme certainement me-
sont les Pa disant au possible, lesquelz se glorifians an o-
racelsistes. gammēt par la fumee d'un feu chymique, cō-*

me estans, esclaves d'arrogance, de presumption & de vaine gloire, peuuent tout & n'ont rien impossible a force de crier & parler hault, de promettre & de prononcer des gros mots, qui remplissent la bouche: en quoy certes, ils sont vrais imitateurs de leur maistre. Ilz ont premierement appris & retiré du liure qu'il a entitré Paragrammon, des mots salles & deshonestes, lesquels ne procedent point d'homme qui fust de iugement sain: & par lesquels ils s'efforcent diligemment de mesdire, de calomnier, de reietter, & pieteler l'ancienne & sacrosaincte art de Medecine, apres qu'ils ont controuué des nouveaux principes, & nouvelles paroles, lesquelles eux-mesils n'entendent & ne peuuent defendre par raison: ains se contentent de l'amas des mots inutiles, desquels Paracelse a rempli ses escrits. Ce rustre se vante d'estre monarque de Medecine, & inuenteur de la vraie science, & pour tel l'estiment, l'honnorent, & le reuerent ses sectateurs. Il faut donques que iusques à ce iour, ceste art tant vtile entre les autres, & principalement necessaire (si rien il y a de necessaire) pour la conseruation du genre humain, ait esté tousiours cachee. Rien ne seruira donques icy qu'Adam ait cognu dès le commencement les facultez & vertus de toutes les choses que Dieu auoit crees: rien ne seruira que Ioseph ait commadé que le corps de son pere fust embosmé par les Medecins:

rien ne seruirōt les loys que Moyse a publicees pour les Medecins:rien ne seruira la louange de Iesus Syrach, par laquelle il a voulu que les Medecins crees du Tres-haut pour la necessité,fussent honnorez, comme il leur appartient. Ce sera d'auantage vne chose inepte, que Iesus Christ ait fait vne similitude de ce qui n'estoit point, mōtrant q̄ ceux qui se portent biē n'ont besoin de Medecin,mais les malades. Le liure de verité tesmoigne que saint Paul a appelé, & s'est recommandé à saint Luc, Medecin son bien aimé. Tous ceux cy certainement ont eu en reuerence l'ancienne Medecine,appuyee en raisonnemens,& confirmee par vsage, & raison telle que nous l'exerçons. No⁹ ne trouuōs qu'il y soit escrit, qu'il doit venir aux derniers iours vn Theophraste, Paracelse monarque, & inuenteur de la Medecine. Ie ne veux toutesfois mesdire de la Chymie qui n'est pas petite partie de Medecine,laquelle ie prise beaucoup, comme aussi font les anciens avec moy: & me resiouis fort du bien adueni à nostre art, en ce qu'elle est maintenant plus estimee: toutesfois ie n'ay encore sceu mettre en mon entendement que par le moyen d'icelle on puisse tirer des poudres, & des sels propres à guerir toutes maladies, soit de souphre, de vitreol d'Antimoine, ou des autres mineraux de mesme espee: & des metalliques mesmes: & encore moins ay-ie peu croire que les herbes

qui sont connues dissemblables à la veüe, au
 ter, au goust, & au toucher, desquelles iusques
 à maintenât nous nous sommes aidez si heu-
 reusement contre les maladies, par le tesmoi-
 gnage de l'experience, n'ayent esté du com-
 mencement douees d'aussi excellentes vertus
 que les mineraux, & metalliques. Voyla com-
 ment vostre Maistre, vous & vos semblables
 estes descripts & comment vostre marchan-
 dise est esuentee & mise au rang des impostu-
 res par ce tât excellēt personnage Ieā Vvier,
 lequel en ces derniers temps s'est employé à
 descouurir les faucetez, lesquelles ont esté
 long temps meslees parmy les diuins prece-
 ptes de l'ancienne Medecine.

*Chapitre sixieme, auquel il est monstré que les
 formes specifiques ne procedēt point de l'influen-
 ce des Astres.*

 E cinquieme poinct que vous auez
 proposé à disputer en vostre liure,
 estoit que Galen & tous autres me-
 decins & philosophes anciens, onr recognu
 vne forme specifique en tous simples, outre
 l'action des quatre premieres qualitez &
 leurs despendents. Voila vostre proposition
 escrete en vostre page marquee 4. Je ne sçay
 pas pour quelle raison vous auez entrepris
 de disputer ce poinct contre moy, veu que ie
 n'ay point nyé ceste vertu: mesmes au con-

traire i'ay dit au commencement de mon Discours fueillet 8. que les Anciens & Modernes ont recogneu en chascune chose naturelle deux vertus : L'une desquelles ils nomment apparoissante ou euidente, & l'autre cachee. Ceste vertu cachee est celle qui procede de la forme specifique, laquelle ie recognoy en toutes choses naturelles estre la cause de toutes les actions. Il est bien vray que ie n'ay iamais pensé qu'elle procedast de l'influence des Astres, ains seulement de la propre essence de toutes choses, laquelle leur a esté donnee des le premier iour qu'elles ont esté au monde, & laquelle consiste en ceste raison & ordre conuenable, lequel, comme dit Aristote, est recogneu en toutes choses naturelles. Or encores que ceste dispute ait esté agitée diuersément par plusieurs doctes philosophes & medecins, ie ne laisseray touresfois de vous en dire libremét ce que i'en pense, selon les raisons que i'ay apprises tant de la lecture des liures des Anciens & Modernes, comme de la conference que i'en ay faite avecques gens doctes & bien versez en la philosophie: ce que ie feray à celle fin que vous cognoissiez en bref, combien vous estes loing de vostre conte, qui n'entendistes iamais que c'est que forme specifique. Et à celle fin aussi que ie vous contente, s'il est possible, touchant les causes superieures, tant du Soleil, que des autres Astres, lesquelles ie recognoy comme

aidantes & non pas cōme vrayes efficients. Car si elles estoient telles, elles pourroient procreer des corps en ceste terre sans les autres causes & moyens accoustumez:ain si cōme les autres causes efficiētes ne laissent pas de procreer sans icelles. Tellement que quād Aristote a dict que l'Homme & le Soleil procrēoyent l'homme, il a entendu le soleil comme cause aydante, & l'Homme comme cause efficiente & veritablement agissante. Je vous confesse donques que nous iouissions tous de la puissance des astres superieurs, comme a escript Galen, mais ie vous nye que nous subsistions par icelles. Car vous avez mis ce mot de vous mesmes & n'est point en Galen, comme vous dictes, & comme furtiement vous l'avez adiousté. Aussi est-il vn peu de trop grande consequence, & iamais Galen ne le pensa, comme nous monstrerons cy apres. Bref ie recognois en toute chose vne vertu propre & particuliere, laquelle ne réusfit point de la meslange des elemens, mais de la forme. La forme est vn principe ou commencement du corps naturel, laquelle luy donne son estre. C'est forme est la seule cause, de laquelle despendent toutes les proprietiez du corps, auquel elle est. Ceste forme est vne substance & non pas similitude de substance, cōme vous dictes en vostre page marquee 113. *Faute de la ou vous escriuez : l'entend par ceste similitu-* *Launay.*
de de substance (comme i'ay desia dict) vne forme

*Passage de
Galen falsifié par
Launay.*

*Que c'est
que forme*

specifique & substance spirituelle cachee dedans le corps. Et comme derechef vous dictes en la page suyuant en ces mots: Mais il y a vne autre substâce plus excellente & plus parfaite qui procede du ciel, qui est proprement appellee proprieté de toute la substance: ou comme disent les Grecs dynamis, c'est a dire puissance. Vous estes vn grand Philosophe: ou auez vous leu que la substance soit vne similitude, ou proprieté, ou puissance? similitude, proprieté & puissance sont accidens, ou tout au plus instrumens par le moyen desquels la substance execute toutes ses naturelles operations: Car ceste proprieté de substâce est l'instrumēt sans moyen, sans lequel la forme ne fait rien: & toutesfois elle n'est point substance. Qu'il ne soit ainsi, la puissance des medicamens, par laquelle ils tirent les humeurs, se diminue quelque fois & se pert: ce qui est contre la nature des substances. Apprenez donques a parler proprement & ne vous abusez en la diuersité des mots, desquelz Galen a vsé pour signifier ceste proprieté de substance, l'action de laquelle il dit maintenant proceder de toute la substance, maintenant de la qualité des substances, maintenant de la similitude de essences, & maintenāt de la familiarité ou similitude des qualitez. La question est maintenāt asçauoir si ceste forme descend par l'influence des Astres, ou du hault du ciel, lors que les corps naturels sont engendrez, ou bien si elle est par
 my la

my la matiere d'iceux. Je ſçay bien qu'il y a des raifons tant d'une part que d'autre. Toutesfois il y a vn paſſage en Hippocrate, lequel m'a fait penſer que les formes des corps naturels ſont en la matiere, nō cōme procedētes d'icelle, mais cōme celles qui la maintiennent & entretiēēt: Car il eſcrit au liure de la Diete, parlant du feu & de l'eau, par leſquels il entend ce dont ſont compoſez les corps: Ces deux, dit-il, ſont ſuffiſans enſemble, tant à toute autre choſe, comme à ce qui leur eſt neceſſaire l'un à l'autre: mais l'un & l'autre ſeparé n'eſt ny ſuffiſant à ſoy-meſme, ny a nul autre. Hippocrate parle en ceſt endroit de la procreation des corps, dont ie tire ceſte concluſion: ſi ces deux ſont ſuffiſans enſemble à tout ce qui leur eſt neceſſaire, il n'eſt point meſtier qu'il leur aduienne rien d'ailleurs: & par cōſequent ils ont leur forme en eux. Auſſi la chaleur animale, comme celle du Soleil, a en ſoy vn principe de vie, comme dit Ariſtote. Vous meſmes vous alleguez en voſtre page marquee 116. qu'Hippocrate a dit que nous auons en nous vn eſprit qu'il appelle aucunesfois chaleur naturelle, lequel eſt meſlé avecques la ſemence & qui conforme l'homme & le nourriſt tant qu'il eſt dedans l'amarry de la femme, puis eſtant dehors il le cōduit & l'entretient iuſques à la mort. Ie vous demande qui eſt ceſt eſprit ou chaleur naturelle, ſinon la vertu procedante de ceſte

Que les formes des corps ſont en la matiere.

forme ? s'il est en nous & qu'il nous conforme, qu'a il affaire de venir d'ailleurs.

Or si en la semence de l'homme ou en la graine de la Rheubarbe il venoit vne forme d'ailleurs, il faudroit necessairement qu'il y eust corruption, lors q̃ la premiere forme de semēce feroit place à celle qui suruiendrait: Car toute generation a nouuelle forme ne se peult faire sans corruption de la premiere (nous parlons icy des formes qu'aucuns Philosophes nomment vniuouques, & non pas de celles qui sont imposees es matieres, qu'ils nomment æquiuouques) mais il est vray qu'en ceste generatiō il n'y a point de corruption: dont il s'ensuit qu'il ny a nulle forme qui suruiēne d'ailleurs. Si vous ne me voulez croire, lisez ce qu'en a escrit Iules Cæsar Scaliger, excellent philosophe & medecin. Les formes vniuouques, dit-il, sont cōtenues en la matiere, comme en la semence d'un chien la forme du chien: Car le chien n'est point faict de la semence du chien par corruption, comme la Grenouille se fait du lymō pourry, ains par la perfection de ceste semēce. Il dit encores vn peu apres: On dit que ceste semence est corrompue, d'autāt qu'elle desiste d'estre semence: mais les sages disent que veritablement c'est vne perfection: car rien ne perist: voicy certainement la nature de la semence: elle est animant en puissance, comme lon dit, prochaine. Je sçay bien que ces formes essential-

les interieures sont entretenues, voire excitées & comme æguillonées par ceste vertu diuine & celeste, laquelle est espondue par toutes les parties du monde & laquelle a la puissance de faire toutes choses, selõ la disposition des matieres: mais ce n'est pas à dire toutesfois que la forme des corps que nous nommons parfaits, procede de l'influence des Astres, qui est toutesfois le neud de ceste matiere.

Vous alleguez, au commencement de ceste *Passage de* mesme page, vn passage d'Aristote, lequel *Aristote* estât falsifié, cõme vo^s l'avez falsifié, fait au- *falsifié par* cunemēt pour vous: mais estant en son natu- *Launay.* rel confirmera mon dire. Vous escriuez doncques: *Quand Aristote a dit que dedans la semence de l'homme il y auoit vn esprit celeste proportioné à l'element des Astres: a-il estendu ses simbries iusques au bout du monde?* Le passage d'Aristote que vous pensez alleguer est escrit au second liure de la generation des animaux, chapitre troisieme. Il y a, dit-il, en la semence de tous, qui est cause que les semences sont fecondes, asçauoir ce qui est nommé chaleur, & cela n'est point feu, ny autre telle faculté: mais vn esprit, lequel est contenu & enclos dedans la semence & dedans ce corps escumeux. Et la nature laquelle est en cest esprit respond en proportion à l'element des estoilles. Voyez, ie vous prie, comment vous l'avez falsifié, appellant cest esprit celeste: Ce qui n'est pas

Explicatio au texte. Je dy donques au contraire que
tiō du pas ce passage fait du tout contre vous. Car fai-
sage d'Ar la semence féconde n'est autre chose que
ristote. donner l'essence au corps, duquel elle est
 semence. Si donques elle a en soy ce qui la
 rend féconde, il faulr qu'elle ait quand &
 quand ce qui donne l'essence a ce dont elle
 est semence, a sçauoir au corps. Or est-il ain-
 si que ce qui donne essence, c'est a dire ce
 qui donne l'estre, est la forme: Par conse-
 quent donques la semence contient en soy
 la forme du corps, duquel elle est semence.
 Dauantage, respondre en proportion à l'e-
 lement des estoilles, & proceder de l'in-
 fluence d'icelles sont deux choses differen-
 tes: Car le premier signifie auoir quelque
 similitude à cest element des estoilles: &
 l'autre signifie en descendre & en prendre
 l'estre. Si Aristote eust pensé que les formes
 fussent descendues du Ciel par l'influence
 des Astrez, il n'eust pas dit que ceste natu-
 re qui est en l'esprit, eust eu proportion à
 l'element des estoilles: mais il eust dit que
 elle en fust descendue, car en toutes propor-
 tions & similitudes des choses a autres il y a
 quelque dissimilitude. Par ceste proportion
 donques nous deuōs entēdre que tout ainsi
 que l'element des estoilles, qu'Aristote nōme
 le cinquieme, est excellēt, admirable & diuin
 entre tous, & gouuerne & maintient les quar-
 tre inferieurs: Ainsi ceste nature est excellēte

en la cōposition des corps, & gouuerne & regist le demeurant de toute la masse corporelle. D'auantage, nous auons appris par la science naturelle que la forme & la matiere ne peuuent iamais estre l'un sans l'autre : & encores que nous les separations en pensee, pour en auoir l'intelligence plus parfaicte : si est ce qu'il n'y eust iamais actuellement forme sans matiere, ny matiere sans forme. Je vous demande donques en quelle matiere est ceste forme specifique lors qu'elle descend du ciel : & qu'elle est la forme de la matiere du corps auant que ceste forme y soit descendue. Item, veu que l'action des corps superieurs se faiēt icy bas par le moyen du mouuement & de la lumiere : & comme ainsi soit que le mouuement & la lumiere des Astres se cōmuniqēt generallemēt a tous corps & non particulièrement a l'un plus qu'a l'autre, ce seroit vne chose absurde de dire qu'a chasque procreation de corps il se face vn particulier mouuement & influence, & vne particuliere lumiere. I'adiouste encores d'auantage que le mouuement & la lumiere sont accidens, lesquels ne portent point de substance & sont propres instrumens du ciel, & non autre chose : tellement qu'ilz ne peuuent estre substance ny parties des substances. Je ne veux pas dire *Que les* toutesfois que ceste forme ou nature ne soit *formes* diuine, comme estant par dessus les elemens, *sont di-* & comme procedant de la diuinité : mais ie *uines.*

nie qu'a chasque procreation de corps, ceste forme descende de l'influence des astres. Et au contraire ie soustiens avecque Scaliger, qu'elle est tellement en la semence des animaux, ou en la graine des vigetaux, que la semence & la graine n'est aucunement dissemblable dauecque le corps, duquel elle est graine: sinon en tant que les parties ne sont encores distinguees: Bref ie dis que le corps n'est autre chose que la semence en sa perfection, ou distinguee en parties, selon sa nature particuliere. Ainsi toute semence feconde est aussi animee, comme escript Platon. Ie n'entends point icy parler de nostre ame raisonnable, laquelle est toute diuine: & les actions de laquelle sont du tout hors du corps: car ie sçay bien qu'elle vient du ciel, nō pas de l'influence des astres, ains de la main de Dieu. Mais ie parle de la forme, laquelle est vne substance, qui faict les actions de chasque corps naturel, & dis que ceste propriete est cōmuniquee & donnee de corps en corps. Ce que mesmes nous voyons euidentement en Moyse, par ce que Dieu donna la vertu a toute chose d'engendrer son semblable: non seulement, cōme i'ay dict en mon Discours, en apparence exterieure, c'est a dire en figure & delineamēt de corps: mais aussi en vertu interieure & faculte naturelle, c'est a dire en proprietes speciales, que vulgairement nous appellons cachees, par lesquelles les medicamens sont

leurs actions. l'explique ce passage de mon Discours tout expres, pour autant que vous l'avez depraué & mal entendu, comme vous le monstrez en vostre response.

Si donques la premiere plante de Rheubarbe a eu ceste benediction de Dieu d'engendrer son semblable, c'est a dire d'engédrrer vne autre Rheubarbe, qui seroit de mesme vertu: quelle necessité y a il que ceste vertu descende derechef de l'influence des astres, toutesfois & quantes que les Rheubarbes se font? Vous confessez vous mesmes en vostre page marquee 114. que par la benediction de Dieu nous entendons qu'il les aorna & doua de toutes leurs facultez qu'ilz ont & auront a iamais. S'il est ainsi, cōme certes il est, pourquoy voulez vous que ceste faculté redescende de rechef de l'influence des astres? voulez vous y remettre derechef ce qu'elles ont? Ainsi donques vous voyez que ie confesse bien les formes des choses estre diuines, tant a raison qu'elles descendent de ceste premiere benediction diuine, qu'a raison aussi que leurs actions sont telles: mais ie nie toutesfois que lors qu'un corps naturel est engendré, q̄ la forme descende de l'influence des astres. Voyla en quoy gist nostre different. Quant a *Ignorance* ce que vous dictes que les causes effectrices *de Lau-* & les forces des facultez & operation des *may.* corps naturels, sont le premier mobile & le Zodiaque, avecqueles corps celestes: vous

mōstrez que vous estes vn grand astrologue, qui separez les corps celestes d'auecques le Zodiaque, comme si le Zodiaque estoit autre chose qu'une entresuite & disposition d'aucuns corps celestes. Ceste entresuite & disposition ne peult estre cause efficiente. Car cest vne chose accidētaire. Il ne failloit doncques point bailler le Zodiaque pour coadiuteur aux corps celestes, & suffisoit de dire les corps celestes: Ainsi vous eussiez entendu tāt ceulx qui sont au Zodiaque, que ceux qui en sont hors. Toutesfois vous en parlez comme vous l'entendez, ou bien comme vostre nouveau maistre vous le donne a entendre depuis que vous auez commencē a apprendre les cercles celestes, lesquelz a ce que ie puis voir vous imaginez telz qu'ilz vous apparoissent en vostre Sphere. Toutesfois il est bon auoir qu'il n'y a pas long temps que vous cōmencez a y estudier: Ce qui me faict penser que vous y serez en la fin aussi grand clerc comme vous estes en philosophie & medecine.

*Faultes
proprietē
occultes.*

Or si vous voulez sçauoir maintenant quelles proprietē occultes ie nomme Chymeres ou Bayes, ie le vous diray. Ce sont celles que les hommes se sont phantastiquees a leur appetit, les vns par gloire, pour dōner a entendre qu'ilz sçauoyent plusieurs choses cachees & occultes; les autres par malice & imposture, pour acquerir des biens, ou par ce moyen se faire renommer. Ce sont celles lesquelles

veritablement sont occultes en ce que peu souuent : ie ne sçay si ie doibz trancher le mot & dire que iamais elles n'executent ce qu'elles promettent, Ce sont celles, les vertus desquelles sont perdues il y a long temps, si ce que quelques vns en ont escrit a esté veritable du temps qu'ilz en escriuoiēt. Ce sont celles desquelles, cōme escript Galen, le medecin qui desire estre excellent ne doit vser que bien peu souuent. Bref ce sont celles, par lesquelles les imposteurs proprietaires se defendent opiniastrément cōtre toutes raisons, comme iadis Ajax se defendoit avec son bouclier a sept rebras. La pluspart de telles Bayes ont esté descouuertes par Lucian en son dialogue entilré Philopseudes, quand il parle de la dent d'une Blette, de la peau du Lyon, & de la peau d'une Biche pour guerir la goutte. Telles Bayes sont escriptes en vostre response, quand vous dictes que les medicaments qui augmentent la semence, ou bien qui prouoquent la vertu qui engendre, ont quelque influēce de la planette Venus: Et que les herbes qui fortifient le foye & la vertu nourrisserie, ont leur influence de Iupiter. Ce que toutesfois ne fut iamais remarqué ny par Theophraste, ny par Dioscoride, encores qu'ilz ayent recherché diligemment la nature des herbes. Mais vous qui auez l'esprit philosophique, qui estes mesmes la philosophie, et qui paraenture estes monté ius-

ques a la region des astres , estant porté sur l'Hippogriphe de vostre diuin sçauoir : vous auez communiqué de ces formes spécifiques & influences , en la composition desquelles to^r ces corps lumineux sont empeschez pour satisfaire a tant & tant de corps qui s'engendrent iournellement. Pauures & miserables astres qui estes subiect d'enuoyer vostre influence toutes & quantes fois qu'il plaist au laboureur de semer son bled.

*Launay
impose a
Galen.*

Pour nous faire croire ce que uous auez dict de l'influence de Venus sur les simples qui engendrent la semence, vous auez tiré le nez a Galen:disant que parmy leur substance il y a vne vertu celeste, comme il a touché (ce dictes vous) au cinquiesme liure des Simples. Ce qui est faulx & ne trouuerrez point qu'ils parle de vertu celeste, ains seulement de la similitude de toute la substance. Parquoy ie vous conseille de rabaisser vn peu de vostre Astrologie, en laquelle uous estes deuenue si sçauant depuis trois mois, que si ce n'eust esté que vous voulez estre bref , vous eussiez monst^ré de quelle planette tiennent les herbes , comme vous escriuez en vostre page marquee 122. Pensez vous qu'elles vous ressemblent^r, & qu'elles tiennent de la Lune comme vous?

Voila en bref ce qui m'a semblé estre necessaire de respondre à ce que vous auez escrit , touchant les proprieté & vertus spéci-

figues, entant que touche le point qui deuoit estre disputé contre moy. Il reste de discourir sur vostre sixieme sexion, ou sixieme partie de vostre responce, à laquelle ie satisferay le plus brieuement qu'il me sera possible.

Chapitre septieme, auquel il est monstré que la Rheubarbe dont nous vsons est celle de laquelle les anciens ont parlé, & partant qu'elle est bon médicament purgeant. Item que la Scamonee & Turbith desquels nous vsons ne sont si mauuais que l'Antimoine.

EN CORES que ce que i'ay de-
duit cy deuant soit suffisant pour
monstrer vostre bestise, si est-ce
que ie ne feray difficulté de vous
respōdre à tous les points que vous auez mis
en auant. La propositiō escrite en vostre pre-
mier liure touchāt les medicamēts purgeāts,
desquels no⁹ vsons ordinairement estoit telle.
*Puis donc, dites vous, que nous auons monstré, par
bonnes raisons, que l'Antimoine n'est point poison,
comme auez semé, Regardons, & examinons si on
ne baille point tous les iours de plus violents medi-
caments & plus abhorrens à nature, que luy. Vous
expliquez encore mieux ceste proposition
quand vous dites deux fueillets apres: seulement
i'ay voulu monstrer, que nous vsons de medicamēts*

ordinairement qui sont plus pernicious, & s'il faut parler comme vous, plus veneneux & contraires à nature, que l'Antimoine: ainsi que l'auons iamonné de la scamonee, du turbith, de la rheubarbe, &c.

Orie vous demande maintenant si ie vous ay calomnié, comme vous dictes, & comme vous vous plaignez en vostre page marquée 122. quand i'ay escrit que pour rendre vostre marchandise plus vendable, vous auiez ressemblé le Charlatan, qui desprise celle de ses compagnons? Que dictes vous autre chose, ie vous prie, sinon qu'il faut laisser toutes les autres & auoir recours a la vostre, puis qu'elle n'est ny si contraire à nature, ny si pernicieuse & venimeuse? Je vous nye donques, & l'ay monsté par cy deuant, que l'Antimoine puisse estre moins contraire à nature que nos medicaments, lesquels sont pris aux vegetaux: Car i'ay dit & le repete encores que les mineraux sont eslongnez de deux degrez de la nature animale & que les vegetaux ne le sont que d'un. Je vous renuoye donques aux chapitres precedents, touchant ce point & à ce que i'en ay escrit en mon Discours. Quant a ce que vous dictes que la plus part des drogues qui sont chez les Apoticares sont ou falsifiees, ou surannes & passees: ie n'ay pas entrepris de defendre ceux qui font mal leur deuoir & qui ont mauuaise conscience me plains d'eux aussi bien comme vous: mais ce n'est pas le point de la question: nous

parlons des bons médicaments & nom des falsifiez & chanfis ou surannez. Nos médicaments, dictes vous, sont amers, & vostre Antimoine ne l'est point. L'Antimoine donques est meilleur médicament purgeant. Je vous nie vostre consequence: car la principale bonté des bons médicaments purgeans ne gist point en la faueur, non plus que la principale malice des venins, comme ie vous ay monstré cy deuant quād i'ay parlé des venins, lesquels sont doux: & quand ie vous ay monstré que vostre proposition estoit faulse de dire que tous venins estoient abhorrants au goust. Il est bien vray que si vous voulez faire comparaison entre les médicaments qui sont de mesme espeece, que ceste proposition sera vraye, asçauoir que les moins amers sont les meilleurs: mais ie vous ay desia dit que l'Antimoine, & la Rheubarbe, & autres nos médicaments sont de diuerses espees & que par tant ceste consequence ne vaut rien. C'estoit ceste raison qu'il vous falloit impugner & nō vous arrester à ce que i'ay dict que l'amertume conforte l'estomach, corrige la poincture, empesche les ventositez & la pourriture. Pour prouuer le contraire vous dictes que la *Faulse cō-* nourriture est douce & non amere, tellemēt, *paraisō de* ce dictes vous en vostre page marquee 125. *Lannay.* que les viandes qui s'eslongnent grandement de ceste suaue douceur: offensent & greuent fort l'estomach. Apprenez derechef, maistre

Baudet, de faire vne autre fois vos comparaisons entre les choses, lesquelles sont de mesme espeece. Ie ne parle pas des viandes: ie parle des medicamēts, lesquels ne seroyēt point bons medicaments purgeans, s'ils auoyēt ceste suaue douceur qu'ont les viandes: car ils se conuertiroyent en la substance des parties du corps & n'agiroyent point contre: ce qui est toutesfois necessaire, comme escrit Galē. Pour ceste cause Mesué dit que la douceur és medicaments est flatueuse, & estoupe, qui sont deux choses cōtraires à la bōté des medicamēts purgeans. Iay donques parlé de l'amertume ainsi que Mesué en parle, c'est à dire entant qu'elle est és medicamens purgeās: & non pas en general. Car tout ainsi que ie scay bien que les viandes les plus douces & suaues sont les meilleures, aussi scay- ie bien que les medicaments les plus doux ne sont pas les meilleurs. Et quant à ce que vous dites en vostre page marquee 134. que l'amertume de la Rheubarbe avec son acrimonie, qui passent la stipticité sōt ennemis de l'estomach: ie vous responds premieremēt que vous proposez faux en ce que vo^r dictes que la Rheubarbe à vne acrimonie: & quand à l'armertume, ie vous respons ce qu'a escrit Mesué que la plus grande propriété qu'ait point la Rheubarbe c'est de nettoyer & conforter le Foye & l'estomach. Vous m'accusez en ce mesme passage d'auoir dit q̄ la stipticité de la Rheu.

barbe est d'une substance subtile. A quoy ie vous responds que vous estes vn calōniateur, & qu'il n'en est rien:alleguez mon texte, & puis on verra que vous estes vn effronté & vn impudent. La Rheubarbe est tellement stiptique que l'amertume ne luy oste point la vertu qu'elle a de nettoyer & conforter l'estomach: ce que nous pouuons dire à plus forte raison que Galen ne l'a dit de l'Aloé, lequel vous confesserez estre beaucoup plus amer que la Rheubarbe: & toutesfois il dit qu'entre tous les autres medicamēts il est agreable à l'estomach.

*Calomnie
de Launay*

La Rheubarbe.

Pour prouuer encores dauantage que toute comparaison se doit faire entre les choses qui sont de mesme espeece, l'ay dict en mon Discours que ce ne seroit pas bié argumenté de dire: La Rheubarbe est plus amere que le Sublimé qui n'a aucū goust: La Rheubarbe donques est plus dangereuse drogue que le Sublimé. Vous ne respondes rié à cest argument: mais vous me reprenez de ce que le dis que le Sublimé n'est d'aucun goust. Tellemēt qu'il est bon à veoir en tout vostre liure q̄ vous auez deliberé plus tost de trouuer quelque chose à mordre, que de respondre aux raisons. Si vous eussiez sceu que c'est que faueur vous ne m'eussiez pas repris. La faueur, disent les Philosophes, se fait lors que les parties terrestres & seiches se coulēt parmi l'humidité aqueuse, pour apres toucher

*Que le Sublimé n'est
d'aucun
goust.*

De la faueur.

les instrumentz du gouſt, ſi bien que ce qui n'a point d'humidité n'a point de ſaveur, comme eſcrit Ariſtote au 10. chapitre du 2. liure de l'Ame. Monſtrez moy maintenāt quelle humidité il y a en voſtre Sublimé, pour faire la ſaveur. Vous ſçauetz, ou deuez ſçauoir, qu'il eſt chault & tellement ſec qu'il a outrepasſé la temperature requiſe à la ſaveur. Et quāt eſt de l'actiō que le Sublimé faiēt ſur la langue: c'eſt vne bruſſure & non vne ſaveur: bruſſure dy-ie procedente de la chaleur, qui eſt vne premiere qualité, & non de la ſaveur, qui eſt vne ſeconde. Ainſi les choſes qui ſont extrêmement ſeiches, comme eſt le Sublimé, ne peuuent auoir aucune ſaveur, à raiſon du deſaut d'autant d'humidité qu'il eſt requis pour faire la ſaveur. Ainſi doncques ceux qui ont mis le Sublimé ſur la langue diſent bien qu'il bruſle & qu'il les picque, mais ils ne ſçauoyēt dire de quel gouſt il eſt: car auſſi n'en a il point: ou ſ'il en a, il eſt ſi petit que la ſubite action de la chaleur qui eſt premiere qualité, empêche q̄ l'on n'appercoiue la ſaveur, qui eſt la ſeconde. Mais paſſons outre & venons aux particuliers medicaments.

*Dont on
nous ap-
porte la
Rheubar-
be.*

Vous auez eſcrit en voſtre 1. liure que la Rheubarbe qui vient à Veniſe, & de Veniſe à Lyon eſt apportee d'Asamie, q̄ les anciēns nō- moyēt Meſopotamie & q̄ partāt ce n'eſt pas celle que Meſué dit eſtre la meilleure, laquelle doit venir des Indes. Voyons cōment vo- ſtre

estre argument est bon. Encores que la Rheubarbe que lon apporte a Venise soit apportee d'Asamie; partie d'Afsirie : ce n'est pas a dire qu'elle n'ayt esté amassée aux Indes. Car la trafique des Indes peut estre telle q̃ la Rheubarbe estant cueillie soit amassée en Asamie, pour de la estre enuoyee en toutes les parties de l'Occident. Et pour autant que ie sçay bien que vous auez iuré de ne rien croire de ce que ie dis. Je vous transcriray icy ce que André Marin en a escript suiuant l'extrait qu'il en a fait és annotations de Iean Baptiste Rhamnuse, secretaire du conseil de Venise. Apres qu'il a descript la plante que nous nommons Rheubarbe, il dict: elle croist sur les monts Sucenir & de Campion, qui sont deux villes trespamples de la Region vulgairement nommee Tanguth, qui est subiecte au grand Cham, que lon appelle le Roy des Roys, laquelle a esté nommee par les anciens cosmographes la region de Sines. On la tire de terre en hyuer vn peu deuant le printemps, que le climat & l'assiette de la region faict en ce pais enuiron la fin de May. Car la Rheubarbe qui est tiree de terre au printemps, ou en esté n'est pas meure & n'a point le ius iaulne: elle est en oultre rare, legere, seiche & n'a aucunes veines rouges: Bref elle est moindre en tout & par tout que celle que lon tire en hyuer. On dict que lon n'en tient pas grand cōpte en ces villes. Car les villageois n'en ven-

dent la charge d'un chariot que la somme de seize liures de Venise. Et encores ne prendroient-ils la peine de l'arracher de terre, s'ils n'en estoient sollicités par les marchands Indiens. Car ils en tiennent si peu de cas qu'ils brûlent les racines au lieu de bois. Mais les Indiens & ceux qui habitent la region des Chines l'achètent d'eux : & puis l'apportent apres en Europe & autres régions. Estant pendues à un fil on les fait sécher à l'abry l'espace d'un mois. Luc Caraton marchand d'espiceries tresrenommé m'a donné la figure de la Rheubarbe, laquelle il disoit luy auoir esté baillée par des marchands de Perse. Ceste figure, dict il, est semblable à celle que Rhamnuse nous a baillée, laquelle luy a esté donnée par Chagi Memet marchand Persien. Voila ce qu'en escript André Marin. Et Matthioli dict en ses epistres que celle qu'il a luy a esté apportée de Perse. Il en a mis le pourtrait en la dernière impression de ses commentaires, ou il en parle tout autrement que ne faictes. Ainsi voyez vous que ce grand amas de Reubarbe qui se fait en Mesopotamie ne vient d'ailleurs que des Indes & mesmes de la région des Chines que les anciens nommoient Sines, duquel lieu la bonne est apportée, selon Mesué. Ce que toutesfois vous avez nié, & avez dict en vostre premier liure qu'elle nous est incogneue, cōme la Rhapontique des anciens. Vous avez aussi bien parlé que feroit

celuy qui diroit : la Rheubarbe que lon apporte a Paris vient de Lyon, la Rheubarbe donques que lon apporte a Paris ne viét pas de Venise: Car vous dictes que la Rheubarbe qui est a Venise vient d'Afsirie, & partant qu'elle ne vient pas des Indes. Si elle estoit cueillie en Afsirie il ne faudroit point mettre des marchands de Perse en peine pour en auoir le pourtraic. Car la Natolie & Armenie voisine d'Afsirie nous est plus prochaine que n'est pas la Perse.

Si ces raisons ne vous contentent lisez, ie vous prie, ce qu'en a escript Gracias ab horto medecin du viceroy qui est aux Indes, pour le Roy de Portugal, la ou il a demouré l'espace de plus de trente ans. Il escript donques en ses dialogues qu'il a faict en langage Portugais : Il n'est point necessaire, dict-il, de dire beaucoup de choses touchant la Rheubarbe, veu que c'est vn medicament congneu d'un chacun : toutesfois i'ay pensé qu'il ne falloit obmettre ce que i'ay appris icy és Indes, asçauoir que toute la Rheubarbe, laquelle on porte en Inde, Perse & Europe, croist en la region des Chines : car de la elle est portee par la Tartarie iusques a Ormus & Alep & puis en Alexandrie, en la fin a Venise, puis aux autres regions de l'Europe. Nous nous aydons (outre ce qui nous en est apporté par les nauires des Chines) de celle aussi que les Persiens font venir d'Ormuz, laquelle est moins

carieuse & surannée, que celle qui est apportée de Chine par les nauires. D'autant que les especeries qui sont portées sur mer se corrompent & gâstent dauantage en l'espace d'un mois, que ne font pas en l'espace d'un an celles que lon fait conduire par terre. Dauantage l'Inde est fort humide, principalement en lieux maritimes, tellement qu'en icelle lon ne peut pas longuement garder les especiers en leur entier. Car la Rheubarbe apportée en Inde enuiron le mois de May, asçauoir en lieux maritimes, est du tout inutile & doit estre iectée, si elle n'est totalement employée deuant le mois de Septembre: car elle se corrompt, comme plusieurs autres especeries, en ces quatre mois qui s'ont Iuing, Iuliet, Aoust, Septembre. Ce pendant on leur en apporte de plus fraîche d'Ormus, de laquelle ilz vsent: & celle qui a hyuerné en lieux maritimes est ietée dedens la mer. On dict qu'il y en a vne espece qui croist en vne certaine ville de Tartarie, nommée Samarcandar: mais elle est fort mauuaise & ne sert qu'à purger les cheuaux. Or n'y a il aucune Rheubarbe de Barbarie ou des Indes: mais seulement des Chines, que les Persiens nomment Rauan Chini & plusieurs autres la nomment seulement Rauan. Falopius aussi au chap. de la Rheubarbe escript ainsi: Ce que les Grecs ont nommé Rha, dit il, est appelé par les Arabes Rabel, dont les mesmes Arabes ont fait trois

especes, le premier Rabel indien, qui est la plus excellente Rheubarbe de toutes, laquelle nous auons: le second est celuy que lon nomme barbare, laquelle quelque fois se trouue chez les apoticaire: le troisieme est Turchique, nommé par les Grecs Rhapon-tique. Lisez encores en la nouuelle description de toute la terre, faite par Abraham Ortel, excellent Cosmographe, vous trouuez qu'il a nommé les regions, desquelles la Rheubarbe nous est apportee, asçauoir de Chine, Cataio, Camboai, Mangi, toutes regions voisines situees oultre les Indes. Et en la particulie qu'il a faite des regions d'Asie i'ay remarqué nommement les montagnes, esquelles la pluspart de nostre Rheubarbe croist en telle abondance, q celle de laquelle on s'aide en tout l'Occidēt ne viēt d'ailleurs. Toutesfois ie me doute à peu près qui est le liure, lequel vous a fait faire ceste faute. Il me souuient auoir leu dedās les Obseruations de Pierre Belon, asçauoir au second liure, chapitre 102. que la plus grande partie des Rheubarbes qui sont apportees en Europe ont esté acheptees à Halep, ou les habitans sont coustumiers d'envoier quelques fois arriuer douze chameaux d'une compagnie, tous chargez de Rheubarbe, apportee du pays d'Asamie, ou elle est diligemme cultiuee. Voila ce que escrit Belon, lequel quatre ou cinq lignes plus bas du mesme chapitre, escrit que les

Rheubarbes que lon apportoit en Damas, ou en Halep du temps de Mefué, venoit du pais des Indes & de Seni, qui est à dire (comme il escrit) du pays d'Asamie ou Asirie. En la page suyuant il repete encores le mesme & dit, que la Rheubarbe est cultiuee en Asamie, cest à dire en Mesopotamie. Ainsi vous auez pësé que ce qu'il escrit est vray : encores qu'en ce passage il mōstre suffisamment qu'il ne sçait qu'il dit: car il declare bien qu'il n'entend rien en la Cosmographie, disant q̄ le pays des Indes & de Seni est le pays d'Asamie, ou Asirie: lesquels toutesfois sont eslongnez les vns des autres autant qu'il y a de distâce depuis le 79. degré iusques au 180. Ou bien si par Asamie vous voulez entendre avecques luy les Indes & Seni, il fault necessairement que vous confessiez que la Reubarbe, qui vient en Halep est apportee des Indes & Seni, puisque selon Belon Asamie Asirie & Mesopotamie sont les Indes & Seni: ce qui est toutesfois faux en tout & par tout. L'ay communiqué de ceste affaire avec André Theuet excellent Cosmographe, & hōme lequel a veu autant de terres estrangeres qu'homme qui soit en nostre temps. Il m'a fait ce bien de me monstrier ce qu'il a escrit de la Rheubarbe, en sa Cosmographie vniuerselle, laquelle en bref il doit mettre en lumiere : Et ce suyuant les obseruations qu'il en a faites, toutes lesquelles ne tendent ailleurs, sinon que la bonne

*Erreur de
P. Belon.*

Rheubarbe, de laquelle nous vsons vient de Chine & des autres regions circumuoisines Vous avez veu beaucoup de liures, comme vous les faire croire : mais ie m'assure que vous en avez fait fort mal vostre profit, principalement de ceux-cy que i'ay alleguez, lesquels vous conuainquent de bestise & d'une trop impudente vanterie.

L'autre moyen par lequel ie vous prou- *Des signes*
 uoy que nostre Rheubarbe est la vraye, de la *pour co-*
 quelle Mesué a parlé, estoit tiré des marques *gnoistre la*
 & signes par lesquels il dit qu'elle est reco- *bonne Rheu-*
 gneue: Aſſauoir que la bonne Rheubarbe de *barbe.*
 Chine est rouffastre, pesante, de substance ou
 corpulence rare, laquelle estant röpue appa-
 roist rouſſe, iaulne & entremeslee d'azur. Vo^e
 ne respondes rien à toute ceste raison, ains
 seulemēt vo^e vo^e amusez à me reprēdre de ce
 q' i'ay dit qu'estāt röpue elle est entremeslee
 d'azur. Pour à quoy respōdre ie vous prouue-
 ray, premieremēt qu'en tournant le mot de
 Mesué ie n'ay point failly, cōme vous criez,
 mais que ie l'ay rendu François cōme il ap-
 partient : Puis ie respondray à ce que vous di-
 tes qu'il ne se trouue point de Rheubarbe
 entremeslee d'azur. Le mot duquel les In-
 terpretes Latins se sont aidez est pur Grec, *Quelle cou-*
 toutesfois fait Latin par laps de temps : ce *leur les La-*
 mot est *Glaucus* : Il est autrement nommé par *tins ont*
 les Latins *Ceruleus*, cōme il est escrit és Com- *ommee*
 mentaires sur les Epigrammes de Martial : Il *Glaucus.*

est aussi nommé *Casius* : comme dit Gelle suyuant l'aduis de Nigide : & comme il appert par ce que tous les Latins ont nommé les yeux de Minerue *Casios*, expliquans le mot Grec d'Homere *γλαυκῶπις*, lequel est aussi l'un des epythetes de l'œil, comme escrit Diodore. Or ces deux mots *Ceruleus* & *Casius* viennent du mot Latin *Cælum* qui signifie le Ciel, pour autant que par ces deux mots on signifie vne couleur semblable à celle qui est au ciel, comme dit le mesme commentateur & Anthoine Thylese, qui a escrit des couleurs. Telle & semblable couleur se voit en la mer, & pour ceste cause la mer est nommee *Cærulee* : car aussi represente-elle la couleur du ciel. Et Virgile au douzieme de l'*Æneide* parlant d'une deesse qui se cache dedans les ondes dit,

--- *caput glauco contextit amictu.*

C'est à dire, elle couure sa teste d'un couurechef azuré. Car aussi Seruie dit au Commentaire qu'il l'a nommé azuré à la semblance des ondes. Et Iules Cæsar Scaliger escrit que ces deux mots *Casium* & *glaucum* signifient vne mesme chose. Ainsi l'interprete Christofle à Vega. Et ainsi l'a interpreté Gaza au premier chapitre. du 5. liure de la generation des animaux, lisez-le & vous trouuerez la diuersité des couleurs des yeux. Je demande maintenant de quelle couleur est le ciel. Si le ciel est azuré, comme chacun confesse, ay-ie mal re-

tourné ce mot *Glaucus* en azuré? Ce mot *Glaucus* m'a-il abusé, cōme vous dites? Si vous eussiez tant regardé de liures, comme vous vous vantez auoir fait, vous eussiez trouué ce que ie dy. *Si grande quantité de blanc*, dites vous, *est meslé avecques peu de verd, il se fera vne couleur dite glaucus*: mais fort remise tirant plus sur le blāc que sur le vert. De la vous voulez conclure q̄ la couleur nōmee *glaucus* par les Grecs & Latins est blāchastre ou blāche-uerte, telle qu'elle apparoist aux fueilles des Saules. Et pour prouuer vostre dire vo⁹ amenez le passage de Virgile qui est escrit au 4. des Georgiques. Si vo⁹ eussiez leu au commencement du second, ou bien que quelqu'un de vos amis vous en eust aduertí, vous eussiez trouué ces mots,

- *Et glaucacanentiafronde salicta*. C'est à dire,

Et la saulaye verte aux rameaux blanchissans.

Car en cest endroit le mot *Glaucus* signifie vert, cōme l'interprete Seruie Honorat, excellent Grammarien, disant: A bonne raison Virgile a escrit verts & blanchissans: car les Saules sont blancs d'une part, & verts de l'autre. C'est ce que Marot a signifié en sa version du 137. Pseaume.

Aux saules verts nos harpes nous pendismes.

Aussi est-il bon à voir que si Virgile eust voulu signifier blāchastre par ce mot *Glaucus* il n'eust pas apres adiousté *Canentia*, qui signifie blanchissant: autrement c'eust esté vne repetition trop lourde. Pour encores mieux

Ignorance
de Lau-
nay.

prouuer vostre dire vous alleguez la seconde Thebaide de Stace disant : *Et Statius en sa seconde Thebaide, Glaucaque αζυρέχολινα. Je vous demande, tels arbres sont-ils innixus?* Mais auant que respondre à ceste demande, ie vous somme que vous ayez à m'enuoyer vne ample interpretation de vostre dire: car encores que ie ne me vueille vanter d'auoir tant leu de liures que vous auez fait, pour scauoir que c'estoit que *Glaucus*: si est-ce que ie m'asseure qu'il ne se trouuera liure Grec ou Latin auquel il soit escrit, *αζυρέχολινα*, si ce n'est que vous ayez fait quelque nouuelle correctiō sur les Thebaides. Tant y a que ie suis contrainct de dire ainsi que disoit Accurse ayant trouué vn mot difficile a interpreter: il est Grec, dit-il, il ne se list point. Et en vn autre endroit, qu'Apollon le deuine. Ou bien si par ce mot *azuré*, vous entendez la couleur *azuree*, il n'y a point de doubte que vous n'ayez allegué cōtre vous, nommant les Oliuiers *azurez*.

Quant à ce que vous me demandez si tels arbres sont *innixus*, ie vous responds de mesme, confessant ne scauoir quel abre se nomme *innixus*. Ie sçay biē qu'*innixus* est vn mot Latin qui descend du verbe, *innitor*, lequel signifie estre appuyé, mais ie ne trouue point qu'il y ait arbre nommé de ce nom. Cecy me fait doubter qu'il y a vne faulte en ceste premiere impression, laquelle est aduenue de ce que vous n'auiez sceu lire le memoire de ce-

luy qui vous a aduertý de ce passage de Stace. Le passage de Stace est escript en ceste faon,

— *glaucaq; innexus olina*

Vittarum prouenit bonos.

Tellement qu'auant que former vostre demãde vous recorrigez vostre *innexus* escriuant *innexus*, & le remettãt au lieu d'*azurẽz*, & ainsi sera le passage en son naturel: pourueu aussi que vo^s mettiez *azurẽz* en la place d'*innexus*. Voila vostre faute vn peu mieux corrigee q̃ vous n'avez pas fait celle q̃ vous avez faite en Pline & celle q̃ vous avez voulu corriger en mon Discours. Or d'autant que ie m'asseure que vous n'y ferez faute en la secõde impression, ie vous responds à ce passage de Stace (selon la correction, dont ie me suis peu aduiser) ce que i'ay respondu à celuy de Virgile: asauoir que par ce mot il veut dire vert, selon que Seruie la interpreté en Virgile, lequel mesme nomme l'Oliuier vert au cinquieme de l'*Æneide*. Eustathe au 21. de l'*Iliade* d'Homere dit que les anciens attribuoient ceste couleur à l'œil, à la mer & à l'oliuier, à cause de ses fueilles & mesmes à l'huile, comme Athenee a faict mención de l'huile glauque. Or voyez maintenãt encores que vostre vray mestier soit d'estre maistre d'escholle & pedante, voyez, di-ie, comme vous estes vn vaillant grammairien, qui vous meslez de me montrẽr la grammaire, comme vous dictes, & toutesfois ne sauez pas cela,

& n'avez mesmes leu les dictionnaires de Robert Estienne, auxquels vous me renuoyez: car si vous les eussiez leus, vous eussiez trouué au plus petit de tous *Glancus*, *glanca*, *glancum*, verd, vn peu meslé de blanc, de coulent d'azur & d'eau. Autant en eussiez vous trouué au grand: & autant encores au petit dictionnaire François-Latin, & en celuy de Thierry. Bref, vous en eussiez trouué autant en celuy qui a esté dernièrement imprimé à Anuers: lisez les vo^r mesmes & aduertissez moy de ce q^u vous y trouuerez. Si ce n'estoit que par tout le discours de vostre liure i'ay apperceu que vous faictes bon marché de vostre honneur, ie n'eusse iamais p^{eu}sé que ces mots vous fussent eschapper que de me renvoyer à des liures que iamais vous ne veistes: ou bien que malicieusement vous n'avez voulu entendre, s'il est ainsi que les ayez veus. Mais à celle fin que il ne vous semble que ie sois seul qui a ainsi tourné le mot *glancus* en Mesué: ie vous adrene le mesme lieu faict François par du Pinet, qui est celuy lequel a traduit les commentaires de Matthioli, & lequel a ainsi fait François le mot, pour lequel vous avez tant crié apres moy. Il dit donques au chapitre secōd du troisieme liure de Dioscoride, parlant de la Rheubarbe: celuy des Indes est le meilleur de tous, pourueu qu'il soit frais & roux tirant sur le noir, & qu'il soit pesant, encores qu'il soit de substance lache & flaque, estant roux

& azuré quand on le rompt & qui tainct en
jaune quand on le mache. Il appert donques
tant par raisons que par authoritez que i'ay
bien traduit ce mot *glaucus* en azuré, & que
vous estes vn ignorant & vn vanteur effron-
té, qui dictes auoir leu tant de liures pour le
trouuer. Et quand a la question que vous me
faictes, asçauoir si en la maladie des yeux nō-
mee *glauco*, les yeux deuiennent de couleur
d'azur: ie vous responds avec Aesse chapitre
50. duliure 2. que la premiere espece de *glau-
cedo* est proprement vne mutation de l'hu-
meur crystalin en couleur azuree: & que l'au-
tre est impropre, laquelle se fait par le seul de-
seichement & endurcissement de l'humeur
cristalin. Paul Aeginete en a parlé de ceste
maniere en son troisieme liure: l'auteur des
definitions medicinales en a donné telle de-
finition, & Scaliger a escrit *γλαυκῶμα vitium o-
culorum, Caruleo colore ex albedo*, cest à dire, la
maladie nōmee *glauco* est vn vice des yeux
faict de la couleur blanche changee en azur.
Il est biē vray q si vous pēsez que par ce mot *Plusieurs*
d'azur nous entendiōs seulemēt l'azur d'acre, *differēces*
qui est haut en couleur, vous vous abuseriez *d'azurs*
beaucoup: car il y a plusieurs differences d'a- *comme de*
zurs: & cōme dit l'auteur du liure des cou- *toutes au-*
leurs, soit Theophraste, ou Aristote, chasque *tres cou-*
couleur a plusieurs differēces. Mesmes enco- *leurs.*
res q la couleur Cērulee & Cēsie soyēt toutes
deux azurees, si est ce qu'elles sont differētes,

Car Cicerō au liure de la nature des dieux dit que les yeux de Minerue sont de couleur Cæsie & ceux de Neptune de couleur Cerulee. Toutesfois ceste difference n'est pas en especes, comme disent les Philosophes: mais selō plus ou moins, c'est a dire selon qu'ilz sont plus ou moins meſſangez de blanc & de noir. La Cerulee est plus viue & la Cæsie plus esgayee, comme escript Scaliger. Ainsi y a il plusieurs sortes de Rouges, plusieurs de verts & plusieurs meſmes de blancs: toutes lesquelles sont nommees Rouges, Vertes & Blanches. Ainsi dōques entre les Azurs il y a plusieurs differences, cōme est l'azur d'Acre, l'azur de Hongrie, l'azur d'esmail, la cendre d'esmail, la cendre d'azur, & celle especē qu'ilz appellēt la cendree d'azur, laquelle est fort blaffarde telle que celle dont il est question, & de laquelle ilz font ceste couleur des yeulx nommee *glancus* par les Grecs & Latins: ainsi que les maistres en cest art m'ont asſeurē & l'ont representee deuant moy. Lisez donques vous meſmes les auteurs qui en ont parlē, & vous cognoistrez que telle couleur est azuree, encores qu'elle soit meſſee de blanc & de vert, ou de pers & de blanc, cōme vous le dictes: car le pers est vne especē d'azur, comme sont le bleu & le violet: Il appert donques ainsi que faulſement & calomnieusemēt, comme, vnestourdy & effrontē, vous m'avez repris d'une chose que n'entendistes iamais.

Or pour venir a l'autre point touchant la Rheubarbe, ie vous cōfesse que tel azur haut en couleur ne si void point, mais bien que parmy les veines, principalemēt blanchatres, vous pouuez recognoistre aisemēt quelque reste de telle couleur, aux vnes plus, aux autres moins, ce qui s'apparoist d'autant plus qu'elles sont fraiches & recentes : car telle couleur se pert aisement & encores qu'elle n'apparoisse que bien peu en nos Rheubarbes, aux vnes desquelles i'ay souuent remerqué quelque veine verdastre, toutesfois assez deteincte : si est ce que cela n'est pas a dire qu'elles ne soiēt de Chine. Pourueu q̄ les autres marques y soient (ce que vous n'avez debatu) Car comme on dict communemēt vne seule Arondelle ne fait point le printemps. Quāt a celle qui est sophistiquée ie la reiecte comme vous: mais l'autre ie la retiens & prise avecques Mesué : comme estant le plus excellent medicament que nous ayons auourd'huy, autant different de vostre Antimoine, comme le blanc du noir, la bonte de la malice & le ciel de la terre. Je sçay bien que vous pensez couvrir vostre faute, disant que vous ne la desprisez pas, non plus que vous despriseriez le vin de Paris en disant que celuy de Beaune est meilleur. Et pour autant que vous vous cognoissez mieux en ceste matiere que vous ne faiētes en medecine, ie m'asseure que vous me confesserez que celuy qui entre en

La Rheubarbe excellent medicament.

vne tauerne, ou il y a de l'vn & de l'autre, &
 qui dit que le vin de Paris faiçt pluſtoſt mal
 que celuy de Beaune: que celuy là fait autant
 comme s'il diſoit beueez touſiours du vin de
 Beaune & ne beueez plus de celuy de Paris.
 Quand donques vous diçtes: la Rheubarbe
 de laquelle vous vſez n'eſt pas de la meilleu-
 re: elle eſt plus contraire à la nature quel'An-
 timoine, n'eſt-ce pas autāt comme ſi vous di-
 ſiez prenez de l'Antimoine & ne prenez plus
 de Rheubarbe? Toutesſois ie ſuis biē aïſe que
 vous vous en excuſez: c'eſt quelque ſigne d'a-
 mendement, pourueu qu'il vous dure: mais ie
 crains bien que ces mauuais enſeignemēs, leſ-
 quels vous auez receus par la main d'ignan-
 ce ne vous ayent tellement gaſté l'entende-
 ment, qu'à peine pourrez vous iamais rece-
 uoir autre doctrine qui ne ſoit incontinent
 gaſtee: car voſtre vaiſſeau eſt mal enuiné, &
 voſtre eſprit reſſemble les corps impurs, leſ-
 quels tant plus ſont nourris & plus ſont-ils ga-
 ſtez: ſi bien qu'il eſt neceſſaire de les purger a-
 uant que les nourrir dauantage de bonnes viā-
 des. C'eſt pourquoy i'aimerois beaucoup
 mieux, comme diſoit Galen, auoir à remon-
 ſtrer à vn homme, lequel fut du tout ignorant,
 qu'à vn homme mal inſtruit & cauilleur,
 tel que vous eſtes. Vous laiſſaſtes vn peu trop
 toſt les leçons pour vous aller experimenter
 par la mort des hommes: & ſi eſt bon à veoir
 que vous donnez tout loïſir à vos docteurs
 muets,

muets, qui sont vos liures, si aucuns en auez, de se reposer. Monsieur mon amy, il me desplaist fort que vous ayez entrepris vn fardeau si mal proportionné à vos espaulles qu'il faille qu'à la fin de vos iours vostre bestise soit descouverte & faite la fable à vn chacun, apres auoir si long temps demouré caché sous le manteau de vostre bonne mine.

Or puis que nous auons monstré que la Rheubarbe, de laquelle nous vsons est celle qui a esté descrite par les anciés, il reste à parler de la Scamonee & du Turbith, & môstrer qu'ils ne sont si malicieux que l'Antimoine: car en ce point gist la question. Je scay bien qu'au deffaut de la Scamonee & du Turbith legitime, nous sommes contraincts d'vser de ceux que lon nous apporte, ausquels on ne recognoist en tout & par tout les marques que les anciens leur ont baillées: Je scay bien qu'il y en a de corrompus & falsifiez: cela n'ay-ie point nyé, & m'en rapporte à ce qui en est escrit en mon Discours: mais ie dis que ceux desquels nous vsons sont medicamêts & nō venins, cōme est l'Antimoine: & qu'il n'en peut aduenir tels incōueniêts, cōme de l'Antimoine. I'ay dit dauâtage que nous essayons d'vser des plus purs & que nous mettons peine tous les ans deux fois de reuisiter les boutiques des Apoticaïres, pour separer les mauuais drogues d'avecques les bonnes. Mais à celle fin que vous entendiez qu'elle difference ie

De la Scamonee & du Turbith.

*Differēce
entre me-
dicament
& venin.*

mets entre vostre Antimoine & nostre Scamonee & Turbith: ie vous allegueray vn passage de Galen, qui est au sixieme commentaire du sixieme liure des Epidimies d'Hippocrate: Il y aura parauenture, dit-il, quelqu'un qui pensera que la matiere des mediments purgeants doit estre mise au rang des venins: car ces medicaments estans baillez outre mesure nous font mourir. Si nous confessons cela, il s'ensuyura aussi que nous mettrōs en mesme rang de venins les Cōtrepoisons & les Theriaques, d'autant qu'ils nous peuuent faire mourir, si ce n'est que lon en prene en petite quantité. Toutesfois pour ceste mesme cause il me semble q̄ les medecins appellent plusieurs venins medicamēts, pour autant qu'en quelques temps l'vsage d'iceux est necessaire: mais il nomment ceux là deleteraires, c'est à dire pernicieux, lesquels en quel que temps que ce soit n'apportent aucū profit aux hommes malades, ny à ceux qui sont en bōne santé: car ny l'Aconite, ny le vif-argent, ny l'escume-d'argent, ny le lieure marin entrez dedans le corps ne peuuent apporter aucun profit ou commodité. Voila ce qu'escrit Galen. Ie dis donques que nostre Scamonee & Turbith sont du nombre de ceux lesquels pris en quelque temps apportent commodité: & que vostre Antimoine est du nombre des autres qui tousiours nuisent, comme est le vif-argent son compagnon & prochain

voisin. Les premiers estans corrigez selõ que l'art le commande, & estans pris en quantité moderee deschargēt le corps de plusieurs immondices. Les autres ne peuuent estre corrigez & nuisent tousiours en quelque petite quantité qu'on les puisse bailler. Les premiers ont en eux vne qualité nourriciere: car comme nous auons dit ils ont vne nature moyenne entre aliment & venin: les autres ne peuuent estre chāgez en aliments: & faut necessairement qu'ils soyēt en tout & par tout domptez & iettez hors par la force naturelle, ou bien qu'ils facent mourir les corps auxquels ils sont entrez. Les premiers portent vne malice & contrarietē à nostre nature, autrement ne seroyent-ils medicaments: mais ceste malice & contrarietē se peut corriger, & est corrigeē comme a escrit Mesuē. Ce sont les venins desquels j'ay parlē au premier chapitre de mon premier liure des venins, lesquels peuuent seruir comme medicaments apres qu'ils ont estē corrigez. Vous dictes toutesfois en vostre page marquée 126. *qu'un médicament de grande vertu, en quelque petite quantité qu'on le baille: monstrera son effect quelque melange que luy pourrie & faire: tesmoing le codignac meslé avec la Scamonee: mais non pas si violent, si est-ce qu'il imprimera tousiours de sa malice es lieux: par ou il passera.* A quoy ie vous responds que cela est faulx. Si vous entendez des premiers medicaments dont Galen a parlē au commētai-

re sus allegué : car les anciens nous auroyent
monstré en vain les moyens de meslanger les
medicaments purgeans, si nonobstant la mes-
lange, ils executoyent leurs effets malins.
Toutesfois si par cest effect vous entendez
seulement la purge qu'ils font, ie vous confes-
se que nonobstant la meslange, ils montrent
leurs effects: aussi ne voulôs-nous pas empes-
cher qu'ils ne purgent : ains seulement nous
voulons rabatre leur acrimonie, leur chaleur
& leur vehemence . Mais si par ceste proposi-
tion vous entendez les autres medicaments
ou venins, qui iamais ne peuuent apporter
profit, comme le vis-argent, ie le vous confes-
se tres-voluntiers: car en cela elle est vraye: &
font les renards, lesquels vous dictes pouuoir
changer de poil & non de mœurs : ce sont les
singes qui serôt tousiours singes & fussent-ils
vestus de pourpre . Je suis en outre d'accord
avec vous, comme i'ay dict, que la Scamonee
& le Turbith ont quelque malice, voire telle
que vous l'avez transcripée de Mesué, mais ie
soustiens qu'elle est corrigee, & que si elle
ne pouuoit estre corrigee, Mesué auroit esté
vn trôpeur d'en escrire les moyens. Ces medi-
camets estans ainsi corrigez sont ordônez aux
malades, nō pas, cōme vous escriuez en ceste
mesme page, à tous, en toutes maladies & à
tous malades de quelque temperature qu'ils
soyēt: cela ne veux-je aduouer, & ne le puis.
Et qui plus est ie ne pèse point qu'il y ait me

*La malice
de la Sca-
monee &
Turbith
peut estre
corrigee.*

*Calomnie
de Launay*

decin qui le face, si ce ne sont quelqs empiriques, cōme vous. Mais au cōtraire selon la diuersité des complexions, des maladies, & des saisons nous les diuersifiōs, nous les donnōs, ou nous les laissons du tout. Mesmes vous deuez sçauoir que tous les medicaments purgeants composez, qui se gardent chez les Apoticares ne sont pas Diagrediez. Liscz la cōposition du Catholicon, duquel nous vsons ordinairement. Raclez donques ceste calomnie de vostre liure, & ne dictes plus que nous baillōs le Diagrede ou Scamonee & le Turbith en hyuer, en esté, à toutes maladies, & à tous malades de quelque temperatute qu'ils soyent: ou bien rapportez là aux Empiriques vos semblables & à ceux qui le font ainsi.

Mais pour prouuer que l'Antimoine n'est pas si dangereux que la Scamonee vous dites qu'il *allegea André Gallus qui auoit vne inflammation d'estomach & de poulmon: avec soif, inextinguible, & autres accidents meslez à quoy eust esté contraire voire mortelle la scamonee. Car comme dict Oribasius: elle ne doit estre baillé à ceux: qui ont l'estomach ardent: ou qui l'ont imbecille: ou qui ont leur habitude de corps, préparé à colliquatiō:* ie vous responds à cecy, Premièrement que vous n'argumentez pas bien: car encores que ie vous eusse confesse que l'Antimoine *allegea Gallus*, ce que la Scamonee n'eust sceu faire, si est-ce qu'il ne s'ensuiuroit pas que la Scamonee fut plus dangereuse que l'Anti-

*Ignorance
de Launay*

moine. Et qu'il ne soit ainsi, ie vous demâde si ce seroit bien argumenté de dire, l'Agaric a guerri Platon malade d'une fièvre quotidiene ce q la Rheubarbe n'eust sceu faire: la Rheubarbe d'ocques est plus dangereuse que l'Agaric. Si iestoie dialecticien regent en vn college, & qu'un escollier de trois iours m'eust faict pareil argument, ie le declairerois inhabille de mettre iamais l'œil en Aristote, cōme ayant le sens cōmun desreiglé & mal disposé a telles sciences. Secondemēt, ie dis que tout ainsi comme par le tesmoignage d'Oribase la Scamonee n'eust sceu alleger Gallus: Ainsi par le tesmoignage de Galen l'Antimoine luy estoit tresdangereux & contraire. Car s'il vous souuiēt de ce que vous avez escrit en la fin de vostre page marquee 84. Il se fault garder, dit Galen, de bailler des medicaments vomitifs: non seulement a ceulx qui ont vlcération aux polmons, mais aussi a ceulx qui y sont disposez: & a ceulx aussi qui ont les flancs chaulds & enflāmez. Or est il ainsi que l'Antimoine qu'il prit estoit vomitif: d'auantage, comme dit Matthioli, Gallus auoit vne inflammation de Polmons, de coeur & d'estomach: Et d'abondant il auoit vne enfleure en la luette: tellement qu'il n'y a point de doubte qu'il n'eust les flancs eschauffez & qu'il ne fut disposé a auoir les Polmons vlcerez: ioinct que les vomitoires sont fort cōtraires aux enfleures de la luette. Par ainsi

l'Antimoine (encores qu'il fut bõ medicamēt purgeant) ne luy estoit pas moins contraire que la Scamonee. Gallus donques fut guery en iouant, cōme on dit, au quitte & au double: car il chargea derechef tellement sa nature & l'esguillonna de telle façon, qu'elle fut contraincte de s'esleuer, non seulement cōtre le premier mal, mais aussi cōtre le second venin, si bien qu'elle les chassa tous deux en vn mesme temps. I'ay escript en mō Discours le moyen par lequel l'Antimoine guerist quelque fois les maladies: c'est en la fin du feuillet 30 & au feuillet 31. Regardez-y si bon vous semble.

Vous ne vous estes contenté de cela & auez allegué vos ordinaires experiences, partie desquelles sont fauses, comme ceulx de vostre ville vous le prouueront. Et auez oublié d'enroller parmi tant & tant d'hōmes & femmes, qu'auez gueries pour quelque tēps, ceux qui en ont esté gueris pour tout iamais, comme vn nommé monsieur Violé, qui mourut deux iours apres que vous luy en eustes baillé: Le notaire Ossan qui mourut vne heure apres en auoir pris, encores qu'il se portast bien: Vne boulangere qui en mourut apres auoir languy quelque mois. Vn nommé Gaudineau qui en languist encores: la femme d'un marchand nommé Lalande, laquelle ne cessa de vomir iusques a ce qu'elle eut rendu l'ame, criant apres vous que vous estiez cau-

se de sa mort : le greffier Garriou : vous avez aussi oublié ceulx qui sen sentent encores, cōme vn nommé Fontaine , la mere duquel crie encores que vous avez bourrelé son filz. Bref vne infinité d'autres, desquels j'ay receu lettres pleines de iuste plainctes contre vous.

Or ie suis d'aduis maintenant, puis que vostre ignorance, imposture & impudence est descouuerte, tāt par vos faulses experiences, que par vos liures dignes d'vn tel maistre que vous estes, ie suis d'aduis, dy-ie, que v^o quittez le mestier que vous n'entēdez autremēt : & que par ce moyē n'occupiez la place d'vn homme sçauant non imposteur, lequel gaignera & receuera les gages que depuis trente ans vous avez mal pris des Citoyens de la Rochelle, aux despens desquelz vous avez apris a faire mourir les hommes, si bien qu'il semble qu'ils soyent aucunemēt coupables de vos faultes. Aussi vous sera-il beaucoup plus seant de retourner a vostre premier mestier, qui estoit d'estre maistre d'escholle la ou vous avez cogneu la medecine par les reuelations secretes qui vous ont esté faictes : mais s'il vous fasche de retourner en enfance, v^o pourrez faire distiller quelque quantité de ceste eau, dont vous avez par cy deuant amusé le peuple par l'espace de quinze ans, laquelle se nommoit l'Eau-de-quinte-essence propre a toutes maladies. Car encores qu'elle soit fort esuentee en vostre pais, & que vous

luy ayez donné congé depuis que le barbier vous eut appris la vertu esmerueillable de l'Antimoine : Si est-ce que changeant de region vous le pourrez aller prescher la ou encores vostre ignorance n'est descouuerte. Et de ma part, comme bon citoyen, ie priray le Magistrat d'auoir esgard non seulement a ce que le chemin soit couppe a ceux, lesquels par le moyen de ce poison peuent plus aysément mettre leur volonté en execution, comme i'ay dit en mon Discours: mais encores d'abondant ie le suppliray a ioinctes mains, au nom de tous ceux de nostre compagnie, & l'adju-reray au nō de Dieu d'empescher par Edict public que ceste vostre drogue n'aye le cours tel que vostre ignorance & malice luy pense dōner : attendu qu'elle est telle comme nous auons monstre, non seulement par raisons, mais aussi par authoritez tant des anciens que des modernes. Teutesfois si vous auez delibere de demeurer en vostre opinion, comme ie me doute que vous ferez, de peur que l'on ne pense que vous vous teniez pour vaincu, regardez à tout le moins d'estudier & de chercher plus diligemment les raisons que vous auez à dire, non point contre moy seulement (car ie suis le moindre des moindres) mais cōtre toute ceste assemblee de gens doctes, lesquels ont recherché songneusement les facultez & suffisances de l'Antimoine, auant que d'en arrester ce que i'ay transcrit en la fin du

chapitre cinquieme. Et ne trouuëz mauuais
cependët si estant persuadé par leurs raisons,
ie n'ay peu estre retiré de ma premiere opiniõ
par la lecture de vostre beau gros liure. Prote
stant toutesfois si vous escriuez derechef, &
que vous procediez par bonnes raisons, com
me il est decent à vn homme aagé, & a tous
hõmesquiveullët estre estimez sages sur la fin
de leurs iours, q̃ ie n'édureray aucunemët que
vous ne surmontiez en modestie. Mais si au
contraire vous poursuuez à iniurier, ie vous
promets dès ceste heure qu'ë ce poinët ie per
mettray d'estre vaincu, & quitteray ceste par
tie, avec protestatiõ de n'ë auoir aucũ regret.

Si i'eusse pensé que vos faiseurs de vers eus
sent merité quelque responce, ie me fusse es
sayé d'inuoker la faueur q̃ les Muses autres
fois ne me desnierent, toutesfois ie ne les ay
voulu importuner, cognoissant que ce qu'ils
en ont fait a esté plustost pour l'enuie qu'ils
auoyët de voir leurs nõs imprimez, q̃ pour au
ne cognoissance qu'ils eussent de la matiere
que i'ay traittee. l'ay dequoy leur respondre,
Dieu mercy, & ne suis tellement destitué de
ce baston poëtique, que si ie voulois le pren
dre en ma main, ie ne leur donnasse quelque
touche. Toutesfois ie ne m'ë mettray en pei
ne & aduertiray seulemët la Guillotiere, qu'il
se souuienne de feu du Bellay, lequel l'a de
peind en yn dizain, que i'ay chez moy, escrit
de la propre main de ce prince des poëtes

François, comme plusieurs peuuent tesmoigner. Ce dizain a tousiours esté depuis sa mort, entre les mains de P. Hamon Secrétaire de la chambre du Roy & excellent escriuain, auquel il l'auoit baillé pour transcrire avec quelques autres œuvres poétiques. Or encores qu'il m'ait donné assez d'occasion, si est-ce que ie ne l'ay voulu faire mettre en ce liure: d'autant que ie veux gagner par modestie, ce qu'il pèse acquerir sur moy par impudéce.

Voilà ce qui m'a semblé estre nécessaire d'escrire pour la defence de mon Discours nõ seulement, mais aussi pour la cõfirmation de l'aduis donné par la compagnie des medecins de Paris sur les facultez de l'Antimoine. En quoy, certes, ie recognoy n'auoir fait tellement non deuoir que l'importance du fait le merite, me confessant le moindre entre tous ceux, lesquels eussent peu discourir ceste matiere plus elegamment & doctement: & l'aage & experience desquels eust parauanture adiousté quelque plus grand poix & authorité à la dispute. Toutesfois ce que i'en ay fait a esté plustost pour exciter quelque autre esprit a en coucher par escrit ce que la raison, & l'experience luy en auront appris,

FRANCISCI THORII Bellionis Satyra :

Ad Iacobum Greuinum, Medicum.

*Quicquid agunt, quicquid satagunt, & fronte superba,
Naturæque audent spondere stupente Chymistæ:*

*Quicquid & inuita Ratione, GREVINE, nouoque
Mentis inexplētæ tumidi molimine tentant :*

*Illud hoc omne opus, & (Stupidi nisi fallimur) omnis
Huc labor ille redit : sæcli vt meritum omne prioris,*

Et decus, & famam speciosa fraude, suisque

Artibus obscurent : tenebrisque perennibus illos,

Prisca suam quibus, & præsentia tempora lucem

Acceptam referunt, referentque futura, magistros

Deuoeant, solique suo ipsi lumine regnent.

Tota Asia, Europa, Libya nihil hætenus actum est.

Somnia Cos, tricas Stagire dedit, ipsæque nugas

Pergamus. & formæ veteres, & quattuor illa

Corpora, credidimus quæ nos primordia rerum,

Sunt apinæ ignotis sed enim Trias eruta ab antris

Prodiit: ac Triadis nunc, vt Iouis, omnia plena.

Sic potior numerus numero est impar pare : sic &

Tetradi præpollet Trias : estq; haud irrita vatum

Fabula Mercurius. Salis ille, & sulphuris æquis

Partibus instructus cunctas creat, & perimit res.

Illis materies, illis enata facultas

Principiis stirpes, animalia, saxa, metalla,

Æra, aquam, ignem, & humû, cælôsque, & sidera format,

Scilicet : inde noua emicuit Physis, & noua rerum, &

Morborum facies : indé & medicamina morbis
 Iam noua præscribi, reiciq̃ue vetusta lucroso
 Dogmate cœperunt : miscétq̃ue salubria virus
 Pocula, & (infandum) præsentibus agra venenis
 Corpora iam adsuescunt. hinc illud fusile Stimmi
 Perfora, per vicôs increbruit. hæc seges, hæc est
 Luxuries : structis fumosi hinc ara caminis
 Eliciunt Medici. petite hinc iuuenésq̃ue. senésq̃ue,
 Iamdudum æquorea raucus de rupe Valenus
 Clamitat, omnibus auxilium indubitabile morbis.

Illa rudis patrum miracula nesciit ætas :
 Nos quoque, nos patribus soboles insulsior vsum
 Sulphuris, & salis, & vim stimmiôs ignoramus :
 Nec sapimus, quos detrîto sol axe renisit
 Annuus : at sapiunt illic, vbi sub Ioue nudo
 Viuitur extra anni metas : vbi dulcis amara
 Panis radices, homines obsonia fiunt.
 Vel si qui tamen hîc sapiunt, Salmoncos illi
 Stemma patris referant, proauî vel stemma Promethei.

His ego te monstris obstare, GREVINE, tuîque
 Acrîter in pœnas illis intendere dignas
 Gratulor ingenij vires. sic perge agè, & illis
 Mercurius laqueos, & fulmina Mulciber audax
 Confice : digna tuis referes & præmia cœptis.

ARTE. LABORE. FIDE.

Faultes a corriger. Le premier nombre signifie le feuillet : le second la page & le tiers la ligne.

1.1.21. releu. 2.18. est. 4.2.3. qui l'a. 17. lesquels. 6. 1.23. ger-
 donnez. 8.1.19. françois. 10.1.19. on dict. 26. soulagement. 2.
 18. ieunes. 27. ont. 11.1.7. poetiques. 12.1.14. chrylocolle. 13.
 1.6. corpulence. 14.1.4. moissonneur. 16.1.26. patir. 17.2.25.
 s'eschauffera. 19.2.25. lesquels. 25.2.6. vous. 24. estes. 26.1.25.
 alleguez. 28.2.24. disouls. 32.1.23. repoussats. 33.1.27. page
 34.1.25. simple. 28. n'est. 34.2.20. parties. 35.1.16. estans. 2.24
 il y a. 40.1.6. Ergo. 43.1.26. calciné. 44.1.25. Cathartique.
 2.17. endurcy. 49.2.15. entretenoit. 50.1.10. dement. 20.
 faulte. 67.1.30. que le lecteur. 69.2.1. personnages on. 14.
 inconuenient. 27.1.27. face. 83.2.22. il le. 86.1.10. suffisans.
 88.1.3. choleriques. 89.1.95. diuisé. 95.2.24. patrialles. 104.
 1.25. ceste. 119.1.20. coloré.